

**NATIONAL ASSEMBLY OF
SEYCHELLES**

Wednesday 11th September

2024

The Assembly met at 9 am

National Anthem

Moment of Reflection

Mr Speaker in the Chair

MR SPEAKER

Bonzour tou Manm. Bonzour tou nou *staff* ki prezan avek nou. Bonzour nou piblik ki a lekout e en bonzour spesyal pou nou viziter ki dan galeri ozordi, ki en group dimoun trwazyenm-az sorti dan distrik Roche Caiman.

E Onorab Vidot in demann mwan laparol pour li *welcome* zot. Onorab, i kapab pran laparol ler ou pe adres ou Mosyon e ou kapab avans labyenveni. E anpasan mon'n zis note ki ozordi laniverser nou *Sergeant-at-Arms* Mr Antoine Rose donk mon swet li en bonn aniverser e...

(APPLAUSE)

MR SPEAKER

Mon profite pou remersye li pour son servis fidel. Mersi. Nou a avanse lo nou *Order Paper* e parey zot konnen nou annan Mosyon e en dezyenm Mosyon e sa i dan non Onorab Audrey Vidot, e Onorab i annan laparol.

HON AUDREY VIDOT

Mersi Mr Speaker. Bonzour Mr Speaker, tou Manm onorab, Sekretarya Lasanble, zabitan Roche Caiman tou nou bann dimoun aze ki a le kout. E en bonzour spesyal e en byenveni spesyal, pou Komite trwazyenm-az dan distrik Roche Caiman akonpanyen par *DA* Maria Thomas e osi Madanm Joubert, Mrs Odile Joubert.

E osi mon ti a kontan swet byenveni mon *clerk* Mrs Linda Moustache ki pe zwenn nou osi nou Lasanble ozordi.

Mr Speaker, Mosyon ki devan nou Lasanble i lir konm swivan;

Sa Lasanble pe demande ki Gouvernman i fer le neser pou nou bann dimoun aze viv dan plis dinyite. Mersi Mr Speaker.

MR SPEAKER

Mersi nou a ganny segonnman pou Mosyon? Onorab Spiro.

HON RACHEL SPIRO

Bonzour Mr Speaker. Mon pe segonn Mosyon e mon rezerv mon drwa pou mwan entervenir pli tar. Mersi.

MR SPEAKER

Mersi. Ou a kapab lev lanmen ler ou ariv ler pou koze. Mersi Onorab Vidot ou a fer prezantasyon ou Mosyon.

HON AUDREY VIDOT

Mersi Mr Speaker, pou donn mon laparol. Mr Speaker, dinyite nou sitwayen in touzour reste o sant prensip e ideoloji parti *United Seychelles*. Pou viv dan dinyite apre retreat, i en mwayen debaz pou mentenir en bon standar lavi e i en mwayen tre enportan pou redwir lensidans lapovrete.

Se dan sa loptik ki anba ladministrasyon *United Seychelles* dan sa 43 ki'n o pouvwar, in annan bokou langazman serye pou elev proteksyon, benefis ek promosyon dan devlopman e swen nou bann dimoun aze. Zis parey i ganny preskri e rekonnèt par letan anba lartik 16 ek lartik 36 dan Konstitisyon Larepublik Sesel.

Mr Speaker, nou bann dimoun aze, in ede kree en balans dan prosis fer bann bon desizyon dan lavenir nou bann zenn ek devlopman pei. Lo non parti *United Seychelles*, mon sezi sa moman pou dir en gran mersi tou nou bann dimoun aze ki'n servi zot leksperyans ek lasazes, pou gid e siport nou lazenes, nou bann paran tousel, nou la kominote. E pou kontribisyon imans ki zot in fer pou lavansman nou sosyete.

Mr Speaker, pou asir kontinite ek lespas pou plis loportinite, Polisi Nasyonal 2018 pou en popilasyon Sesel ki pe vyei i egzize, ki nou annan resours finansman soutenab sorti dan en sistenm proteksyon sosyal ki adres defi ki nou bann dimoun aze i fer fas avek. E asir en sistenm swen lonterm ki soutenab e ekitab; ki nou regard dan byennet e bezwen lasante nou bann dimoun aze. Anliny avek sistenm Lasante Nasyonal Sesel.

Osi devlop en sistenm efikas, ekitab e lonterm dan swen kot lakour, kominote ek lenstitisyon. E donn nou dimoun aze en servis swen konpreansiv lasante mantal, ziska zot pran sa dernyen souf

lavi dan en lanvironnman amikal sen e sof.

Ki nou devlop, promot, fasilite e angaz nou bann dimoun aze dan tou bann program sosyal e ekonomik. Ki nou ranforsi solidarite ek egalite ant nou zenerasyon ozordi pou elimin tou sort form negligans, labi ek vyolans kont nou bann dimoun aze e lezot kous nou popilasyon.

Mr Speaker, bokou travay ki pe ganny fer par bann diferan lenstitisyon lorganizasyon ek sosyete sivil pe ganny gide par bann konvansyon lagreman enternasyonal e nou Lalwa e nou konstitisyon Larepublik Sesel.

Par kont mon bezwen osi dir ki i tris e regretab ki menm si nou annan striktir e mekaniz an plas pou ou met an aplikasyon sa ki Polisi pe egzize ek gidans bann kad legal, i reste bokou lespas pou donn en meyer swen sipor e servis nou bann dimoun ase, pour ki zot kapab viv dan plis dinyite.

Swivan prezantasyon sa Mosyon ki mon pe anmenn devan Lasanble ozordi, mon swete ki bann Manm Lasanble spesyalman ki'n ganny elekte direktman dan en distrik, i pare pou rekonnet defi ki nou bann dimoun ase i pas atraver

e vwar kwa ki kapab ganny fer an plis. Pou met tou zefor posib, pou ki nou bann dimoun aze i kapab fer fas avek kou lavi ki pe kontinyelman ogmante, en nivo servis debaz ki tous bann dimoun ase i ganny eleve.

Mr Speaker, statistik 2022 i montre 212 dimoun aze 65 an e plis dan mon distrik Roche Caiman. An Mars sa lannen 2024 Lazans Proteksyon Sosyal ti konfirm avek mwan dan en repons kestyon an ekrir ki 10,565 retirete ziska lannen 2023 ti pe resevwar sa ki apel pansyon retrait.

Avek sipor Seksyon Resers Sekretarya Lasanble Nasyonal statistik resan i montre ki 1,205 dimoun pe resevwar Sekirite Sosyal avek Lazans Proteksyon Sosyal. Me zot pa pe resevwar pasyan retrait par Fon Pansyon Sesel. Par kont 10,322 pe resevwar zot larzan pansyon retrait avek Lazans Proteksyon Sosyal enkli zot larzan avek Fon Pansyon Sesel.

Mr Speaker, parey mon'n fer resorti pli boner, mankman pou donn en meyer swen, servis ek sipor nou bann dimoun aze, espesyalman ek kou lavi ki pe kontinyelman ogmante, I enportan pou reflexir e pran kont ki pa tou nou dimoun aze

ki pe neserman viv en lavi libreman stab e eze.

En gran mazorite nou bann dimoun aze, nepli kapab manz byen aköz tou keksoz in tro ser. Dan tou kous mon distrik Roche Caiman, tou dimoun i konplent mannyer lavi i ser e difisil pou fer 2 bout zwenn ziska lafen le mwan, e mon bann dimoun aze pa en leksepsyon

(APPLAUSE)

HON AUDREY VIDOT

Dan en pti konversasyon avek mon bann dimoun aze Roche Caiman, zot koz lo sakrifis ki zot bezwen fer pou depans sa pti larzan Sekirite Sosyal dan zot pers. Sa ki annan problemn lasante tel konman tansyon, dyabet ek leker, i eksplik ou mannyer i difisil pour li kapab fer en ladyet balanse ler pri fri ek legim e komodite esansyel ki bon pour zot lasante, in monte dan laboutik.

Mwan note ki dan sesyon *PNQ* Mardi le 6 Out 2024 Dokter Gedeon in koz brefman lo bann kalite prodwi ki pa bon pou lasante me ki piblik pe konsonmen. E enn bann rezon ki sa pe arive ozordi Mr Speaker, se aköz dimoun pe priyoritiz son depans par aste

dapre son mwayen dan son pos, menm si i konsyan ki sa komodite pa en meyer swa pour son lasante.

Mr Speaker, annou pa bliy sa ki pe konplent son bil delo ek elektrisite aköz tarif in ogmante. An plis annan pe pey *PMC* ant R851 a R1500 repeyman zot twatir lakaz pour anpese ki delo i koul dan son zorey, avek sa pti larzan Sekirite Sosyal.

Roche Caiman problemn karya ki pe detri lankadremman lafnèt ek laport bann lakaz *semidetached*; pansyoner i ganny difikilte pour ganny en manm fanmir pou garanti zot sa pti *loan* avek *HFC* aköz sa manm fanmir dan sa lakour, i deza annan en repeyman *loan* ki i pe peye par en lot labank.

Par kont bann ki kalifye pou al anba *Scheme* Renovasyon Lakaz ki Gouvènmman Lokal in antreprann resanman nou ti ganny sans tann Mr Kevin Perine Sekreter Prensipal kot Gouvènmman Lokal dan en sesyon kestyonn term pase dan Lasanble, kot in eksplik nou sa long prose avan ki en pansyoner ou en endividi ki kalifye anba sa *scheme* pou renovasyon lakaz pou bezwen swiv avan i kalifye e ganny ede.

Mr Speaker, e pou bann distrik ki zot zabitan pe esper *PMC* pou aranz sa bann *roofing tiles* parey dan mon distrik Roche Caiman, zot pou konpran sa long prose osi pou renovasyon twatir, sa bann lakaz kantite letan i pran pou travay konmanse.

Se selman atraver presyon sorti kot mon lofis, ki resanman mon pe vwar travay pe bouze lo serten ka, tel parey Mr Sonny Mathiot enn mon pansyoner ki lo lalis pou espere en pe letan. Sa trenn lipye pou fer keksoz bouze, pe zis fer dimoun fristre e strese avek sa problem ki kontinyelman tarde pou war keksoz ganny rezourd. Sa bann traka pe osi kontribye pou lasante mantal nou bann dimoun.

Mr Speaker, Roche Caiman nou bann dimoun aze i aktiv vreman aktiv e zot kontan al zot lanmes, partisip dan bann aktivite sosyal aköz i en sans pour zot sorti kot lakour, detann, al degourdi lipye e zwenn zot bann zanmi. Par kont i annan pou rezon lasante fizik pa permet zot kapab servi souvan bis piblik e souvandfwa zot bezwen pey en transpor prive pou deplase kot lakour.

Me avek sa pti larzan sekirite sosyal i bezwen revwar

e priyoritiz son deplasman kot lakour. I annan i dir i selman kapab fer son deplasman- i selman kapab al son lanmes dan kanton. Oubyen i bezwen esper per ler i vin donn la konmnyon dan kominote. I annan i deplase pou li al war son randevou dokter ouswa ler i tonm malad. E i annan nou bann dimoun aze ki dir ou zot bezwen rod demars en transpor, ler zot al fer zot konmisyon le mwan e zot bezwen enkli li dan zot depans bidze lo sa pri Sekirite Sosyal.

Sa ki annan son problem lasante i bezwen trouv en pti larzan dan sa napa, pour li rod en dezyenm lopinyon, ouswa al kot en klinik prive pou byennet son lasante. E mankman resours dan bann sant rezyonal, i limit kantite servis ki ti napa ganny donner dan kominote par nou bann profesyonnel lasante, espesyalman kot lakour kot i tous nou bann dimoun aze.

Mr Speaker, servis ki souvandfwa nou tann ganny dir nou bann dimoun aze i benefisyse avek, pa pe mars parey i merite. Dan bann distrik, dan bann vizit kot bann lakour, *United Seychelles* pe tann bann dimoun aze ek zot zanfan kot pe partaz zot

soufrans akòz zot telefonnen parti telefonnen kot bann lazans konsernen, pou rod serten lenformasyon ouswa en larepons pour en serten konsern ki zot in avanse, me dimoun nek i fer zot vir an ron.

Home Care Agency i annan anviron 2270 dimoun ki pe benefisyè avèk *service home care* kot lakour. E ziska Zen 2024 parmi en total 72 dimoun aze sorti dan mon distrik Roche Caiman pe benefisyè avèk sa servis. Nou lo sa kote latab nou felisit tou bann *carers* ki pe fer sa bon travay pou donn swen e sipor nou bann dimoun aze.

Par kont pou bann ki pe neglig zot responsabilite e pe fer soufer nou bann dimoun aze, mon demann zot silvouple pou arete e ki lazans i fer li nesesser pour fer bann vizit regilye kot sa bann lakour pou detekte o pli vit posib kot bann ka pe arive.

Mr Speaker, an 2022, ler Lasanble ti aprouv Bidze avèk Lalwa *Home Care Agency* avèk sipor mazorite Manm lo lot kote latab, mon ti enn bann Manm *United Seychelles* ki ti koz fran lo bann defi ki pou swiv akòz Gouvernman, pa ti ankòr pare pou zot kapab met an pratik sa ki zot ti'n kree pou donn sipor nou bann dimoun aze.

Regard ozordi mannyer nou pe tann konplent kantite letan i pran pou en laplikasyon *carer* ganny aprouve. I annan laplikasyon dan mon distrik kot in ganny konplent i annan plis ki 2 mwan, avan ler i ganny en larepons.

Problemm resours imen pou zot kapab fer bann vizit dan bann de letan rezonnab, i ankòr en konsern. Retar dan repeyman kot bann *career* ki'n fek antre. I annan ki vin fer konplent atraver mon lofis e si nou al regard dan sa swadizan *savings* dan revè finansman milye 2023 anba *Home Care Agency* kot ti sorti zot pou vwar mannyer inefikasite, mankman konpetans dan ladministrasyon LDS. Kot larzan ti annan pou resours imen pa'n ganny servi. An rezilta sa bann move desizyon i fer ki i kontinyelman annan retar dan servis sa lazans.

Se dan sa bann fason fer ki montre ki sa ladministrasyon pa pe valoriz priyorite kot i konsern nou bann dimoun aze e annan zot aker. E lo a sa pwen i fer mwan rapel komanter en ansyen Onorab ki'n servi dan sa Lasanble. Sa se Onorab Jean-Francois Ferrari dan sizyenm Lasanble Nasyon. Ler i ti vwar ki i en problemm pou son parti

LDS, akoz ladministrasyon *US* ti pe envestir milyon roupi dan nou bann dimoun aze.

Nou pa bliy son komanter kot i ti dir e mon site « nou pe depans milyon pou akonpany bann dimoun aze, ki pe kit sa later.” Fen sitasyon. Be Mr Speaker, eski nou bann dimoun aze ti tandé? Eski zot bann zanfan ti tandé? Si zot ti tandé, mon demann mon lekor ki manner zot kapab met konfyans avek sa bann tel dimoun dapre dernyen eleksyon.

Mon pa ganny en konpran ki manner zot in kapab les zot ganny anbete. Sa inefikasite dan *leadership* ladministrasyon *LDS* diran sa 4 an, pe fer ki standar e soutenabilite devlopman imen ek sa bann servis pe deteryore e tou keksoz pe retourn an aryer. E si nou kontinyen avek sa bann *leadership* parey, pei pa pou progresse. Pei pa pou avanse, me plito nou pou regrese e pou deteryore.

Mr Speaker, Seselwa in ganny promete en kantite keksoz, e nou bann dimoun aze in parmi ki'n ganny promete plis larzan dan zot pos avan eleksyon 2020, me oli? Zis promes dan vid.

An 2020 sa Msye ki ti promet tou tousala, in pran tou sa ki apel pou zot in zi servi zot pou zot vot. Be sa ki tris dan tou sa, la se nou bann dimoun aze ki pe soufer plis anba Ladministrasyon *LDS*. Zot pos in pli vid ki tou lezot akoz zot pa'n resevwar okenn larzan an plis ki permet zot viv en lavi ki eze. Zot in sey bous lizye serten avek en R500 tanporer, ki pa ni tou dimoun ki ti benefisyé.

An 2020 avan eleksyon, Seselwa ti ganny dir pye dibwa ti pou ganny sekwe e larzan ti po tonbe parey fey anba pye, me oli? Ankor ti zis fo promes! Prezidan ek son bann koleg Minis koman ti antre dan Gouvernman, zot ti don zot lekor gro *allowance* pou lakaz, lenz pou aranz zot ledan, linet pou al fer zot tes klinik prive, lalis i long Mr Speaker.

Nou ti ekout byen ler Minis Derjacques ti fer resorti lo tou sa bann *allowance* ti nouvo. Letan Prezidan ek son bann Minis ti pe byen ekip zot lekor pou pran tou sa ki apel pou zot, personn ant zot pa ti pe mazin sa dimoun aze ki manner li i ti pou trouv larzan pou li aranz son linet.

E Seselwa pa bliye kot resaman zot in anonse, ki zot ankor zot pe al donn zot lekor

ankor la 10 pousan logmantasyon ki deza dan Bidze, logmantasyon i ale avek zot ; *allowance* pa'n ase.

Alors ou sa pansyoner ki pe swiv deba Lasanble Nasyonal ozordi, ou ki ti ganny promet logmantasyon dan kanpany eleksyon 2020 parey LDS e ki 4 an in pase malgre ou pos pa ankor ganny ranpli parey ti ganny dir pou ganny fer dan sa term 5 an.

E resaman se sa menm prometer pti donner, ki'n vin kriy ankor pou dir zot dan son *mini rally* konvansyon *mini rally*, ki i pou donn zot pansyoner logmantasyon 2025 e bann pansyoner zot konnen ki sa i en lot promes lo promes eleksyon ki pe ganny fer avek zot.

Mr Speaker, pa dir mwan ki i pran Prezidan Wavel Ramkalawan ek son bann Minis 4 an - 4 an pou realize ki nou bann dimoun aze pe soufer. Pou 4 an dan sa Ladministrasyon LDS in tres vant sa bann dimoun aze e pep Seselwa san pran okenn pitye.

Letan tou keksoz pri in monte, Seselwa in trimouse toulezour zot in al dormi fatigue, leve fatigue, pa bliy bann ki ti pe espere pou zot al pran zot retret

63 an e prezan zot bezwen esper 65 an.

Me toutfason Mr Speaker, Roche Caiman mon bann dimoun aze i dir mwan dir avek Mr Wavel Ramkalawan, Prezidan ki Dirizan LDS ozordi, sa dimyel ki i pe pas obor zot ver la, pou 2025 la, pa pou geri sa boubou espere dan sa 5 an.

Si Prezidan Wavel Ramkalawan i senser, montre nou. Nou'n ariv Septanm 2024 donn nou bann dimoun aze en logmantasyon avan lannen 2024 i fini.

(APPLAUSE)

HON AUDREY VIDOT

Mr Speaker, pep Seselwa in deza tann Mr Wavel Ramkalawan kriye byen for dan enn son bann rankont politik e mon pou site ki i ti dir-

“Sa bann politisyen ki double zot lapey, sa bann politisyen ki ganny tou keksoz fodre pa ki politisyen li i met li lo en klas la anler e regard anba lo pep Seselwa.” Fen sitasyon.

Be Mr Speaker, eski Mr Wavel Ramkalawan sa letan ti senser dan son parol ki i ti pe prese? Akoz sa bann kalite propagann, i ganny fer zis par bann fo profet. Seselwa ti

konfye dan li pou li pratik sa ki i pe prese la ozordi.

I oule fer krwar Seselwa ki li ek son lekip, zot annan nou bann dimoun aze aker. Nou bann dimoun aze fodre pa ki zot les zot tonm ankor dan okenn sa bann pyez. Zot oule fer Seselwa fer krwar ki zot, zot annan leker pou nou bann *carers* e nou bann *carers* fodre say sa ros aköz zot pou ganny kraze. Aköz 2025 pe aproz.

Leadership LDS ek son tim, in telman dekonekte avek pep Seselwa, prezan zot krwar Seselwa pou konfye zot ankor avek zot bann fo promet e osi vin anbet zot pou donn zot pas dimyel lo logmantasyon 2025.

Se tou ki *LDS* i bon pou fer, fer promes larzan avan, i fer sir ki i pran tou sa ki apel pou li. Mr Speaker, 4 an in pase nou bann dimoun aze ankor pe rode ki mannyer i kapab sitye li dan sa slogan “Sesel Pou Tou Son Zanafan” apre ki in asize lo en *bus stop* kot bis pa pase.

4 an in pase i pe viv ek regre pou fer ki *LDS* son Gouvernman ; 4 an in pase sa loportinite pou viv en lavi pli eze koman en Seselwa in fini les tonbe. 4 an in pase la i pe ganny dir esper 2025 pou ganny son logmantasyon, selman sa ki pe

dir li espere la i pe al pran ankor tou sa ki apel pou li.

Yer mon'n tann en Manm *LDS* dir ki en sosyete i ganny zize par lafason ki i tret bann ki vilnerab. Alors ou sa dimoun aze ki pe swiv sa ki pe pase dan sa pei ozordi, anba ladministrasyon *LDS* eski ou kontan e fyer avek tretman ki ou pe gannyen ozordi anba Ladministrasyon *LDS*?

Eski ou pe ganny touse direkteman avek servis ki ganny ofer dan en dele letan rezonnab? Mon kit sa bann pwen koman refleksyon pou zot e mon pou envit mon bann koleg pou zwenn mon dan sa deba e vwar kote ankor ki pa pe marse menm si Polisi pe egzize, ki byennet nou bann dimoun aze i ganny respekte e nou demann Gouvernman pou fer le neserer pou nou bann dimoun aze viv dan plis dinyite par fer sa Polisi vin pli relevan pou nou bann dimoun aze ozordi.

E mon kont lo sipor mon ban koleg pou vot an faver sa Mosyon. Mersi Mr Speaker.

MR SPEAKER

Mersi Onorab. Mon a pas laparol Onorab Gill.

HON CHURCHILL GILL

Mersi Mr Speaker. Bonzour pou bann dimoun aze sorti Roche Caiman, bonzour tou dimoun ki pe ekout nou enkli Manm Lasanble.

Mr Speaker, sa Mosyon i en Mosyon ki egzize ki Seselwa an zeneral i fer en bon refleksyon lo sa Mosyon, akoz i tous zot sa group dimoun direktman dan tou sa ki zot fer.

Mr Speaker si i annan en group dimoun ki bokou sosyete atraver lemonn i fer sir ki zot dinyite i ganny prezerve sirtou ler zot laz in avanse zot pei e Gouvernman respektif o pouvwar i fer sir ki zot viv dan konfor rezonnab.

Annan tou neseler debaz pou zot viv dan lentegrite, ganny en pansyon konvenab ki reflekte relativman anliny avek nou pri lavi dan pei respektif. Sa se bann dimoun aze. Se zot konn kontribye pou batir nou pei apre ki zot gran paran in ale. Se zot ki bezwen travay dan lepok kot ti napa teknolozi e tou keksoz ki preski mannyel.

Se zot ki'n bezwen fer fas avek sa mizer ki bokou Seselwa aze in konnen e koz lo la souvan. Se bokou parmi zot, ki'n bezwen fer bann travay ki tre fizik pou zot met manze lo latab zot fanmir.

Ler desizyon pou ogmant larzan pansyon sorti 63 an pou monte pou vin 65 an, eski sa bann dimoun ki ti aprouve ti pran kont ki kalite travay ki serten dimoun aze ti pe fer dan sa letan ler zot ti zenn? E ki lenpak zot kalite travay ki zot ti fer in annan lo zot kondisyon lasante ler ki nou pe dir sorti 63 an pou mont 65 an?

Mr Speaker, prenon kont tousala eski sa group dimoun pa devret ganny rekonnet? Pour tou sa ki zot in fer pou nou pei Sesel. Eski sa group dimoun pa devret ganny respe neseler? Eski sa group dimoun pa zot bezwen ganny pran swen avek? Eski sa group dimoun pa bezwen ganny rekonnet dan en fason serye?

Kot sa bann bezwen e neselerite i ganny mete a zot laporte, pou zot viv en lavi akseptab ki zot satisfe pandan zot bann dernyen letan avek nou.

Mr Speaker, ozordi dan Sesel i devret annan en lankadremman an term Polisi, ki pran kont bezwen e neselerite nou bann dimoun aze dan en fason tre konpreansiv. E menm lankadremman sa bann dimoun ki travay dan bann *home* avek nou dimoun aze. Pour ki servis kot bann *home* i a la oter

toulezour. Pou asire ki sa group dimoun i kontinyen viv dan lape, dan trankilite e dan lazwa de viv.

Mr Speaker, ki nou vwar ozordi? Avek Gouvernman *LDS* o pouvwar an 2020 zot ti promet pou amelyor lavi dimoun aze, an promet zot serten logmantasyon lo pansyon ki zot gannnen. E sa ti en garanti ki Gouvernman *LDS* ti donner avan 2020; me la an 2024 dimoun aze pa'n gannnen ogmantasyon. Sa i en gran mank respe pour nou bann dimoun aze.

Anbet zot avek gran promes pou ganny vot, apre kit zot ater pou fer fas avek tou sa bann pri komodite debaz ser avek selman en saler 5,750.

Mr Speaker, eski sa i en fason pou tret nou bann dimoun aze? Par anbet zot e lev zot ekspektasyon, san okenn konpasyon pou zot. Gouvernman *LDS* ti annan loportinite pou donn sa logmantasyon, si zot ti vreman senser e annan volante pour fer li.

Nou'n tann bokou koze dan sa plizyer *SONA* ki'n ganny fer. Dan sa 4 Bidze ki'n ganny prezante avek Lepep Seselwa pandan sa dernyen lannen, nou pa'n trouv okenn alokasyon pou

ogmantasyon pou dimoun aze, me selman byen boner apre ki *Cabinet* in konmans fonksyonnen, nou'n war serten *allowance* ganny donner plizyer sonm larzan pou bann Manm Egzekitiv pour zot konfor ek benefis personnel.

Akoz zot pa ti fer parey pour nou bann dimoun aze? Vi ki zot al dan menm laboutik pour zot konmisyon parey tou dimoun. Ki mannyer alor nou espekte ki sa group dimoun zot viv dan dinyite?

Mr Speaker, pandan *recess* mon'n al vizit *Old People's Home* ki baze Grand Anse Praslin, pou vwar ki mon menm leta kot zot ti pe reste e la fason ki zot pe viv e pran swen avek zot. Zot in eksplik mwan zot dilenn ki zot fer fas avek. Parey mon'n dir zot ganny en saler R5,750. Ladan zot pey 2,600 avek *Home* e ladan 500 pour pey serkey ziska ki i ariv en sonm R15,000. En sonm R2,100 pour zot manze, delo, elektrisite e zot akomodasyon e lezot keksoz ki zot bezwen lo en baz personnel.

Menm si zot pey sa bann keksoz, bokou zot pe bezwen aste zot komodite netwayaz dan sa saler ki reste zot ki en sonm R3,100. Menm si zot pe kontribye zot osi annan en

konsern manze ki tre serye. Zot repa pa konvenab an term varyete. Zot manze pe ganny repete menm kalite a plizyer fwa dan lasemenn, *weekend* menm zot *breakfast*.

Avek sa problemn manze, zot vwar zot bezwen aste manze dan zot pos pou zot kwi zot menm, menm apre ki zot in fer zot kontribisyon. E Praslin tou dimoun i konnen ki pri komodite i bokou ki pli ser ki Mahe. Pa fini Mr Speaker, dapre lesplikasyon ki mon'n gannyen, zot konsern manze se ki i pran bokou letan pou konmisyon ariv kot *Home* akoz i tarde pou ganny aprouvasyon par lofis Mahe.

Sa se bann dimoun ki reste dan *home* ki mon'n vwar zot lakaz par lakaz, ki'n donn mon sa bann lenformasyon. Problemn mentenans kot *Home* i osi en konsern serye pou sa bann rezidan. Bokou landrwa i koule e pa ankor ganny adrese i devret ganny adrese dan en fason imedyat.

Ozordi en *carer* ki pe travay avek plis ki 2 dimoun zot ganny en saler *carer* avek en *allowance* R700 pour bann *carer* ki travay avek plis ki 2 *carer*. Eski rasyonnal pou donn sa *allowance* i zistifyab pour sa bann dimoun?

Mr Speaker, eski sa i akseptab? Eski sa i lafason pou tret nou bann dimoun aze? Eski sa parey yer ti ganny dekrir ler fe i ganny met devan konman politik bon marse? Oubyen bann fe konkret pou la fason ki *Home* pe ganny zere. Sa i la fason ki nou dimoun aze pe ganny trete dan *Home* Grand Anse Praslin.

Mr Speaker, mon repete swa *Management Home* i bezwen revwar Polisi oubyen revwar lankadremman travay fason ki bann *carer* pe ganny trete dan *Home*. Akoz parey nou konnen i responsabilite en Gouvernman en pei, pou asire ki i annan serten keksoz debaz ki nou group dimoun aze i bezwen zouir dan zot bann dernyen zour.

E sa i enportan pou asire ki sa bann dimoun i ganny rekonnet avan ki zot kit nou ler zot letan in arive. Alors i enportan ki tou sa bann keksoz ki pe ganny dir ziska konmela, e pour ganny kontinyen dir sa Lasanble, i ganny konpran ki nou pe koz ki fason nou tret en group dimoun dan nou sosyete ler zot laz in avanse.

I napa naryen pou fer ek politik bon marse. SE bann fe e bann realite ki ozordi i devret ganny adrese enn fwa pou tou

pour ki sa bann dimoun a kapab viv dan lentegrite e zot lasante trankilite e tou keksoz i ganny preserve a tou pri. Mersi Mr Speaker.

(APPLAUSE)

MR SPEAKER

Mersi Onorab. Mon a pas laparol Onorab Uranie.

HON ROCKY URANIE

Mersi Mr Speaker, bonzour tou koleg Onorab, en bonzour spesyal pou tou nou bann dimoun anler dan galeri.

Mon pran laparol pou mwan pa mank sa sans pou siport nou dimoun aze atraver Mosyon Onorab Vidot, ki'n met son demann devan Lasanble, ki pe demande ki Gouvernman i fer le neserer nou bann dimoun aze i viv dan plis dinyite.

Dinyite imen ki swa i nou sitwayen ou non, i en prensip fondamantal mon parti *United Seychelles* ki'n toultan fer sir ki tou imen i ganny sa respe, osi ganny apresye dan son pei Sesel i annan lotonomi pou fer e pran bann bon desizyon dan zot lavi.

Mon frer e ser Seselwa, dan bann diferan lenstans kot pei ti organiz bann aktivite ki swa sosyal, kiltirel,

edikasyonnel, sportif e relizyez, dimoun aze ti partisip aktivman e partaz zot pwennvi dan en latmosfer detant san presyon e stres.

Anba *United Seychelles* zenn koman vye, tou ti ganny sa respe neserer. Lanfaz Mosyon i lo nou bann dimoun aze, nou bann retrete. Nou bann dimoun aze apre plizyer lannen, zot in rente, eskente, travay dir dan devlopman nou pei, pou fer Sesel ariv kot i ete ozordi, i enportan ki nou montre nou lapresyasyon, konpasyon e respe anver zot. I enportan pou montre zot ki zot en kous nou popilasyon ki vreman, vreman enportan e nou kontan pou annan zot parmi nou. I enportan ki nou donn nou langazman pou asire ki ler zot pe retrete zot fer li dan dinyite.

Pou sa arive, nou Gouvernman ti met plizyer striktir an plas spesifikman pou ofer servis e sipor pou nou bann dimoun aze. Nou ti fer sir ki zot garanti en Sekirite Sosyal, en larzan ki garanti pou zot tou, tou le mwan pou ed zot kapab annan lotonomi finansyel ; pouvwar *d'achat* zot kapab aste zot prop manze, lenz, pey zot bil zot menm, san ki zot bezwen al mandyan parey nou vwar dan

plizyer pei kot i vreman fer lapenn.

Nou bann dimoun aze e sa group larsitek nou Sesel modern. Akoz mon dir sa, akoz e zot ki'n pas bann bon valer, byen elve nou bann zanfan enkli nou menm ki la anndan, ki'n fer nou vin bann Dirizan dan nou zoli pti pei Sesel.

Mr Speaker ptitapti nou ban dimoun aze pe santi ki zot pa pe ganny sa lankadreman parey i fodre e zot pe *struggle* pou kapab viv byen pou plizyer rezon. Tou le lannen nou bann dimoun aze ti ganny en pti ogmantasyon, pou asire ki zot Sekirite Sosyal i kontinyen monte, pou zot kapab aste, zot annan bezwen nesese e osi pey bann servis ki nesese ki zot bezwen.

Ki mannyer keksoz i ete konmela ek sa sityasyon kou lavi ki tre o, nou bann dimoun aze pe pas dan plizyer difikilte pou viv sa lavi konvenab. Zot trakase, traka krim, vyolans, labi, traka finansyel, lalis i long.

Lavi in ser, tre ser e La Digue i pli ser ankor ki partou. Prezan sa granmanman sa granpapa dan sa napa, i vwar li pe servi son larzan pou ed son zanfan ki pa pe kapab fer 2 bout zwenn.

Nou dimoun aze ki vwar zot bezwen al klinik oubyen lopital, i bezwen pey en taksi pou vin sers li e retourn ek li se li a plizyer repriz ki en fwa dan en mwan. Akoz zot pa kapab mars lontan e zot pa kapab mont bisiklet e sityasyon nou semen ki'n deplorab sirtou lo La Digue.

Alors zot war zot oblize pou pran en transpor pou akse servis lasante. E tousala zot bezwen peye i vin lo sa pti larzan ki zot gannyen. Lanbilans pa fer kours si pa *emergency* e parfwa menm ler *emergency*, lanbilans i tarde e la en transpor prive parey mon dir i bezwen fer sa kours e sa i pa gratwit.

En sistenm lanbilans La Digue ki nou bezwen *call* par Mahe pou kapab donn lord La Digue pou lanbilans al sers dimoun. E nou'n vwar detrwa fwa kot in arive kot sirtou bann touris in mor, lanmenm dan bor semen akoz pe esper lanbilans. 151 par Mahe me lenformasyon i tarde e menm avan ler lord i ganny donner pou lanbilans deplase, zot komans demande si sa kliyan i konnen i bezwen pey lanbilans?

Alors zot pli vomye swiv prosedir, met prosedir premye dan plas vin rezourd sa

problemm *emergency* donn sa servis sipor ki dimoun i bezwen.

Mr Speaker, laz ki nou bann dimoun aze i annan, zot lekor i bezwen bann fortifyan. Bann manze ki bon pou tenir zot lekor pou anpes zot ganny bann maladi ou byen devlop ban maladi.

Mr Speaker, mwan mon annan mon paran i annan 84 an e mon vwar sa sityasyon toulezour, kot li i *struggle* toulezour son bann kalite manze ki i manze i pa parey pou nou. E menn lafason ki ou kwi i dir ou kwi dan sa fason, aköz se sa fason ki i kapab manze.

Ankor Mr Speaker, sa bann manze ki vreman bon pou zot lekor i vin avek en kou - i pa bon marse. I bann manze ki tre ser avek sirtou lo zil kot nou war komodite pri i bokou, pli li o ki lo Mahe e Praslin.

Mr Speaker, nou bann sitwayen aze, i bann dimoun ki tre vilnerab fizikman e osi mantalman. Fodre pa ki nou servi zot e promet zot bann gro sonm, zis parey ti ganny fer dan kanpanny politik pou nou vin o pouvwar apre bliy zot.

La ler bann dimoun aze pe dir ki zot in ganny ase avek sa bann bater latet, Prezidan lavey eleksyon i dir ki i pe al ogmant zot larzan. E menm i envit zot

manze *State House* en keksoz ki zot ti *boycott* ler ti ganny fer par Gouvernman avan.

Sak fwa nou bann Manm *United Seychelles* ti anmenn bann kestyon pou ouver lizye lespri Seselwa, ki nou vwar sa Gouvernman ki o pouvwar bann Manm lot kote, ti toultan gognarde e rikannen zot pa ti oule koz an faver nou bann dimoun ki vilnerab dan pei.

Lavi in vin pli difisil e preski enposib pou en dimoun ki dan bezwen ganny led, aköz dapre zot sa bann dimoun pe vin abiz sistenm. En lalis form pou ranpli, bann dimoun ki dan bezwen i dekouraze, zot pli sey fer bann lezot louvraz pou ganny ankor en pti mwenz pou siport zot lekor e zot fanmir.

Ler sa paran i absante aköz i bezwen fer 2 louvraz, parfwa zanfani i ganny neglize e la bann lezot dekadans sosyal i anvair nou pti kominote; lekol, problemm disiplin nou vwar partou zanfani pe lager lo semen, partou anba *bus stop*, krim i ogmante e sa i sorti mal lo nou pei.

Bann paran ki sanse zot ana en dimoun aze dan lafanmir, ki parfwa zot pran responsabilite sa bann zanfani. Me ou kapab mazine ki i pa en keksoz fasil pou tou nou bann

dimoun aze vey byen sa bann zanfan, ki antoure ek tantasyon e bann *social ills* ki annan dan kominote.

Nou bann *carers* ki pran ka avek nou bann dimoun aze zot osi zot pe pas atraver bokou difikilte parey nou dir *who cares for the carers?* Nou war zot osi kot saler i tre ba. Yer Mosyon ti ganny anmennen pou malad mantal, me sa kalite sityasyon ki nou pei i ladan byensir dimoun pou devlop plizyer malad mantal.

E mon kontan yer ler mon ti tann en Onorab pe dir ki *SBC* i bezwen re anmenn sa bann vye program pou eksplik dimoun, pou fer dimoun konpran serten keksoz ki annan pou fer avek malad mantal. I vedir ki nou pa ti en kales kase parey zot ti dir ti annan keksoz ki nou fer byen.

Sa parol kales kase ki zot ti dir in vin en malediksyon pou zot menm e la mon pa konnen kalite kales ki zot pe aranze, byento si naryen pa ganny fer dan kales pou annan Lerwa, Larenn, Prens ek Prens ki annan malad mantal.

Mr Speaker, La Digue en madanm i *call* mwan i dir mon son linet in pare, son linet i Mahe, me i pa pe kapab ale la

akoz napa finans pou al Mahe ok? Napa finans pou ariv *Mahe*.

Me zot, zot in vin o pouvwar zot annan tou zot *allowance* tou, ledan, linet, *you name it* - zot in pran tou sa ki apel pou zot les nou bann dimoun aze lanmenm ater. Mon swete parey Onorab Vidot in dir...

MR SPEAKER

Sorry mon *mic* in *off*. Mon a repete bann Manm, silvouple evit bann mirmirasyon - permet sa dimoun ki pe koze fer son *speech* kler. Mersi.

HON ROCKY URANIE

Mon'n byen dir Mr Speaker...

MR SPEAKER

Onorab, sa i enkli ou osi.

HON ROCKY URANIE

Mon'n byen dir Mr Speaker. sak fwa nou koze nou pe dir keksoz pou siport nou dimoun lot kote zot kontan gognarde e rikannen.

Me apre zot menm lavey eleksyon pou le pas kot nou bann dimoun aze pou al sey bat latet sa bann dimoun ankor.

Mon swete - mon swete ki demann ki Onorab Vidot in fer, pour ki Gouvernman si vre i serye, i ogmant lapey nou

dimoun aze avan sa lannen 2024 i fini. Demen pou annan lanons ki pou ganny fer e mon ti a swete ki dan sa lanons sa i vin enn parmi lo azanda.

Mr Speaker, avek sa 2 pti mo mwan, mon pou donn mon sipor Onorab Vidot pour ki nou bann dimoun aze i ganny zot bann merit pour zot kapab viv dan dinyite. Mersi Mr Speaker.

MR SPEAKER

Mersi Onorab. Laparol pou Onorab Gabriel.

HON CONRAD GABRIEL

Mersi Mr Speaker. Bonzour tou dimoun, espesyalman bann dimoun Roche Caiman dan Galeri. En gro *welcome* dan nou Lasanble.

Dabor, mon ti a kontan felisit loter Mosyon pou pran en tel linisyativ e anmenn en Mosyon pou ede soulaz lavi sa group dimoun ki pe pas dan en peryod vreman difisil e trakasan dan nou pti pei. Tou dimoun *by now* in ganny en konpran ki mannyer sa Gouvernman *LDS* i fonksyonnen.

Mr Speaker, bokou in ganny dir dan lepase lo size nou bann dimoun aze. Me malerezman, e mon kapab dir fortman, ki napa naryen ki

konkret ki'n ganny fer pour nou bann dimoun aze viv dan plis dinyite. Problem i bokou. Me tre pe solisyon lo lapar Gouvernman. Zot ti kriye byen for “nou ki pe *run border*”. Be la prezan, *border* ki pe *run* zot.

(APPLAUSE)

HON CONRAD GABRIEL

Loter Mosyon in koz lo sa zafer *carer* ki in vin en vre kosmar. I sagrinan kot bann senp keksoz in vin pli difisil ki zanmen. Ou a krwar sa swadizan sanzman, kot prezan in vin en transformasyon, in met retar dan tou keksoz.

Lo sa kote latab nou'n anmenn bokou kestryon e menm plizyer *PNQ* pou fer lavwa bann dimoun aze ganny tande. Me ankor enn fwa, i montre ou ki sa Gouvernman i senpleman pa enterese ek sa group dimoun ki'n anmenn bokou kontribisyon pour Sesel ariv kot i ete ozordi.

Bokou sakrifis in ganny fer Mr Speaker, kot nou bann vye dimoun in trimouse e travay dir pou sonny zot fanmir. E sa nou bezwen rekonnet.

Mr Speaker, i devwar Gouvernman pou asire ki nou bann dimoun aze i viv dan

konfor e ganny sa respe ki zot merite. Eski sa pe arive?

Pandan *recess* mon'n fer li mon devwar, kot mon'n ganny sans pas kot serten nou bann dimoun aze dan distrik. Kot la mon'n ganny sans dekouver soufrans sa bann dimoun.

Mr Speaker, i enportan note – ou ti ganny ou sekirite a laz 63 an. E prezan ou Gouvernman in fer monte par 2 an. I fermal pour bokou dimoun, espesyalman bann ki pe al ganny zot 63 an enn ou de zour apre ki lanons ti fer. I montre ou klerman ki sa ki annan pou reste annan. E sa ki napa pou touzour napa.

Annou realis dan nou lapros lo sa size pansyon pour dimoun aze. Lontan ler nou sitwayen ti ganny 63 an, son pli gro kado sete sa pti larzan pansyon ki i ti pe al kolekte. Bann ki pa ti kapab fer li ti anvoy swa zot pti zanfan avek zot kart idantite. Son *carer*. Oubyen son konpanyy oubyen son msye. Anfen, setaki ti kapab fer en pti *shopping* lemwan.

Ozordi sa laz 63 an in vin en zour dey. *Fridge* i vid. Pti zanfan i get ou lizeye blan pou al lekol, e sa 2 an i tro lwen pou espere.

Annou mazin byen ki an *France* ti annan en gro revolt lamars ler reform pansyon sorti 62 an pou al 64 an ti anonse. Bokou protestasyon par bann Franse kot ti koz bokou dezord partou atraver *La France*.

Nou Seselwa, nou'n reste trankil aköz nou konnen byento vre solisyon pou arive e sa set avek en Gouvernman *United Seychelles*.

(APPLAUSE)

HON CONRAD GABRIEL

Dokter Herminie in dir ki i pou revwar sa reform e gete kote bann dimoun aze i a kapab benefisyé. *En d'autres mots*, i pe mazin ogmant sibvansyon pour bann mwen fortinen dan sosyete. E an fezan sa, fer desann pri lavi.

Se sa ki Gouvernman *LDS* ti devret mazin lo la seryezman si zot anvi redonn sa bann tonton, tantin zot dinyite parey ti ete dan leparse.

Nou pa pe dir organiz parti *State House* tou le, le 15 Mars. Non. Nou zis oule dir zot donn en pti *supplementary budget* dan pos sa bann dimoun ler in ariv lafen dimwan, pou zot kapab tenir lo zot de lipye ziska prosen peyman pansyon.

I montre ou klerman ki sa group dimoun in ganny kit ater e pe soufer an silans. Sa bann lenstitisyon ki ti'n ganny met an plas dan lefase, in kas kase e dimoun nepli konnen ki manner pou fer 2 bout zwenn.

Fanmir nepli parey avan. Divizyon in pran plas e i annan plizyer fakter ki'n fer sa arive. Enn parmi se politik. Zot a dakor ek mwan ki zafer politik in kas bokou fanmir e anmenn bokou divizyon antre frer, ser, tonton, tantin, manman, papa. Zis pou nonm enn de.

Mr Speaker, ler sa i arive, nou bann dimoun aze pa kapab viv dan sa dinyite ki zot ti a anvi. Mr Speaker, bokou zot i annan bann problem medikal kot nou vwar zot pe pey transpor pou deplase pou al klinik oubyen lopital pour zot apwentman panse e lezot ankor. Sa i met bokou presyon lo zot.

Gouvernman dizour pa'n onor son langazman anver sa group dimoun, e sa in anmenn bokou fristrasyon e lanmertim. Bokou zot pe esper 2025 pou koriz sa fot ki ti arive le 20 Oktob ,kot bokou promes ti ganny fer pou amelyor lavi sa pep.

Eski lot kote latab zot vremen senser ek bann dimoun

ki'n elekte zot? Si wi, silvouple zwenn nou pou rod vre solisyon pour bann problem.

Mr Speaker, atraver ou, i nepli letan pou vin zve politik ek vant dimoun. Silvouple, donn sa bann dimoun aze zot pansyon a laz 63 an. Sa omwen i a ed zot *enjoy* zot retret dan lazwa e viv dan dinyite ki zot merite.

I enportan note ki pri lavi in desot plafon. Bokou nou bann dimoun aze – mon repete Mr Speaker, pe pas dan bokou difikilte pou fer 2 bout zwenn. I vremen malere. Nou bezwen a tou pri met an plas bann mezir pou soutenir nou bann dimoun aze o pli vit posibil.

Lo mon kote, mon pou ed mon bann zabitan Point Larue. Mon lans en lapel ek Gouvernman pou entrodwir sa prensip alfabetizasyon pour nou bann dimoun aze. Rikord i prouve ki i ti en sikse. I pa'n zanmen tro tar pou aprann. Nou annan bokou dimoun aze ki ti a kontan kontinyen develop zot nivo akademik moral e menm mantal.

Lontan bann msye ek madanm trwazyenm-az ki ti partisip dan Programm Lalfabetizasyon e ki ti reisi, ti kapab anvoy en pti let, en kart.

E la nou'n modernize e pe

servi plis teknolozi atraver telefonn pou anvoy en mesaz pour zot fanmir dan pei deor parey *Italy, La France, Langleter, Lanmerik, Canada, L'Allemagne*, eksetera, dan sa bon langaz Angle, Franse ou Kreol.

Lo sa pwen i enportan note ki se gras a 43 an ki Sesel in ariv lo sa nivo. In pran *LDS* zis 4 an pou detri tou. I annan *ex teachers* ki *still* pare pou ede e landrwa i annan kot distrik. Zot ti lager lebra kase pour *delinking*. Me la tou in ganny *relink*. Tousala Mr Speaker letan lontan. *Goodbye, so long*.

Selman mon bann frer, ser letan pe aproz, e tre byento nou pou konn nou grander. Dimoun i a sorti dan sa lakaz ki depi 2020 lavi in vin en kosmar anba sa ladministrasyon *LDS*.

Mr Speaker, ou a dakor ek mwan ki nou bezwen kontinyelman edik nou pep. Byensir nou pou bezwen fer li konzwentman avek Minister Ledikasyon, Gouvernman Lokal e lezot antite.

Mr Speaker, sa i a ede akoz ladministrasyon i oule fer tou keksoz *digital* e *cashless*. Si nou pa konmans la, sa group dimoun pou ganny kit ater e ironikman reste *cashless*.

Avek sa 2 mo, mon ti a kontan asir Onorab Vidot, sel opsyon pour Roche Caiman, ki mon pou donn li mon *full* sipor, kot i pe demande ki Gouvernman i fer le neserer pour nou bann dimoun aze viv dan plis dinyite. Mersi.

(APPLAUSE)

MR SPEAKER

Mersi Onorab. Mon a fer remarke ki mon napa dimoun lo mon lalis e mon pe – bon, mon a donn laparol Onorab Cosgrow.

Selman mon pe dir bann Manm, mon pa oblize anonse poudir napa dimoun ankor pou koze. Mon kapab apel lo en vot lo Mosyon. Alors pa bezwen – apre i annan Onorab Spiro wi ki'n segonde. Onorab Cosgrow, mon a donn ou laparol.

HON WALLACE COSGROW

Mersi Mr Speaker. Bonzour Mr Speaker. Bonzour tou Manm Onorab. Bonzour tou nou bann envite dan Galeri anler sorti distrik Roche Caiman. E bonzour tou manm piblik ki pe ekout nou ozordi bomaten.

Mr Speaker, ler mon pran laparol bomaten mon ti a kontan dabor remersye e felisit mon koleg Onorab Audrey Vidot

Manm Elekte pour distrik Roche Caiman, pour sa kouraz e sa linisyativ ki in pran ozordi pou anmenn en tel Mosyon.

Mon krwar si nou asize nou fer serten refleksyon, nou pou war ki sa Mosyon i en Mosyon ki annan son merit e ki annan son valer, anvi sityasyon ozordi parmi group bann dimoun pli aze dan Sesel.

Si mon kapab Mr Speaker, an konmansman, readapte en kotasyon dan en sans kot ki koz lo bann group dimoun pli vilnerab e bann dimoun ki en pti pe sa ki nou apel *helpless* dan lasosyete.

I annan en kotasyon ki dir “en sosyete i ganny mezire ouswa i ganny regarde, dan lafason ki i tret bann dimoun ki pli vilnerab dan sa lasosyete”.

E mon krwar i osi adapte avek – si nou ti kapab adapte li osi avek lafason ki en sosyete i tret son bann dimoun aze, son bann sitwayen ki'n ariv en serten laz. E ki ozordi zot in pran zot retreat e zot pe zwir zot lavi, zot bann letan ziske nou tou konnen ki arive.

Mr Speaker, sa i enportan akoz lafason ki lasosyete i tret sa kategori dimoun parey mon'n dir, i montre ki mannyer nou valoriz sa kategori dimoun, sa group dimoun. E ki mannyer

nou apresye. Nou montre nou lapresyasyon pour bann keksoz ki sa group dimoun in fer pandan bann letan ki zot ti ankor for ki zot ti kapab. E kontribisyon ki zot in fer dan nou sosyete.

Lenportans valoriz sa group dimoun Mr Speaker, i pa zis enn ki nou koz petet sa ki nou apel zis nou dir lo lalev, nou koze e nou zis dir. Me i bezwen annan serten sans, *deep meaning* parey nou dir an Angle, sorti dan fon nou leker.

Akoz sa group dimoun Mr Speaker – mon pou pran en legzanp ; letan mon manman ti pe lekol - letan nou paran ti pe lekol, letan nou menm nou ti pe lekol, zot ti pe travay e zot ti pe kontribye pour ki nou, nou kapab ganny sa ledikasyon, sa lasante pour nou kapab ganny tou nou bann bezwen de baz pour nou ariv kot nou ete ozordi.

E mon krwar i zis, i *fair* pour nou apre ki sa group dimoun in ariv en letan kot zot nepli kapab kontribye, ouswa zot nepli kapab fer sa kontribisyon parey zot ti fer, i zis normal e i *fair* pour ki sa group dimoun i ganny son rekonesans – rekonnèt. E ki zot ganny sans *enjoy* zot retreat dan dinyite.

Ziske aprezan Mr Speaker, pandan 4 an – e mwan mon'n gete, mon'n analize, mon pou dir onnetman Mr Speaker, ki tou sa ki sa Gouvernman *LDS* ozordi pe fer i baze lo bann Polisi Gouvernman *SPPF*, Parti Lepep, *United Seychelles* pandan sa 43 an.

Se bann Polisi ki nou konman en Gouvernman nou ti met an plas pou donn e valoriz sa kategori dimoun ki mon'n koz lo la ; bann dimoun aze, bann retrete, pour ki nou fer sir ki zot viv en lavi dan dinyite. Se nou bann Polisi sa.

Ozordi napa naryen ekstra ki Gouvernman *LDS* in fer pou kapab amelyor lavi sa group dimoun. Ki nou ti fer Mr Speaker? Bann premye keksoz ki nou ti fer, nou ti donn dimoun aze en pansyon retret. I ti enportan sa Mr Speaker.

I enportan ki ler en dimoun i nepli kapab kontribye ekonomikman, i nepli kapab li menm ganny en reveni ekonomikman pou zer son lakour, i enportan ki sa dimoun i pa tonm dan kwen semen. I pa tonm dan lamizer. I pa bezwen al mandyan pour li kapab al ganny son bouse manze. I pa bezwen mandyan pour li ganny en lozman. I bezwen viv dan dinyite.

So, sa enn bann premye keksoz ki nou ti fer Mr Speaker, donn dimoun aze, retrete a en serten letan, en pansyon retret. Nou ti osi set en laz retret Mr Speaker, ki mars ansanm avek sa benefis retret.

Mr Speaker, nou'n fer en bann pake program pour dimoun aze. Lozman desan pour dimoun aze. Dimoun aze ozordi i kapab pran transpor piblik. Retrete, dimoun aze i pran transpor piblik e i pa bezwen peye Mr Speaker. Dimoun aze i pran transpor sorti lo bann lezot zil a en kou sibvansyonnen Mr Speaker.

So nou'n fer en kantite keksoz Polisi, pou valoriz travay ki sa group dimoun in fer pandan bann lannen ki zot ti aktiv, ekonomik. E zot in batir sa pei ki apel Sesel.

Sa sete bann Polisi *United Seychelles*. Polisi en Gouvernman, en parti politik ki santre ver devlopman dimoun Mr Speaker. Pa zis devlopman dimoun ler i pe grandi, i pe travay. Me devlopman e asir dinyite sa dimoun ler in pran retret. Mr Speaker, sa se bann Polisi ki tous leker, ki nob Mr Speaker. Me Mr Speaker, ou pou realize, e bokou Seselwa ozordi in realize ki an 2020 – 2019/2020 ti annan bokou

promes sanzman. E evidaman Mr Speaker, sa group dimoun osi in tonm dan sa pyez promes sanzman. E la Mr Speaker, nou pe koz nou plis ki 12 mil dimoun ki tonm dan sa kategori dimoun aze, dimoun retirete.

Bokou zot in tonm dan sa promes ki pou annan en sanzman an 2020. Me ozordi Mr Speaker, ler ki nou pe koze, nou parti *United Seychelles* pe al konplet 2em letour distrik Mahe. Nou bann letour dan bann distrik ki nou'n fer.

Nou pou konplete *by* lafen sa lannen. 2 fwa nou'n pas devan laport bann dimoun an group. Nou'n fer 2 letour Mahe. *LDS* i ankor pe trennen deryer nou zot. Les tousala.

E pandan sa bann letour Mr Speaker, bann konversasyon ki nou fer devan bann lakour avek bann dimoun aze, nou fer avek tou dimoun, avek bann dimoun aze, bokou fwa nou ganny bann konplent *or* nou ganny bann regre, si mon kapab met li koumsa, ki zot santi o profon zot leker bann desizyon ki zot in pran.

Bokou fwa dimoun i dir ou "mon'n fer en desizyon ki'n met mwan dan pli mal. Mon'n fer en desizyon an 2020 ki ozordi mon pe regrete, aköz mon ti krwar mon pou pli meyer".

So Mr Speaker, promes sanzman an 2020 in vin en kosmar. En vre kosmar pour bokou nou bann dimoun aze. En vre kosmar Mr Speaker, aköz i ti ganny promet pou fer monte son pansyon retrait. Nou tou nou kontan en pti morso larzan an plis. Li osi i ti pe ekspekte en pti morso larzan an plis.

2021? Naryen Mr Speaker. 2022? Naryen menm. 2023 Mr Speaker, naryen menm Mr Speaker. La 2024 Mr Speaker, nou'n tann Prezidan Ramkalawan dir dan son konvansyon – mon pa konnen. Konvansyon *mini rally* ki ti swadizan pli gran ki Anse Aux Pins – *anyway*, dir ki pou dir pou annan en logmantasyon pour bann pansyoner an 2025.

Mr Speaker, nou ti dir nou. An 2025 pou annan en pe dimyel ki pou pas o bor sa ver. Me zisteman la, la. An 2025 Mr Speaker, 21, 22, 23, 24 i pa'n kapab fer naryen pour dimoun aze. An 2025 i vin pas dimyel obor ver e dir ki pou dir pou ogmant pansyon retrait - "Nou pou get nou bann pansyoner an 2025".

Parey mon bann koleg Manm lo kote sa latab in dir, "Nou pe *challenge* li". I annan en *mid-year review* ki pe vini. I

pou osi annan en Bidze Siplemanter posibleman avek sa *mid-year review*. Nou *challenge* li Mr Speaker, met dan sa *supplementary budget!* Donn bann pansyoner zot larzan retret la, la, la 2024!

Si non, anonse, anonse demen dan ou *press conference*. Si non Mr Speaker, sa lanons i tro pti gin e tro tar. I en lanons kot en parti politik, en Gouvernman e en Prezidan i war poudir son semen pe al terminen. E i pe fer tou sort kalite zafer zis pou ganny vot sa group dimoun ki mon'n dir - apepre 12ekek mil dimoun.

Ozordi an 2024 zot in realize ki kantite signifikan sa group dimoun i signifikan ver zot re eleksyon an 2025. Me malerezman Mr Speaker, nou'n fer 2 letour Mahe, Praslin, La Digue devan lakour tou bann dimoun. E mazorite bann dimoun aze ozordi pe dir avek nou ki poudir zot in pare pou al fer sanzman aköz tro bokou promes ti ganny fer, e naryen pa'n ganny delivre.

Mr Speaker, en lot promes ki ti ganny fer – *well* pa neseserman en promes Mr Speaker, me solman dan promes sanzman, petet Seselwa pa ti ekspekte ki laz retret pou sorti 63 an pou vin 65 an.

Bokou landrwa kot mon'n pase Mr Speaker, dimoun i dir avek mwan; “ou konnen mon ti pe *plan* mon retret. Me sa zafer zis i tonm devan mwan koumsa. E ozordi mon war mon dan problemm”. Mon bezwen kontinyen *struggle* ankor 2 an. E si mon deside pran mon retret 63 an, mon ganny pini par *Pension Fund* aköz i pa pey mwan mon pansyon *full*.”

Sa sete bann Lalwa. Sete bann Polisi, Lalwa ki Gouvernman *LDS* ki'n anmennen dan sa 4 an. Se zot ki'n anmennen. E ozordi dimoun aze, retrete pe soufer aköz zot bann Polisi liberal, kapitalis ki pa get dimoun, me i get profi e i get kapitalis premye.

Mr Speaker, me selman ki – ki *LDS* in fer li? In ganny dir boner. Bann premye, premye keksoz ki ti ganny anmenn devan sa Lasanble. Nou ti ankor asiz sakenn en kote.

Bann premye keksoz ki ti'n anmenn devan sa Lasanble. *Allowance* pour Minis, Prezidan. *Allowance* palto. *Allowance* ledan. *Allowance* - tou sort kalite *allowance*. Zot ti donn zot lekor zot Mr Speaker.

Zot ti donn zot lekor. San mazine ki poudir ti annan promes zot ti fer avan 2020.

San mazine zot ti annan promes zot pou sakouy pye e ki tou dimoun. enkli bann dimoun aze ti pou osi ganny sa fri dan sa pye ki zot ti sipoze sakouye.

Be malerezman Mr Speaker, nou tou nou'n espere. Bann dimoun aze in espere. Nou'n debout anba pye. Zot manz tou fri anler dan pye, naryen pa tonbe. Naryen pa'n tonbe Mr Speaker.

An konsekan ki nou war Mr Speaker? Pri lavi i ogmante. E ler mon koz pri lavi mon pa pe koz zis pri manze. La pri manze, pa gete. Pri elektrisite Mr Speaker. Pri delo. Kou elektrisite. Kou delo.

Tou dimoun ki pe ekout mwan la bomaten - tou dimoun aze ki pe ekout mwan la i pou dakor avek mwan ki zot bil elektrisite ek delo in vin en kosmar pour zot. I annan bann ki ti – avan ti annan sa sanzman dan *rate*, ti pe pey par pe, par pe aköz zot ti napa.

Ler in annan sa sanzman, bil in vini in monte. Finalman zot war en nespes bil kosmar devan zot Mr Speaker. Zot, zot in fer monte zot *allowance* zot. Zot, zot pe *plan* donn 10poursan Mr Speaker. Logmantasyon 10poursan pour zot Mr Speaker. Tou sort kalite

– tou sort kalite zistifikasyon i ganny donner aköz.

Me selman nou pa tann okenn dimoun zistifye aköz ki petet an 2021 ti devret annan R500 pour bann pansyoner. An 2022 ti a met ankor R500. An 2023, R500.

Koumsa progresivman zot ti ava war en logmantasyon dan zot pansyon e zot ti a kapab sey servi sa pansyon pou aziste en pti pe avek sa kou lavi. Be malerezman Mr Speaker, napa naryen!

Sa promes par Prezidan Larepublik i tro pti gin e i tro tar! Mon repet ankor Mr Speaker. Be aköz nou, nou pe vin avek sa Mosyon? Aköz Onorab Vidot in vin avek sa Mosyon ozordi e a sa pwen Mr Speaker?

I pa zis en Mosyon pou fer politik, pou demande ki dimoun aze i ganny serten benefis ekstra. Sa Mosyon in vin avek byen kalkile apre ki nou'n ekoute. Nou'n ekout bann dimoun aze apre ki nou'n fer preski 2 letour dan tou distrik Mahe, Praslin ek La Digue, nou'n asize nou'n ekoute.

E enn bann keksoz tre for ki'n sorti se ki lavi ozordi deor la deor pa fasil pour tou dimoun. Me espesyalman pour nou bann dimoun aze ki pe viv lo en pansyon R5 mil 750. Sa

pansyon pa'n aziste Mr Speaker. Petet R5 mil 750 ti kapab tenir zot, soutenir zot a en serten lepok.

Me ozordi an 2024 anmezir nou pe koze, sa pansyon pa pe soutenir en dimoun aze. I pa pe soutenir en lakour 2 dimoun aze Mr Speaker. I pa pe tenir baze lo bann lenflasyon pri ki'n monte. Pri elektrik. Delo. Manze. Servis an zeneral. Lopital Mr Speaker parfwa napa serten latizann. Sa bann dimoun aze i bezwen al rod sa latizann dan klinik prive. I annan diferan faktor ozordi akoz ki sa bann dimoun pe dir ou sa larzan pa ase pour zot viv. Alors sa Mosyon ki Onorab Vidot in vin avek.

Me Mr Speaker, ki promes ozordi mon fer avek bann dimoun aze? E mon asir zot ki i pa pou en promes dan vid. I en garanti sorti kot *United Seychelles* ki sa promes i pa pou en promes dan vid, parey sa promes ki ti ganny fer avek zot an 2020.

Mr Speaker 2025 – le 28 Septanm 2025 ler ki *United Seychelles* i vin o pouvwar, enn son bann premye keksoz ki i pou dil avek ki i pou gete se i pou revwar sa laz pansyon ki sa

Gouvernman in fer monte 65 an. Sa i en promes Mr Speaker.

(APPLAUSE)

HON WALLACE COSGROW

Nou pou revwar mekanizm ki mannyer nou fer desann sa laz pansyon.

E nou, nou pe dir avek bann dimoun ki poudir nou kont lafason ki *LDS* ti fer. I pa'n donn zot letan pou program zot lekor. I pa'n donn zot letan pou aziste. Me nou, nou pou sey rektifye sa Mr Speaker.

Mr Speaker, nou pou osi dan en fason sistematik, revwar pansyon retrait bann dimoun. E sa pansyon retrait i bezwen ganny revwar an relasyon avek kou lavi. I bezwen ganny revwar an relasyon avek kou lavi.

Akoz tou sa bann dimoun i fer *shopping* dan menm laboutik parey mwan avek ou. Zot akse servis dan menm landrwa parey mwan avek ou. Zot viv dan Sesel parey mwan avek ou, parey nou tou. So i zis e drwat pour nou get sa bann dimoun ler in ariv ler pour nou get zot. So sa i 2 promes ki mon fer avek bann dimoun retrait. Bann dimoun aze e bann dimoun ki'n retirete.

Mr Speaker, e en lot promes ki mon fer se ki nou pou

revwar lafason ki bann dimoun aze i ganny trete dan sa pei. Nou pou retourn bann keksoz ki zot ti zwir Mr Speaker letan ki nou, nou ti o pouvwar.

Pou arete sa zafer Mr Speaker ki ler ou pe rod en *carer* ou bezwen esper 2 mwan, 3 mwan. Pa kapab kontinyen sa. En dimoun pa kapab fer son keksoz –

Semenn pase mon pe koz ek en madanm Bel Ombre i dir mwan i ankor pe espere 2 mwan. Sa madanm pa kapab debout devan dife. I pe espere, selman i pe kwi son manze. I pe seye Mr Speaker. 2 mwan.

Se pourtan nou'n kree en lazans – en Lazans *Home Care* ki ti swadizan pou fer keksoz pli fasil, pli vit. E i dedye zis avek *home carer*. Mon pa pe kritik bann *staff* la. En kantite sa bann staf mon konn zot tre byen Mr Speaker.

Me le problem i avek lafason direksyon ki zot pe gannyen Mr Speaker. Direksyon sorti anler menm Mr Speaker. Zot napa en *clear* Polisi. Gouvernman Prezidan Ramkalawan napa en *clear* Polisi stratezi ki mannyer i bouz sa devan. E sa i pa akseptab Mr Speaker. En dimoun pa kapab esper 2 mwan. En dimoun aze

pa kapab esper 2 mwan, 3 mwan pou li ganny en *carer*.

E ozordi en lot konplent lo sa zafer *carer* Mr Speaker, se sa *means testing*. Ozordi zot pe fouy dan tou keksoz sa bann zanfan, sa bann paran, sa bann dimoun. E sa bann dimoun pe ganny dir pou dir “ou konnen ou kalifye *carer*, me solman ou bann piti ki pou peye pour ou”.

San pran kont parfwa ki poudir sa bann zanfan zot osi zot annan zot prop fardo e difikilte. I pa vedir ki ou pa *take care of* ou paran, ou pa anvi. Me lavi i difisil la deor. Tousala i toultour lavi difisil ki Gouvernman *LDS* in kree depi ler in vini 2020 Mr Speaker.

So Mr Speaker, mwan mon pou fini avek en parol ki *Leader* nou parti i dir toultan. E mon pou repete Mr Speaker. Mon pou demann bann dimoun aze pou kit lespwar vivan Mr Speaker. An 2025, sa soufrans ki *LDS* in met zot ladan pou nepli! Mersi bokou Mr Speaker.

(APPLAUSE)

MR SPEAKER

Byen, mon krwar nou a bezwen pran en lot entervansyon avan nou pran poz. Onorab Spiro, ou ti'n lev ou lanmen. Ou annan laparol.

HON RACHEL SPIRO

Mersi Mr Speaker. Bonzour Mr Speaker. Bonzour tou koleg Onorab. Bonzour tou dimoun ki dan Galeri a lekout. E osi bonzour tou bann dimoun ki dan lakour pe swiv nou atraver bann diferan medya.

Mr Speaker, Mosyon Onorab Vidot i vin a en moman ki nou konsyan la deor bann dimoun aze pe pas atraver serten difikilte. E mon apresye ki Onorab Vidot in vin avek sa Mosyon ozordi, pour nou met en pti lalimyer lo ki pe arive avek nou bann dimoun aze dan nou sosyete.

Pli boner mon'n tann bann lezot koleg in dir ki en pei i ganny mezire par lafason ki i tret son sitwayen. E sirtou son bann dimoun aze. Nou rekonnet ki nou bann dimoun aze i en group dimoun ki ozordi zot vilnerab. Zot nepli parey zot ti ete avek tou sa lafors ki zot ti annan.

Me zot a kantmenm en group dimoun ki'n fer bokou dan nou pei, pour ki ozordi nou tou ki la e nou bann zanfana, pe zwir lo zot zefor. Zot ti a en moman donner lafors travayer nou pei, ki ou a krwar serten nou i difisil rekonnet ki kantite zot in kontribye dan sa sosyete.

Prensip Nasyon-z-Ini pour dimoun aze i fer kler ki en dimoun aze i bezwen akse ek manze adekwat, delo, labri, lenz, swen medikal. E zot bezwen kapab fer sa atraver en reveni ki nou, nou konsider sa reveni finansyel. Sa dimoun aze i bezwen annan bann provizyon e sipor nesaser dan komite kot i viv.

Mr Speaker, fizyonimi imen i fer ki anmezir nou laz i monte, menm ki nou lespri i reste for e kontinyen agrandi e aprann, par kont nou lekor li i deteryore.

Permet mwan Mr Speaker etal en pti en levantay ki'n arive dan nou sosyete pou rafresir nou memwar lo kwa ki'n ganny fer partikilyerman par Gouvernman *SPPF*, *SPUP*, Parti Lepep e *US*.

Nou'n rekonnet lefe ki nou bann dimoun aze i en group dimoun enportan nou popilasyon e nou'n met an plas plizyer bon pratik, pou fer sir ki nou bann dimoun aze i viv en lavi ki konfortab pli posib. E asire ki nou bann dimoun aze osi i viv dan dinyite.

Avan 1979 Mr Speaker, bokou nou bann vye paran ti napa en laz kot zot ti kapab dir zot ti pe pran retrait. Mazorite

nou bann dimoun aze ti travay ziska i ti nepli kapab.

Se sa Gouvernman 43 an ki ti war li neser pou met serten Polisi pou etabli en laz retret a laz 63 an. E sa ti permet nou bann dimoun kapab pran en pe souf avan zot dernyen zour.

Avan sa, nou bann dimoun aze ler ti'n ariv sa moman kot zot ti nepli kapab, zot ti napa en mwayen pou soutenir zot lekor. En bon pe zot ti war zot pe bezwen al mandyan, ki swa kot laboutik *Chaka* oubyen kot laboutik *Kim Koon*. Pour bann ki pa rapel, mon pe fer zot rapel ozordi. Nou bann dimoun aze ti soufer.

Tou sa ti fini ler sa Gouvernman 43 an, ki souvan mon tann mon bann koleg lo lot kote latap fer referans avek, akoz i ti pran bann desizyon brav e met an plas bann mezir pou garanti dinyite nou bann dimoun aze.

Kwa ki'n ganny met an plas pou fasilite lavi nou bann dimoun aze e permet zot reganny zot dinyite? Lentrodiksyon Fon Sekirite Sosyal e Fon Pansyon ki mon bann koleg in koz lo la avan, in permet nou bann dimoun aze ganny en mwayen finansyer dan zot lanmen pour zot kapab

fer zot depans zot menm, san ki zot bezwen depan lo bann zanfan e bann pti zanfan. Zot in ganny zot lotonomi lo zot menm pour zot kapab fer sa ki zot anvi e kapab rekonforte ki omwen zot annan sa tou le mwan.

Sa larzan i permet zot viv endependan. Me eski sa reveni i sifi? I pa sifi Mr Speaker, akoz ler nou get depans ki en dimoun aze i bezwen fer lo sa pti reveni R5 mil 750, i pa sifi.

Ler zot bezwen mentenir zot lakour zot menm. Serten ki bezwen pey dimoun pou koup zerb. Sa larzan i pa ase. I annan serten zot pour rezon medikal i bezwen aste fortifyan e lezot keksoz, parey bann *aids*, ki swa en *cane*, ki swa bann lezot sipor pour zot kapab en pe mobil. Zot war li i vremen serye pour zot kapab depans sa larzan.

Eski okenn bann Onorab lo lot kote latap, ler ti aprouv larzan pour swen medikal bann Minis, ti mazin ki lamazorite sa bann dimoun aze i bezwen linet e demann en finansman ekstra pour zot kapab ganny sa linet.

Akoz en linet *minimum* i koute pour en dimoun R5 mil e plis. Zanmen zot in mazin sa Mr Speaker. Zot in plito met larzan pour bann Minis ganny swen medikal, menm aletranze.

Mr Speaker, Gouvernman *US* in met fasilite *Regional Home for the Elderly*, kot bann dimoun aze ki pa kapab pran swen ek zot lekor oubyen zot reste tousel, zot santi zot nepli anvi reste dan sa lakour zot tousel, zot kapab fer en demann pour zot al dan *Regional Home*, kot laba zot ganny sa lozman e zot kapab reste. En mekanizm ki Gouvernman *US* in met an plas.

Lasistans *loan* pour bann dimoun aze;

Gouvernman *US* ti realize ki bann dimoun aze zot en bann dimoun ki nepli kapab travay. E alors ti met en mekanizm pour zot kapab ganny en finansman pour zot kapab repar zot lakaz.

Sa ti ganny fer ki swa atraver Lazans Proteksyon Sosyal oubyen atraver Gouvernman Lokal. Parske Mr Speaker, i difisil pour nou bann dimoun aze ganny akse avek *loan*, parske zot pa pe travay.

Lentrodiksyon kart bis Mr Speaker. Sa in permet nou bann dimoun aze vin pli mobil. Zot pa bezwen depanse ler pou zot vwayaze. Akoz bokou nou bann dimoun aze, zot kontan asiste zot lanmes oubyen akse Servis Lasante detrwa fwa dan en mwan, pour rezon ki nou'n

dir pli boner. Zot lasante in deteryore.

Mr Speaker, sa kart bis i permet zot deplase, al zot lanmes e osi fer zot konmisyon lemwan Mr Speaker. Me selman, en keksoz ki nou bezwen realize, se bokou sa bann dimoun zot bezwen pran bann lezot mwayen transpor, menm si zot annan sa kart bis. Parske zot nepli kapab monte dan sa bann bis Mr Speaker. Sa i en keksoz ki sa Gouvernman ti byen revwar Mr Speaker.

Letablisman Fon Pansyon; Avek bi ki nou bann dimoun aze ler zot pran zot retret zot vin finansyerman endepandan, Gouvernman ti entrodwir Fon Pansyon.

Me la ankor, i domaz ki en kantite reazisteman in ganny fer avek Fon Pansyon. Ki fer ki sa bann dimoun pa zwir zot Fon Pansyon an totalite, akoz i depan en bout lo Sekirite Sosyal e en bout lo Fon Pansyon. Ki ler in ariv en serten sonm, zot pa pou ganny sa total. Sa ankor Mr Speaker i en anomali ki ti byen ganny redrese.

Home carers Mr Speaker. Bokou nou bann dimoun aze i annan difikilte pou zot kapab fer zot aktivite toulezour avek laz ki'n progrese. Gouvernman ti war nesesite pou asire ki sa

bann dimoun aze ki ti nepli kapab, i ganny lasistans *Home Care*.

Gouvernman pa'n ezite fer depans an sa ki konsern bann dimoun aze, akoz i ti rekonnèt zot kontribisyon e valer ki zot in fer dan nou sosyete. Me la ankor parey mon bann koleg in dir, ankor nou bezwen war ki mannyer nou kapab re aziste sa sistenm *Home Care* pou fer sir ki nou bann dimoun aze pe ganny sa swen ki zot merite. Parske en kantite zot Mr Speaker, pe soufer la deor.

En kantite zot pe ganny maltrete, ki swa par zot bann *carers* oubyen menm en manm fanmir Mr Speaker. Ankor parey mon bann koleg in dir, bann vizit pli souvan i bezwen ganny fer pou asire ki sa bann dimoun pe ganny byen swen.

Ler nou koz lo dinyite bann dimoun aze, nou pe fer referans lo zot abilite en dimoun pour li viv an dinyite e an sekirite, san okenn form leksplwatasyon e okenn form labi. Kot zot devret ganny trete zis san pran kont zot laz, ras etnik, zanr ou dezabilite. E kot zot ganny valorize san pran kont zot kontribisyon ekonomik.

Mr Speaker, nou bezwen rekonnèt ki si Sesel in ariv kot i

ete ozordi, se gras a zefor e kontribisyon nou bann dimoun aze. Nou popilasyon bann dimoun aze deplizanpli pe grosi. Savedir, sa bann mezir sirtou medikal e rekreasyonnel ki'n ganny met an plas, in fer ki koman en popilasyon nou pe viv pli lontan.

Alor, i pa sifi pour nou zis dir nou rekonnèt zot zefor, lasyer e sakrifis. Nou bezwen angaze pou montre nou lapresyasyon par bann aksyon konkret e tanzib.

Mr Speaker, yer nou ti pe debat lo en Mosyon lo lasante mantal nou dimoun dan nou sosyete. E mon krwar ki nou'n rat sa sans yer. Onorab ki'n koz lo sa size lo lot kote latab, in mank sa sans pou koz lo nou bann dimoun aze ki zot ganny bann problemm lasante mantal. Ki swa *dementia*; ki swa *Alzheimer*.

Ozordi nou realize osi ki enn mon koleg lo lot kote latab, atraver ou Mr Speaker, Onorab pour Cascade *MNA* Elekte, i pa'n realize yer ler in entervenir lo Mosyon anmennen par Onorab Sathya Naidu lo lasante mantal, ki ler leksplozyon *CCCL* ti arive, ki en kantite dimoun Cascade pe soufer avek *anxiety*. I annan ki ganny *panic attack* akoz sa lensidan. Mon solider

ek sa bann dimoun ki'n eksperyans sa sityasyon lesplozyon dan CCCL Petit Paris e Cascade.

(APPLAUSE)

HON RACHEL SPIRO

Parti *US* Mr Speaker in montre son lapresyasyon e rekonesans par plizyer aksyon konkret pour nou bann dimoun aze. I pa'n zis promet e pa delivre parey Gouvernman *LDS*, ki ziska prezan pa ankor delivre ditou lo son promes pour bann dimoun aze. E ni menm pour lezot travayer.

Konbyen dimoun aze ki pou nepli la pou zwir sa logmantasyon ki sa Gouvernman in promet pour serten nou bann dimoun aze? I pou'n deza tro tar. Kestyon se kwa nouvo ki Gouvernman dizour in anmennen pour bann dimoun aze? Larepons se naryen, apard fer monte laz pou vin 65 an.

Dan en konversasyon ek en bann dimoun aze, zot in fer mwan konpran ki zot ti swete annan en *Day Care Center*. Bann fasilite kot zot kapab ganny akse avek zot finans san bezwen fer en gran laliny tou le lafen dimwan, pour zot ganny

zot larzan pansyon. Parey i leka ozordi.

En kantite zot Mr Speaker, zot pa kapab servi *ATM* aköz swa zot pa trouv kler oubyen zot pa pe konpran pou fer marse en sistenm *ATM*. Mr Speaker, tousala i bann keksoz ki nou bezwen revwar pour nou bann dimoun aze. Nou tou nou pou vin pli aze. E sa ki nou pe demann ek sa Gouvernman koman en Lasanble se ki Gouvernman i fer le neser pour nou bann dimoun aze viv dan plis dinyite. Aköz sa ki nou pe koz lo la ozordi pou afekte nou tou e nou bann fitir zenerasyon.

I enportan ki Gouvernman i vin ek en plan konkret pou asire ki nou bann dimoun aze i kontinyen viv an dinyite. E avek sa enn de mo Mr Speaker, mon pou siport sa Mosyon aköz mon vwar ki i en bon Mosyon.

Me Mr Speaker, si sa Gouvernman i santi i pa pe kapab fer sa, nou pe enplor nou bann dimoun aze pou get byen, obzerv byen. Aköz sa bann promes ki'n ganny fer pandan sa dernyen 4 an pa'n zanmen ganny delivre. Lavey en eleksyon, dimyel pe ganny pase o bor zot ver e zot pe ganny promet ki zot pou ganny en ogmantasyon.

Eski zis en ogmantasyon ki zot bezwen oubyen zot bezwen bann lezot sipor adekwat pou fer sir ki zot viv sa lavi an dinyite? Si sa pa arive, donn en sipor *United Seychelles* dan sa prosen eleksyon. Mersi.

MR SPEAKER

Mersi Onorab. Nou a pran poz dan deba la e nou a rebran 11 er 10. Mersi.

(BREAK)

MR SPEAKER

Onorab Lemiel, ou annan laparol.

HON SYLVANNE LEMIEL

Mersi Mr Speaker. Bonzour Mr Speaker. Bonzour tou mon bann koleg Manm Onorab e tou dimoun ki a lekout.

Mr Speaker, devan nou ozordi i annan en Mosyon anmennen par Onorab Audrey Vidot Manm Elekte pour distrik Roche Caiman. E sa Mosyon li menm pour mwan, i en Mosyon ki annan son merit. I en Mosyon ki mon santi petet lontan bokou pli avan ti'n devret ganny anmennen. E toudmenm, in arive. I devan nou Lasanble. E nou la pour nou debat lo la e pour nou vwar son sans li menm.

Mr Speaker, nou bann dimoun aze zot menm, nou – mwan dan mon term pour mwan. Mwan ler mon get nou bann dimoun aze. Zot en bann dimoun vreman enportan. Mwan pour mwan i en group dimoun ki vreman *chère* pour mwan.

E zot en group dimoun, sirtou bann dimoun aze dan mon distrik kot parfwa i annan serten zot ki pou toultan al ver zot pour serten referans, listwar distrik. Listwar ki'n pase dan pei, *whatever*. Ou toultan al kot zot. Zot konman sa bibliotek vivan nou kapab dir.

E sa group dimoun li menm i en group dimoun ki merit ganny valorize. E nou merit a tou pri prezerv sa bann dimoun. E Mr Speaker, letan nou regard nou bann dimoun aze isi Sesel, in annan en kantite keksoz ki'n ganny fer pour bann dimoun aze ziska la.

Mon bann koleg in koz lo la. I kapab an term depi lakaz ki'n ganny fer pour zot. Sekirite Sosyal; bann ki'n travay ki an menm tan ek Sekirite Sosyal zot pe ganny zot pansyon. In annan bokou ki'n ganny fer.

Me Mr Speaker, nou santi ki ozordi kot nou'n arive, sirtou isi Sesel avek kou lavi ki'n ogmante, avek sironstans lavi

ki manner keksoz i ete, nou vwar ki i annan sa nesesite irzan e sa merit ki nou bann dimoun aze zot osi zot ka i ganny get ladan parey nou dir.

Nou bann dimoun aze parey nou tou nou konnen, zot annan zot bann diferan bezwen. Zot annan bezwen sipor lafanmir. Kot fanmir nou osi nou bezwen pe regard nou bann dimoun. Fer sir zot pe viv byen. Zot dan sa konfor ki nesese. Zot bezwen annan zot sa *safety* kot zot lakour li menm. Zot bezwen en bon swen medikal.

Kot ozordi letan nou vwar nou Sistenm Lasante li menm, in annan serten degradasyon parfwa ou kapab dir. E eski nou pe vwar nou bann dimoun aze i pe gannyen sa bon swen ki petet zot ti pe ekspekte?

Zot bezwen osi sa bon swen lasante kognitiv. Zot bezwen osi annan sa fason kot zot *être* mobil. Kot zot kapab marse. Kot zot kapab detann zot. Zot kapab al en pe partou. Zot kapab *enjoy* e vwar fri bann travay ki zot, zot in fer. Sesel kot in arive ozordi la, i gras a sa bann dimoun aze. I annan ki'n kit nou. Me i annan ki ankor la. Sa bann semen ki nou pe *drive* lo la, ki nou pe pas lo la i premye ganny fer par sa bann

dimoun aze. E parey in ganny dir, zot ti fer sa avek lanmen.

E ozordi letan in ariv zot vye zour, nou bezwen regard dan zot ka e regard dan zot ka profon e byen. In annan parey mon bann koleg in dir, bann promes ki ti ganny fer. Mwan mon'n deza koz lo la kot ti annan serten leokri letan mon ti dir, an 2015 letan ti pou fer eleksyon.

Wi, Prezidan aktyel ozordi, ler i ti pe debout konman en kandida i ti dir poudir bann dimoun aze nou pou donn zot – mwan mon pou sit sif mwan. I ti dir nou pou donn zot R10 mil. En logmantasyon dan zot sekirite sosyal ki pou ariv ziska R10 mil. Be eski nou'n vwar sa in arive ozordi?

Ozordi sa menm dimoun ki ti dir sa letan i ti en kandida pe debout pour prezidansyel an 2015 - ozordi nou 2024, i Prezidan Larepublik, eski in onor sa? Sa letan la ler i ti dir i pou donn 10 mil, i pa ti gannyen Prezidan. Me la ozordi i Prezidan nou pei e i kapab fer sa.

So ki Gouvernman pe fer? Nou'n tann in nonmen lannen prosen. Me nou, nou santi ki lannen prosen i en pti pe tro tar. I lavey en eleksyon parey mon bann koleg in dir e pou annan

tou sort kalite promes ki nou pou war pe vin devan zot. Pep Seselwa i bezwen regard byen.

Definitivman

logmantasyon lapey in ganny dir. Logmantasyon lapey pour *carer* in ganny dir. Tousala la, la i bann promes ki pe vini, pour ki i a donnen 2025, pour ki bann dimoun i a kapab vote e met zot ankor la o pouvwar pour en lot 5 an.

Me Seselwa sa ki bezwen realize, ouver zot lizye. Pandan 2020 ziska la, nou'n ariv 2024, i pa'n arive en logmantasyon. Logmantasyon pou ariv 2025 lavey eleksyon. E nou bezwen regard sa e etidye sa. Vwar si sa i en keksoz ki i *genuine* sa bann promes ki nou pe ganny dir pe al ganny fer.

E nou'n ganny dir poudir pa nou *US* ki pou dir zot ki pou fer. Me nou *US* ki'n toultan *fight* pour malere. Nou *US* ki'n toultan *fight* pour sa bann dimoun aze la. *US* ki kontinyelman koz pour sa bann dimoun! Eski nou tann lezot dimoun koz pour sa bann dimoun? Sirtou isi dan sa Lasanble Mr Speaker.

So, Mr Speaker, nou vwar ki dan *manifesto LDS* pour eleksyon 2020 i annan en soutit anba “*Welfare* pour bann dimoun aze”. E anba la pour

“*Welfare* pour bann dimoun aze”, zot in site ki zot ti sipoze vin fer. E enn parmi sa ki zot ti sipoze vin fer se zot pou asire ki Pansyon Sekirite Sosyal, kou lavi i desann e i ganny amelyore pour sa group dimoun.

Eski sa in arive ziska ozordi Mr Speaker? Ki nou pe vwar? Nou pe vwar dimoun aze pe kontinyen plennyen. Pe kontinyen konplent. Tou dimoun in ganny ogmantasyon. *Cabinet* in ganny ogmantasyon.

Bann lezot travayer in ganny 10poursan menm si zot pe konplent zot in dir pa ase. Akoz konman in donn sa 10poursan, in al dan lezot logmantasyon kou lavi ki'n arive. Zot in dir pa ase. Me ki nou bann dimoun aze in gannyen Mr Speaker? Naryen ziska prezan.

I annan en cours nou bann dimoun aze ki ankor pe viv zis lo R5 mil 750. I annan sa lot cours dimoun ki zot, zot in travay avan. Zot in ganny zot pansyon ki sorti kot *Pension Fund*. E ler i azout ek zot pansyon, i fer en pti keksoz pour zot.

Me ler ou get sa cours dimoun ki ankor lo sa R5 mil 700 Mr Speaker. E sa i en gro group dimoun. E li pour li – i menm pli ba ki *minimum wage*

sa. E li pour li kou lavi in vremen ogmante.

I al dan menm *supermarket* ki nou. I al kot menm dokter prive parfwa. Akoz sityasyon lasante mannyer in ete ozordi, sa bann dimoun i bezwen bouz en pti pe pli devan. Zot al rod en lot lopinyon kot en dokter prive e sa pa kout en sou.

Mr Speaker, ou ganny bann dimoun ki annan bann latizann ki zot pou bezwen aste. Bann ki plizoumwèn lo lili pe servi *pampers*. Sa larzan li menm i pa ase pour sa bann dimoun.

Bokou fwa letan ou pase ou vizit zot, zot demann ou; “kan ki zot pou get nou en kou? Nou pa tann zot koz lo nou. Kan zot pou get nou en kou? Nou tann ogmantasyon pour tou dimoun partou. Be nou?”

Ozordi, Onorab Audrey Vidot in anmenn en Mosyon. En Mosyon kot i pe demann sipor nou tou depi kote *LDS*. Nou isi dan kote *US* i garanti nou sipor. In anmenn sa Mosyon kot pou demann nou a linanimite pour nou siporte e demann Gouvernman pou ed sa bann dimoun aze pour ki zot a kapab viv dan en pli bon dinyite. En fason viv en pe pli meyer ki zot pe viv ozordi.

Mr Speaker, mon a pran en legzanp. Mon annan *Home for the Elderly Anse Royale* en. Sa i en *Home* ki premye konstrir dan Sesel. In sot 20 ekek lannen li sa *Home*. I annan 10 dimoun, 11 dimoun dan sa *Home*.

I en *Home* li menm. Mon krwar parey ki mon koleg Onorab Churchill Gill in dir. Baie Ste Anne zot annan en – zot manze i kwi dan en sel lakwizin.

Me ler ou regard sityasyon sa bann dimoun dan *Home Anse Royale*, zot sa group dimoun ki larzan pe ganny tire plis lo zot Sekirite Sosyal. Parey bann dimoun Baie Ste Anne dan *Home*, zot osi zot pe pey zot R2 mil 600 par mwan.

So Mr Speaker, mon pe ganny lot kote laba par en entervenans ki pli konn koze ki tou, i dir Baie Ste Anne napa *Home*. Mersi Onorab. Sa *Home Grand Anse* ki i annan dimoun Baie Ste Anne ki reste ladan.

So Mr Speaker, lefe i reste ki sa bann dimoun i pe ganny dedwir bokou plis larzan lo zot Sekirite Sosyal. E i fer ki letan konmsi pour en mwan zot war zot, zot pe *struggle*. Si en dimoun ki annan son lakaz prive i santi poudir sa 5 mil 750 i pa ase pour li viv lo la. Me li sa

dimoun dan *Home* li osi 2 mil 600 pe ganny tire lo sa 5 mil 750. Ki i pou dir li osi Mr Speaker?

Mr Speaker, ler mon pe regarde, in plis ki ler pour *LDS* tenir son parol ki i ti dir dan son *manifesto* e pour son kanpany eleksyon. I ti dir i pou met larzan dan pos Seselwa. I ti dir ki i pou regard dan sa zafer Pansyon Sekirite Sosyal. I pou regard dan kou lavi.

Annou fer sa aksyon arive. Annou regard en pti pe kondisyon, sirtou finansyel. Kondisyon finansyel nou bann dimoun aze. Akoz nou bann dimoun aze i al dan menm *supermarket* ki nou tou. I al dan menm laboutik. Zot osi zot pey bil. Alors in plis ki ler pou Gouvernman reazir lo son promes ki i ti vin donn nou isi – i ti vin donn nou rafal son letan kanpany.

Mr Speaker, in annan – ou konnen, parfwa kekfwa zis nou asize nou pe mazine, nou'n ganny pouvwar. Nou'n vin o pouvwar. Wi mon konnen i annan bokou keksoz ki nou bezwen regarde. Me nou bann dimoun ki pli vilnerab dan nou sosyete, se zot sa kours dimoun petet ki nou latansyon letan ou ganny pouvwar ou latansyon i merit vin premye ver zot.

Me pa ver nou menm *or* ver nou pos avan. Nou merit petet pe regard ki fason nou pou kapab elev lavi sa enn ki pe ganny pli pti gin dan nou sosyete. Sa enn ki pli vilnerab.

Nou tou nou dir nou kontan nou bann dimoun aze. “Anr, nou kontan nou bann dimoun aze. Nou pe get dan zot ka”. Me nou get dan zot ka. Zanmen sa ka i ganny get ladan. Toultan i zis parol, me i napa aksyon.

Alors sa ki nou, nou pe demande e sa ki Mosyon pe demande Mr Speaker, se aksyon. Pa zis parol. Annou regard dan ka ki mannyer nou pou kapab *improve* kondisyon. *Improve* fason viv. I annan nou bann dimoun aze sityasyon i reste tou Mr Speaker, i fer lapenn.

Dan nou letan nou'n fer sa ki nou nou'n kapab. Ozordi mon bann koleg in koz lo *carers*. Ozordi kont tou sa bann vye dimoun i ganny fouy ladan. Apard ki get dan kont zot bann zanfan. I fouy dan kont tou sa bann vye dimoun. Si i war R50 mil la. I pa mazine, sa dimoun pe al mor demann li osi. Son pti larzan in anmase pour son serkey. Pour son lanterman.

Me i dir li, “Non. Ou annan R50 mil dan ou kont. Pey ou

carer ou menm.” Eski sa i zis? Mon pour mwan mon pa war li i zis Mr Speaker. Sa dimoun in travay, in eskente. Li osi in anmenn pei kot in arive ozordi. Alors ozordi se nou ki devret regard dan son *welfare*. Get li pli byen e soulaz li pandan sa bann dernyen letan la ki i la ki i pe viv parmi son fanmir, parmi nou. Annou gete ki fason ki nou kapab soulaz zot.

Par kont i annan i a dir ou “me i annan son manm fanmir”. Wi, mon pou dakor mwan osi dan sa kote. Manm fanmir i annan son rol ki i devret zwe li osi. Me letan nou pe gete, manm fanmir in zwe son bout. Ozordi mazorite zanfan. Nou tou ki annan manman. Nou annan nou papa. Mazorite nou, nou annan nou lakour. Setaki i annan son *loan*. I annan son det pour li peye, ki fer ki parfwa i difisil. Zanfan petet i mete en bout pou zwenn zot.

Me i annan de letan ki li menm li i dir ou - I dir; “be mon piti sa larzan ki nou pe gannyen li menm i pa ase. Reget nou. Reget ladan. Nou osi nou a viv en pti pe pli byen”.

So alors Mr Speaker, mon kontribisyon anver sa Mosyon i se ki mon ti ava kontan e mon ti ava enplor nou bann koleg Manm Onorab lo kote *LDS*,

pour zot donn zot sipor sa Mosyon ki Onorab Audrey Vidot li menm in anmennen.

E dela nou a montre poudir ansanm nou pe travay e nou pe rod fason pour nou kapab demann Gouvernman pour li kapab reget en pti pe pli byen dan fason finansyel nou bann dimoun aze.

E osi dan lezot fason ki nou kapab amelyor zot lavi pour nou fer li vin dan en fason ki pli diny. Dan en fason ki rann zot pli zwaye pandan zot bann dernyen letan lo sa later. Mersi Mr Speaker.

MR SPEAKER

Mersi Onorab. Laparol i pour Onorab Egbert Aglae.

HON EGBERT AGLAE

Mersi Mr Speaker. Mon a dir bonzour tou Manm Onorab. E osi tou nou bann dimoun aze ki dan lakour ki pe ekout nou pe debat lo zot size.

Enn ki mwan personnelman mon pran li konman en size vreman enportan e aker. Akoz mon rekonnèt tou sa travay ki zot in fer dan lepase pou ede batir sa pei ki nou apel Sesel ozordi.

E osi pou ede – sirtou bann ki mon familye avek ouswa dan mon fanmir, pou ed

mwan grandi pou vin sa ki mon ete ozordi konman en dimoun ase disiplin, egzampler ki pe osi ede pou anmenn la demokrasi isi dan nou pei.

Mr Speaker, Mosyon pe demande ki “Gouvernman i fer le neser pour nou bann dimoun aze viv dan plis dinyite.” E dinyite i en mo ki mon'n tande souvandfwa par nou bann dirizan dan lepase koz lo la. Kot i dir tou dimoun i bezwen viv dan plis dinyite.

E pour mwan letan mon regard dinyite se, ki mannyer e ki fason ki ou donn nou bann dimoun aze zot bann tretman, zot bann neserite e zot bann benefis pour zot kapab – apre ki en long parlour travay dan zot lavi, kot zot nepli kapab. Sa lafors in tonbe e zot war zot in ariv lo en pwen kot zot bezwen al pran en serten repo ziska ler zot dernyen zour.

I enportan pour nou kapab asire ki sa dernyen zour ki zot pe pran zot bann repo apre sa long parkour travay, i vin dan en fason rezonnab, akseptab.

E se la kot nou dinyite i antre kot premyerman zot bezwen santi zot an sekirite. Zot bezwen santi zot ki zot pa en mandyan, zot pa en fardo lo ledon person.

Zot bezwen kapab leve bomaten regard zot lakour, swa deor zot lanvironnman, respire en ler ki an bonn sante. E osi zot annan sa trankilite ki zot merite. Akoz letan ou pe repoze ou bezwen annan en serten nivo trankilite.

Me pour sa arive Mr Speaker – e se sa ki Mosyon pe demann Gouvernman. Me osi i pou atase avek serten responsabilite personnel. Ouswa ou lantouraz, ouswa ou fanmir.

Me lakle ladan pou kapab asir enn de sa bann kalite karakteristik ki mon'n nonmen pour zot kapab viv an sekirite. Byensir i bezwen annan lord ek lape. E se la kot Gouvernman i antre ki met lord ek lape. Li ki annan sa manda anba Lalwa.

Nou pe koz lo en lanvironnman sen kot ou kapab respire - en lanvironnman ki pa polye. E la kot Gouvernman osi i antre pou asire avek bann lankadreman legal atraver nou lanvironnman – Minister Lanvironnman.

Si nou pou koz lo manze nou bezwen koz lo Sekirite Alimanter. Wi, nou enport en kantite. Nou osi prodwir lokalman. So la Gouvernman i antre pou met bann veikil an

plas pour sa kapab kontinyen arive.

So si en dimoun i vin dir mwan la, akoz ki Gouvernman ki devret fer tousala? Mon krwar i enn de rezon ki mon'n met devan. Wi, i pou annan responsabilite personnel. Responsabilite familyal ki pou antase avek. Me tou i konmans avek en veikil. Se Gouvernman konman sa fasilitater.

Si nou annan plis devlopman ki'n arive dan pei. Si nou annan plis bann nouvo fason fer. Se ki dan lepase Gouvernman in vin sa fasilitater pou fer sa arive. I pa'n zis sorti anler, in tonm ater. Non. In bezwen annan bann lankadreman.

E Mr Speaker, letan nou pe koz lo nou bann dimoun aze, mon krwar i enportan osi pou regard en pti pe dan lepase. E dan lepase parey mon koleg Onorab Cosgrow ti'n nonmen. Ki manner ti konmanse pour zot kapab ganny en benefis. I pa en saler. I en benefis.

In konmanse par *Provident Fund*, '71. Nou'n al lo *Social Security* an 87. Ziska la ozordi, diferan lamannman in anmennen dan bann Lalwa pou asir anmenn en lasirans dan en fason ki zot ganny en Sekirite Sosyal.

E apre osi zot in travay pour plizyer lannen. Zot kapab kalifye pour zot ganny en pansyon akoz zot in kontribye zot osi. E sa pansyon i sorti kot Fon Pansyon.

Be pour mwan i en pti pe sagrinan letan mon ti tann Dirizan pei mont lo televizyon dan en *speech* ki dir pou dir; “si ou pe ganny Sekirite Sosyal, i riske war ou annan en koupir dan ou pansyon”. Eski sa i normal, i *fair*?

Mwan ki'n travay. Mwan ki'n kontribye ek mon anplwayer. I mon benefis. Si mon mor demen i a pas lo mon – sa enn ki mon'n mete konman mon *heirs* pour li gannyen. Mon *next of kin*.

Ou pa merit pe konpar sa de keksoz direkteman ansanm. Si ou ganny enn ou pa kapab ... pour ou ganny lot. *This is wrong*. Zot merit ganny sa ki zot merite.

E ozordi letan nou pe koz nou bann dimoun aze, nou konnen poudir letan ou laz in antre, ou *prone* pour ou kapab ganny bann kondisyon medikal.

Ou kapab tonm malad. Ouswa ou ganny tansyon. Bann maladi kronik. Dyabet. Ou sistenm lekor striktir li menm li i konmans fay, fay, ou ganny sa

ki nou apel bann douler zwen, *arthritis*. Ou kapab ganny problemn vizyon.

E se la ki ou santi ou abilite pour ou kapab donner parey ou ti donner oparavan letan ou ti ankor pli zenn, i afeblir. E la ou pa pou kapab fer sa ki ou ti anvi fer. E se la ki ou pran ou retrait. Akoz personn pa kapab fors ou... Akoz i annan pei. Plizyer pei o monn ki napa en sistenm an plas parey nou, kot nou war bann dimoun aze ankor pe fer bann travay ase dir pour zot kapab ganny en larzan. Pour zot kapab nouri zot lekor e petet soutenir zot fanmir ouswa sa lozman ki zot annan. I egziste o monn sa.

Me Sesel desizyon ti ganny pran par nou Gouvernman pour sa pa arive. Mon pa kapab war nou dimoun aze pe vin mandyan parey ti dir kot *Chaka*. La o bor kot ti annan *ex Supermarket SMB* la osi. Ti egziste tousala.

Me nou, nou krwar poudir lafason ki nou'n striktir sistenm ki egziste ziska la ozordi, ki dabor zot it dir i en sistenm kales kase. Be pour mwan mon war i vremen drol ki i en sistenm kales kase, avan 2020, avan sanzman, biznes ti pe fer byen Sesel. Touris ti vini Sesel.

En sistenm kales kase kot plizyer lenfrastriktir, semen, lakaz pe ganny konstrir. Plizyer *housing estate*. En bann *scheme* ki ti ganny mete pour dimoun kapab vin sa ki zot oule.

Ou ti kapab ganny ou *loan*. Ou ti kapab fer ou prop lakaz. Aste ou bout later. Menm si ou fanmir. Nou pa ti get non. Nou pa ti get sinyatir. Ou ti kapab al Liniversite. En sistenm kales kase ti permet sa arive. En sistenm kales kase ki bann striktir pilye la demokrasi ti pe fleri anba Prezidan Faure. Wi.

E osi Mr Speaker, mon konstate poudir anba sa sistenm kales kase ki zot dir zot in erite, premye lannen ki zot in dan lofis zot in kapab donn zot lekor bann gro *allowance*. Palto, ledan. Monte, desann. En sistenm kales kase in permet en Prezidan *travel* plis ki 50 fwa mon krwar la ozordi.

En sistenm kales kase Mr Prezidan, nou bann dimoun aze pa ti pe mandyan o bor semen. Zot ti ganny gete. Bann adikt ki ti ganny plase dan travay, ti travay. Ti nepli al vole. Be mwan mon krwar Mr Speaker, zot ki'n pli kas sa kales kase ozordi. *LDS*.

(APPLAUSE)**HON EGBERT AGLAE**

E i kler. E la mon a dir wi. Zot ki'n kas sa kales, akoz nou ti annan en zoli kales nou. E pep Seselwa ozordi i regrete i war poudir i pa ti sitan dan mal parey zot ti pe ganny dir par bann fo profet. Sa i en larealite.

Mr Speaker, nou kapab koz lo dimoun aze akoz i en kous nou popilasyon - en *key population* dan li menm, ki nou pa zis get zot koman bann retrete. E nou koman politisyen, nou regard zot dan en lot fason.

E se la ki pour mwan, letan mon pe tann sa bann lanons ki pe a ganny fer la lavey en eleksyon. I tradwir an kwa? I tradwir en promes pou ganny vot sa group dimoun. Parey zot pou fer ek lazenes. Parey zot pe fer avek bann *carer*. E la zot pou al fer li avek bann *elderlies*.

Me dan lepase en kantite kritik in ganny mete, lo lafason kot sa *Approved Social Benefits* ki dan en laliny Bidze ti ganny mete. E bokou ti dir “i tro bokou. I tro gro. Akoz nou pe depans plizyer milyon lo bann dimoun ki pe al desede, ki pe al mor, ki pe al kit sa later?” Sa ti parol Onorab Ferrari, atraver ou Mr Speaker.

Si nou serye kot i konsern dinyite nou bann dimoun aze, nou ti bezwen komans depi boner. E parey i dir; “en pei i ganny zize lafason ki i tret son bann dimoun aze ouswa sa ki pli vilnerab”.

Nou pa ti a vini avek bann lanons, parey kot Departman *Family* ki zer bann *Home*, kot zot deside dan en letan kritik, fer monte bann *fees*. Si zot ti serye avek sa size dimoun aze, zot pa ti pou fer li sa? Zot ti a rod bann lezot mekanizm. Zot ti bezwen larzan pou siporte. I annan lezot mekanizm ki ti kapab ganny servi. Me eski ti annan volonte pour zot fer sa? I kler ki, non.

2021 ou ti annan 1 an. Ou pa'n fer naryen o pouvwat. 2022 ou ganny ankor en lot lannen. I fer ou 2 an. 2023 i fer ou 3 an. E la 2024 i fer ou 4 an. Ou pa'n war nesosite pou get dan *welfare* sa bann dimoun? E la 2025 dernyen lannen ki ou la, e ou pe ale tou, ou anvi get dan zot *welfare*.

Be mwan mon'n dir, si zot serye, zot annan sa size aker – akoz sa, i nou manman, i nou granmanman. I nou tantin. Bann ki'n ariv lo en laz en pti pe – i kapab nou ser tou. Me fer li la.

Nou annan *mid-year review* pe vini e posibleman en siplemanter. Apre ki pou swiv dan en lot Bidze ankor lafen lannen. Dan lespas 3 mwan tousala pou arive sa. Met li ladan nou a gete si zot serye.

I pa zis sifi dir, koze. Letan nou'n al *door-to-door* nou fer vizit. Nou pou fer sa. Nou pou dir sa. Nou pou fer sa. Be apre i pa materyalize. Se sa ki apel fo promes. E letan nou, nou dir pou dir zot in bat latet sa bann dimoun aze, la, la bann rezon ki mon'n site. Mon pa pe koz lang mwan. *This is the reason.*

E letan nou dir nou pa fer politik avek serten size. Me nou demann nou lekor – ou ti ganny elekte lo ki plato nou? Lo ki *platform*? Lo en *platform* politisyen. Kot *main* landrwa politisyen i vin travay? Se Lasanble Nasyonal apre dan nou distrik. So nou pa fer politik la anndan?

E yer nou ti pe koz lo en Mosyon kot i ti koz lo lasante mantal. Be, nou bezwen mazin lasante mantal osi nou bann dimoun aze. I annan dimoun aze Cascade depi levennman CCCL pa ankor kapab retourn kot li. I ankor kot son fanmir in pri.

(Interruption)

HON EGBERT AGLAE

Wi. Mon annan fanmir laba osi ki'n ganny afekte ki mwan mon'n donn lanmen pou ede. I sagrinan poudir letan mon pe koze, Onorab Sekreter Zeneral ki reprezantan zabitan Cascade, i a dir mwan; “pran sa dimoun aze met kot mwan.” *Be this is not acceptable* Mr Speaker!

(Interruption)

MR SPEAKER

Order, please!

HON EGBERT AGLAE

Si mon pe koz manti, i annan prosedir anba *Standing Orders*, servi li silvouple. E gardyen *Standing Orders* i servi li.

Mr Speaker, letan mon'n dir pou dir bann dimoun aze zot annan bann tandans pour zot ganny bann malad. Enn bann gran konsern letan ou pas devan laport se pour zot al klinik.

Tou le 2 mwan ouswa 3 mwan zot bezwen al *refill* en preskripsyon ouswa zot annan en lapwentman dokter. Parfwa si ou'n kalifye en *carer*, ou *carer* i kapab ed ou. Me si ou pa'n ganny en *carer*, ou bezwen rod

en fason pour ou ale. E souvandfwa sa bann dimoun i *rely* lo sa ki nou apel en taksi pirat pou fer sa.

E zot pe ganny sarze ant 400 a R600 ale retour. Lo R5 mil 750 si ou pe fer 4 *trip* dan en mwan Mr Speaker, definitivman la *almost* R2 mil 500 i pe al ganny sorti dan sa saler. Si ou pa pe ganny siporte.

Nou bezwen konsyan. E se sa ki parfwa nou lager pou annan plis bann *home visit* par bann Lotorite Lasante. Kot i neser pou kapab anmenn plis soutyen. Si sa enn laba nou konnen i pa pe kapab bouze ouswa i napa sa mwayen, nou rann li serten servis.

Mwan mon'n rann servis dan mon distrik. Bokou nou la lo kote US mon mazine nou'n rann servis, kot nou'n al anmenn tretman serten dimoun. Ouswa anmenn zot menm zot sa bann dimoun kot klinik pou zot kapab.

E osi nou mazine poudir i annan bann zes enportan ki nou bezwen fer konman en imen pou kapab siport zot. Se zot menm zot sa bann dimoun ki ti fer nou aprann dir bonzour. Respe. E pour nou devlop bann disiplin dan nou. E nou osi nou kapab rann zot sa ki zot in donner

koman dan zot lenerzi avek zot lentelizans. Se en fason ki sa Mosyon pe demann zot se, *repay them back*. Pa neserman tou keksoz i bezwen an form monneter, me selman *repay them back*. Donn zot sa dinyite. Se sa

ki nou pe demann zot – nou pe demande dan Mosyon Onorab Audrey.

E koumsa la nou a kapab dir Sesel i pe tret son dimoun aze avek respe e dinyite. E mon kontan letan mon'n tann mon koleg Onorab Cosgrow in dir pou dir; “apre 2025, enn bann premye keksoz ki pou ganny fer par Gouvernman US se revwar sa laz Sekirite Sosyal. Fer li retourn parey ti ete”. La mon pe koz *Social Security*. Revwar li parey i ete.

E nou pou al pli devan osi. Mon krwar i enportan pou revwar sa bann *scheme* enportan ki ti la, ki ti pe siport lafanmir. Ki ti pe siport biznes. Ki ti pe siport nou bann zenn. Ki ti pe aspire pou vin sa ki zot ete pou reentrodwir serten sa bann *scheme* pou kapab relev zot. Relev zot moral. Akoz bokou ozordi zot moral in tonbe.

E an terminan Mr Speaker, letan ou'n ariv en laz, ou dan en travay, ou santi

poudir moman in arive pour mwan sed laplas, akoz mon laz ki mon'n arive mon konmans santi mwan nepli annan sa kouraz pour li kapab kontinyen. A laz 60 an sirtou, kot ou ti annan osi sa posibilite pou ou pran sa retret pli boner ki ou ti anvi.

I merit kapab fer li dan en fason kot i pe al pran en pti pe repo. Si i kapab fer senp pti keksoz kot li, i ava fer pour li kapab ganny en pti reveni. Ki nou ankouraze.

Me osi si ou anvi repoze, ou pa kapab pe repoz ek traka lo ou latet pou rode; ki mon pou fer? Ki mon pou gannyen? Kote mon pou gannyen? Mon dan problem ozordi. Mon isi. Mon laba. Sa i pa li ki nou, nou swete. E nou konman US, nou pou fer sir ki sa pa egziste. Mersi.

(APPLAUSE)

MR SPEAKER

Mersi Onorab. Laparol pour Onorab Waven William.

HON WAVEN WILLIAM

Mersi Mr Speaker. Bonzour tou dimoun ki a lekout. Mr Speaker, avan tou mon remerci Bondye ki nou vivan e an bonn sante. Remersi li pour sa pei.

Pour Nasyon Seselwa. Pour bann aki ki Sesel i annan. Pour lasazes ki i donn nou bann Dirizan ozordi ki pe dirize. Sa pei ek pridans dan sa vilaz global ki tirbilan.

Mon felisit pep Seselwa ki de zour an zour zot pe konpran e pe fer tou dan zot prop fason konman Gouvernman pou reste rezilyan e sey tou pou gard serten nivo e degre soustenabilite.

Serten gran serser e profeser pe dir ki nou'n lo *border* ouswa nou'n fini antre dan Trwazyenm Ger Mondyal. Olye akimil *boots on the ground*. Me se teknolozi avanse *at the press of a button*, bokou dega e domaz pe arive.

Mr Speaker, letan i sanze. Syek i sanze. Sirkonstans e lepok i sanze. Sepandan parey defen Prezidan Albert Rene ti dir sa lepok, ki naryen pa'n sanze ozordi anba nouvo Gouvernman.

Ser e Frer Seselwa, se sa eleman vilnerabilite pti Sesel. Fas ek bokou defi vizavi son laksyon, groser. E pli enkyetan ankor, se sa lensertitid mondyal e napa kontrol e lenfliyans lo sa ki pe arive deor la.

Se pour sa rezon ki bann ansyen Dirizan ki'n ale, tel parey Mr Mancham, Mr France

Albert Rene, Mr Michel, Mr Danny Faure, e nou Prezidan, e nou bann Dirizan zot ti koz e pe dir ki se firamezir ki lekonomi i permet, nou pou sey fer tou sa ki byen e sa ki posib pour benefis pep Seselwa.

Wi Onorab Cosgrow, atraver ou Mr Speaker, ki nou ti dir ki sa ki byen nou ava anbelir lo la. E sa ki mal nou ava al revwar. Apre tou Mr Speaker, personn napa monopoli lo lide.

Mr Speaker, sa Mosyon i lir konm swivan; “Sa Lasanble pe demande ki Gouvernman i fer le nesese pou nou bann dimoun aze viv dan plis dinyite.”

Mr Speaker, sa Mosyon i an retar. E in mank *timing*. E i lo en *bus stop* kot bis in fini pase.

(laughter)

HON WAVEN WILLIAM

In mank *timing* akoz se lekip LDS dan 6em Lasanble ki'n elev dinyite nou bann dimoun aze. Par servi zot mazorite pou donn trwazyenm az plis larzan olye fye lo kapris Dirizan pour en R50, R100 ouswa R200 ler i ti krwar i nesese.

(APPLAUSE)

HON WAVEN WILLIAM

Pa fini Mr Speaker. Nouvo Gouvernman, olye R50, R100. In aziste e pe kontinyelman aziste Mr Speaker. Mon toultan demande swa dan Diskour Bidze Ladres Leta Lanasyon ouswa dan Mosyon, ki firamezir lekonomi i amelyore, ki benefis i ganny partaze avek sa pep.

Mr Speaker, konsyan nou leta vilnerabilite nou pei. Konsyan nou gran lalis bezwen nasyon. E konsyan ki pei i bezwen regard son priyorite ek lasazes e avek pridans dan lafason ki i administre pei.

Mr Speaker, konsyan ki ler sanzman Gouvernman ti arive apre *COVID* ti'n tap nou e met nou plat ater, bann mezir drastik fermal pour serten ti bezwen ganny pran pou asire ki reveni nasyon i re ferm.

Mr Speaker, bann desizyon ki pa popiler ti bezwen ganny pran. Prezidan Ramkalawan e son tim dan governans ti brav, pridan e sarz. Ki ozordi lekonomi in amelyore.

Sa ki fran, sa ki senser pou dakor ki pandan sa kourt letan 4 an - mon dir kourt letan, akoz par lefe ki sa masin governans in sitan bizi e okipe, ki letan in al vit Mr Speaker. Mr Speaker, otan in

ganny fer e pe kontinyen. I pa byen pou dir ki Prezidan in abandonn son pep.

Mr Speaker, Sesel i en manm Nasyon-z-ini parmi sa 193 pei manm souveren. Sesel in ratifye *Charte* Drwa Imen Nasyon-z-ini. Konstitisyon Sesel son *Charte* Drwa Imen i dekoul atraver sa ki Nasyon-z-Ini pe demande.

Manifesto Parti LDS pour eleksyon 2020. Parmi sa 7 aksyon ki in dir i pou fer, i pe fer li Mr Speaker, firamezir ki lekonomi pei i permet, dan en fason responsab, dan en fason pridan, e dan en fason soutenab.

Sa se relev lekonomi Sesel e sosyal ki lefe *COVID* in anmennen. Fer Gouvernman Sesel vin ou Gouvernman. Kree loportinite pour Seselwa e lev nivo saler e standar lavi. Transform pei pou batir en sosyete rezilyan e investir dan lazenes Mr Speaker.

Mr Speaker, tousala pe ganny fer ler i posibil, firamezir ki lekonomi i permet. E sa Gouvernman pe fer li. E Prezidan e Gouvernman LDS in aziste saler, pa par R200 Mr Speaker. Pa par R300, me plis ki sa.

Mr Speaker, Prezidan in prononse ki lannen prosen ki

Gouvernman pou get ankor dan saler an zeneral. E osi dan benefis ki trwazyenm-az i gannyen.

Mr Speaker, eski sa pa pe reponn demann sa Mosyon pou elev lavi dan plis dinyite dan konteks lekonomi Sesel? Eski se Prezidan ki pe asiz lo sa *bus stop* ki bis pa pase, ouswa kot i kapab mank bis?

Mr Speaker, dan konteks performans nouvo Gouvernman, konman sa novis ki pandan sa 4 an in azir parey en koneser dan governans pei, e anba gidans Bondye Tou Pwisan e pran bann desizyon sarz e pridan. i pe fer parti minoriter transpire, ganny traka, Radote, perdi abilite relevans.

Akoz Prezidan in voyaz 50 fwa, pa pou al konze Mr Speaker, letan in vwayaze pour sa 50 fwa dapre sa Onorab lot kote latab. I pa'n al konze. Me avek en misyon pou asire ki rezilyans pei e pou reste lo sa semen soutenab e relevans Mr Speaker, dan konteks devlopman global.

Mr Speaker, pandan mon pti parkour leksperyans politik, parti inik, miltiparti anba ansyen Ladministrasyon e ozordi 4 an anba Gouvernman LDS, Mr Speaker, keksoz ki

mon'n tande, trouve, eksperyans e partisip ladan anba ansyen ladministrasyon; par egzanp, letan mon ti anvi koz lo bann size ki ti nesaser koz lo la pour benefis Seselwa tel parey; ogmantasyon saler. Ogmant benefis bann trwazyenm-az, anba ansyen ladministrasyon mon ti ganny dekouraze pou anmenn. Mon ti ganny dir;

“La ki Waven pe rode ankor?” Nou ti ganny dir sa letan, pa donn manze Lopoziyon pou fer politik lo la. Mon ti ganny dir ki *timing* pa bon. Anba Gouvernman LDS, mon pa pe gannyen sa bann kalite koze ouswa rezon.

Sa letan, Onorab Vidot loter sa Mosyon ti temwen Mr Speaker. Ozordi zot dan Lopoziyon akoz pep ti anvi en sanzman Mr Speaker.

Mr Speaker, mon toultan gard sa balans ek realite sirkonstans, e tandans devlopman global an relasyon avek devlopman nasyonal pei. Mr Speaker, mon pou kontinyen remersi nou Kreater ki'n permet pep Seselwa dan son refleksyon pou vot pour en sanzman pou sov nou pei.

Mr Speaker, parti minoriter ki ankoler akoz pep Seselwa in fer sanzman i pa

anvi respekte swa pep Seselwa depi 24 Oktob 2020. Ki pa anvi respekte la demokrasi. Olye vin avek alternativ, zot zis konplent dan Lasanble. Zot ankor krwar ki zwe lo lemosyon sa pep ek bann size popilis ki ozordi zot mank relevans Mr Speaker.

Malgre ki parti minoriter pe anvi fer lespri sa pep fikse lo zis son lemosyon, olye fer fas ek realite konteks defi son pti pei an fas ek realite e defi mondyal.

Mon pe sey konpran lipokrizi parti minoriter enkli loter Mosyon. Letan nou dan *Forum* Enternasyonal, nou kapab ini lo plizyer size, zisteman dan lentere nasyonal Mr Speaker.

Me ler nou Sesel, zot oubliy zot pozisyon ini koman Lasanble Nasyonal. Pe pran bann pozisyon partizan lo size nasyonal kontrerman deryer ledop pep Seselwa. Pou ed sa pep pou fer sa tranzisyon byen anmezir ki transformasyon inevitab dan fason viv, fodre i arive pour soustenabilite lafanmir e avek pei.

Mr Speaker, ki zot in fer ankor - parti minoriter apre *COVID*? In sey tou ki sa nouvo Gouvernman pa reisi pou redres lekonomi pei Sesel. Zot in *boycott* vaksen. Dekouraz nou ouver *airport* boner pou

akimil reveni. Dekouraz nou fer proze lenfrastruktir.

Demann tou keksoz ki ansyen ladministrasyon pa'n kapab fer pour rezon ki zot konnen, me pa oule admet sa realite mank resours e move zesyon reveni nasyonal.

Parti minoriter Mr Speaker dan Lasanble, zot pa'n zanmen aprouv Bidze Nasyonal pei dan sa 4 an ki'n pase. Zot in oubliye sa ki Sesel i ankor sa gran pei losean avek pe resours e vilnerab. Zot in oubliye Mr Speaker ki pti Sesel i ankor vilnerab.

Onorab pa'n klarifye ek sa Lasanble letan i pe dir viv dan dinyite. Egzaktaman kwa ki i pe demande? Kwa ki'n ganny arase? Onorab pa'n dir nou ki Sekirite Sosyal in ganny koupe. Ki pansyon in ganny koupe. Ki lasistans *carer* in ganny tire. Ki si pa ti 15 lo 10, nou sitwayen aze ti pou kontinyen depan lo kapris Prezidan.

Onorab pa'n dir nou ki *Home Care Repair Scheme* pour *Elderly* in aboli Mr Speaker. Ki *PMC* i nepli donn *loan* sitwayen aze Mr Speaker. Ki *Welfare Scheme* in aboli. E ki nou Gouvernman in vyol *Charte Nasyon-z-Ini* Drwa Imen, ki letan Gouvernman *LDS* in vin o

pouvwar, in negliz bann trwazyenm-az.

Mr Speaker, Gouvernman *LDS* ek son sipor absoli dan Lasanble in servi son mazorite pou amann Sapit 3 Parti 1 Konstitisyon Drwa Imen Mr Speaker. Tou sa bann drwa Mr Speaker, i ankor la.

Mr Speaker, dan konteks sa mank respe pour bann sitwayen aze par parti minoriter, ler nou bann dimoun aze in enstri nou pa depans tou, met 2 sou de kote pour letan dir.

Mank respe pour nou bann zenn ki pe etidye e konpran ki se atraver travay dir ki zot rev pou ganny realize. Mank respe pour tou travayer Seselwa. Sa ki pe travay dir, swa dan sekter prive, sekter piblik pour lannen apre lannen pou soutenir zot fanmir.

Mr Speaker, dan sa konteks sa refleksyon e mank konsistans, balans rezonnman realis e kredibilite atraver aksyon loter Mosyon e son parti ki mank respe zeneral pour bonn governans.

Mr Speaker, mon pa pou siport sa Mosyon. Mon pa pou siport sa Mosyon, akoz Gouvernman i fer firamezir ki lekonomi i permet. Soulaz lavi

tou Seselwa, enkli gard lavi diny pour nou bann sitwayen aze.

Prezidan e parti *LDS* i konekte ek pep Seselwa. Si non Prezidan pa ti pou konsistan ek partaz benefis. Mon anvi dir ek pep Seselwa ki annou swiv byen sa ki pe pase. Sirtou o nivo enternasyonal ki pou annan en lenpak lo lekonomi pei e lo reveni lafanmir. Fer li prepar zot pou reazir boner. Pou re aziste fason fer pou ansanm ek Gouvernman mentenir sa lelan soutenabilite.

Parti minoriter, aret zwe lo febles e lemosyon piblik ek bann Mosyon ki letan zot ti dan Gouvernman, zot ti anmenn lamannman pou demann Gouvernman pou kontinyen fer. Akoz dapre zot, zot Gouvernman ti pe deza fer.

Annan en pe kredibilite. Pa depriv zot lespri pou krwar ki se zis zot ki konekte e ki merit gouvern pei. Mersi Mr Speaker.

(APPLAUSE)

MR SPEAKER

Mersi Onorab. Laparol pour Onorab Norbert Loizeau.

HON NORBERT LOIZEAU

Mersi Mr Speaker. Bonzour tou Manm. Bonzour tou dimoun ki a lekout, spesyalman bann

zabitan Bel Air, bann dimoun aze ki pe ekout nou. E byenveni ankor bann zabitan Roche Caiman ki'n retourn dan Galeri pou ekout bann lentervansyon lo sa Mosyon anmennen par zot Onorab.

E Mr Speaker, Mosyon li menm, mon pa war naryen dan sa Mosyon. Akoz Mosyon, sa ki Mosyon pe demande Mr Speaker, Gouvernman ozordi pe aktyelman fer. Tou sa ki i pe demande, nou konman en Gouvernman nou pe fer. Me zot, zot pa war Mr Speaker. Akoz?

Enn; konman en Lopoziyon, zot pa partisip dan naryen. Menm ou envit zot pou partisip dan en keksoz enportan, zot pa vini. Prezidan i fer miting piblik pou konn konsern bann dimoun Roche Caiman ki la anler Mr Speaker.

Loter Mosyon ki Onorab Elekte i pa vini parmi sa bann dimoun pou konn konsern sa bann dimoun. Selman i vini i dir avek Lasanble ozordi atraver Mosyon, ki bann dimoun Roche Caiman zot mizer. Zot pa pe viv dan dinyite.

Ennler ou a dir zot pe mor lafen Mr Speaker. Mr Speaker, be mwan mon'n get la anler, mon pa'n war enn bann dimoun Roche Caiman depi bomaten ki'n tonm feb!

(APPLAUSE)

HON NORBERT LOIZEAU

Be zot in tournen la zot pe asize!
Lekel ki'n tonm feb antre zot?
Mon pa war. Tou i la!

(laughter)

HON NORBERT LOIZEAU

Zot in manz en pti keksoz kot zot. Mr Speaker, ki mannyer nou kapab ensilte nou bann dimoun aze konmkwa zot mizer, zot pa pe viv dan dinyite, zot lafen, *men?*

Mr Speaker, be sa bann dimoun zot in travay. Si ozordi zot in aze, eski zot bezwen ganny ensilte zot pa pe viv dan dinyite? Mr Speaker, pourtan Minister Lafanmir pe fer otan bann program pour bann dimoun aze.

Bann dimoun Roche Caiman zot pa konnen ou konnen aköz? Zot Onorab pa enterese pou partisipe pou dir zot ki pe arive!

(APPLAUSE)

HON NORBERT LOIZEAU

Se sa ki pe arive ozordi dan Roche Caiman. Mon'n sorti Roche Caiman dan *blitz* semenn pase. Me mon'n zwenn dimoun

Roche Caiman mwan. Mon pa'n war okenn dimoun ki pe mor lafen Roche Caiman mwan.

Mr Speaker, be bann dimoun pe viv zot lavi aköz zot konnen sityasyon pei mannyer ti ete. E bann dimoun Roche Caiman bann dimoun ki travayant. Zot debourye Mr Speaker. E tou sa bann program ki Minister pour Lafanmir pe fer, i anglob zot tou ladan.

Eski zis larzan – zis larzan ki pou fer sa bann dimoun Roche Caiman, nou bann dimoun aze dan Sesel viv an dinyite? Larzan i en konponan Mr Speaker. Be sa bann program ki pou soulaz zot, anmenn zot fer en pti vizit, partisip dan en pti keksoz. I fer zot viv dan dinyite sa. Lopozisyon ozordi zot *issue* se zis larzan, larzan, larzan.

Eski larzan i pou telman anmenn boner si dan ou fanmir ou annan en ta kalite konplikasyon lavi, ki parey nou konnen?

Mr Speaker, mwan en kestyon mon pe demande mwan, eski sa Mosyon i en Mosyon ki'n vin devan Lasanble pour nou kapab anmenn dinyite pour nou bann dimoun aze, sirtou bann dimoun Roche Caiman ki la anler?

Ouswa i en Mosyon ki'n vini pour en rezon politik pou servi bann dimoun aze pou fer politik bonmarse, maltret Gouvernman e dir ki Gouvernman pa pe fer naryen? Kan i annan bann program. E zot, zot pa pe partisipe pour zot konnen ki program Gouvernman pe ganny arive.

Mr Speaker, eskiz mwan mon en pti pe eksite ozordi letan mon pe koze, akoz parey mon'n dir, tou sa bann keksoz pe fer. *Ok?* Pe fer Mr Speaker. E nou Gouvernman pou kontinyen fer.

Mr Speaker, en keksoz ki nou bezwen konpran, pour ki nou bann dimoun aze i viv dan dinyite, i langazman tou Gouvernman ki vin o pouwar. Napa en Gouvernman ki pou dir zis li ki kapab fer sa pour dimoun aze. Tou keksoz ki annan pou fer ek dimoun aze, tou Gouvernman ki pou vini, pou fer.

Akoz i annan sa kontinyite lo bann program pour bann dimoun aze, ki en Gouvernman in kite e ki lot Gouvernman i kontinyen lo la e fer pli byen. Me en keksoz ki mon anvi demande Mr Speaker, eski zis Gouvernman ki bezwen fer sa? Eski zis Gouvernman ki bezwen fer nou bann dimoun aze viv

dan dinyite? Mr Speaker, mwan mon dir, non.

Koman bann zanfan, ki nou rol anver nou bann dimoun aze? Anver nou vye manman? Anver nou vye papa ki'n sonny nou, ki'n diriz nou, ki'n fer nou vin sa ki nou ete? Mr Speaker, se zot ki'n bers nou dan lebra parey dimoun in dir; ki'n diriz nou pour nou kapab vin sa ki nou ete ozordi.

E mwan mon enn, mon fyer Mr Speaker. Akoz si mon'n ariv la ozordi se mon vye manman ek mon vye papa ki'n mor en pe letan pase. Me selman pandan sa bann letan Mr Speaker, nou ti anmas zot. Nou ti soutenir zot. Nou ti donn zot lanmour. Akoz sa ki fer en vye paran viv dan dinyite. Se sa lanmour lafanmir.

Mr Speaker, ozordi – ozordi ler nou get nou e ler mon get loter Mosyon, Mr Speaker, in vin ek en Mosyon. Ozordi i *MNA*. Son manman ek son papa in diriz li. Ozordi mon fyer.

Mon konn li mwan Mr Speaker. I byen zenn. Mon konn li. Mon'n frekant Roche Caiman byen zenn mwan. Mon rapel li. E mon kontan ozordi Onorab Vidot in vin sa ki i ete ozordi Mr Speaker. Mon felisit li.

Eski aprezan Mr Speaker, ler nou'n ariv koumsa, nou pran nou vye manman nou pran nou vini nou fou o bor baro *State House* nou dir ek Gouvernman okip li, donn li ankor en pe larzan? Kan nou, nou kapab okip nou vye paran?

Mr Speaker, lontan lekel ki ti okip nou vye manman? Ti annan *carer*? Ti napa *carer*. Mon asir ou parmi la anler, i annan enn ki li ler in sorti travay in taye pou li vin okip son vye manman. In fer sir ki son zanfan i sorti lekol boner pou vin okip son vye manman, akoz li i bezwen debourye. Ti annan *carer*? Kote ki ti annan *carer*? Nou ki ti okip nou vye paran.

Ozordi tou dimoun i le en *carer*. Ozordi en zenn fiy 23 an for Mr Speaker, ki sipoze dan en lanplwa formel pou kontribye pou peye pour lekonomi ogmante Mr Speaker, ozordi i dir ou i anvi vin *carer*. 23 an ou sipoze dan en lanplwa. Vin en profesyonnel, travay, ou le vin en *carer*? Mr Speaker, be kot nou pe ale?

Mr Speaker, e sa, pa'n fek konmans la sa. Ou konnen kantite letan sa in konmanse? Mon asire bann dimoun Roche Caiman zot konn sa byen kler

Mr Speaker. Sa en pe letan in arive.

Mwan dan mon fanmir Mr Speaker, nou fer sir – nou fer sir ki tou nou bann vye paran, nou bann tantin, nou manman Mr Speaker, nou'n fer li dan mon fanmir ki i en lobligasyon pour tou nou bann vye dimoun i viv dan dinyite. Nou okip zot. Nou vizit zot. Nou fer tou sa ki annan pour zot Mr Speaker. Mon annan temwen la i kapab dir ou pe asize laba devan, mon neve. Nou fer sir Mr Speaker ki zot viv dan –

Ou konnen akoz? Se pa larzan ki fer nou vye paran viv dan dinyite. Se lafanmir ki anmenn zot dan zot vye zour. Ki anmenn zot dan zot vye zour, donn zot sa konfor, fer zot *happy*. E ler zot *pass away*, zot *pass away* parmi fanmir. E zot al byen Mr Speaker. E se sa keksoz ki nou, nou fer konman en fanmir. Gouvernman i fer son bout e nou konman fanmir nou, nou fer nou bout.

Mr Speaker, partou kote dan lemonn nou pe koz lavi ser. Lavi i ser. Nou fek sorti Lasin Mr Speaker ansanm avek Onorab Pillay, eski i bonmarse? Pourtan nou koz Lasin labous plen.

Ou aste en keksoz 100 *Yuan* i vo R200 larzan Sesel. E

parfwa mon demande ki manner bann Sinwan zot sirviv ler ou get sa dekalaz, konmsi larzan ek pour nou. Onorab Pillay i rapel. Nou'n ale nou'n aste en konmisyon. Ler nou gete, i doub. Si ou pe pey li R800, savedir ou pe pey li R1600 larzan Sesel. Me partou i ser.

Me selman Mr Speaker, ou war nou bann dimoun aze Lasin pe marse pe vin mandyan lo semen? Non, Mr Speaker! Tou dimoun i travay. Lasin dimoun i travay ziska ler ou nepli kapab, si ou anvi. E nou Sesel non. Nou anvi toultan ler in ariv – nou ava arete. Gouvernman a *take care* ek nou.

Mr Speaker, ou konnen sa prensip ki Gouvernman *US* ti'n dir avek nou bann dimoun. Nou pou *take care* ek ou *from cradle to the grave*. Konmsi depi ler ou'n ne ziska ler ou mor. Be ou? Be ou konman sa endividi, kantmenm in dir sa, nou pa fer en keksoz pour nou kapab ed nou en pe plis?

E pa bliye Mr Speaker, ler nou ti pran pei. Be i ti lo son zenou. Nou ti pran pei dan letan *COVID* Mr Speaker. E tou keksoz – e nou lekonomi pa ti sitan parey i ete. E ozordi nou pe dousman, dousman nou pe fer li monte.

E aköz nou pe fer li monte deswit zot in vini, nou partaze diverti kontan parey zot ti fer avan? Parey nou ti dir zis ouver tiyo. *ASP* desann, tou dimoun vini, pran zot larzan ale, kantmenm ou kapab travay. Kantmenm ou kapab travay, pa travay. Vini mon a sonny ou *from cradle to the grave*. Vini.

Mr Speaker, i annan dimoun ozordi nou bezwen ankouraz zot. I annan dimoun ki – nou bezwen onnet ek nou lekor. I annan dimoun ozordi ki kalifye en Pansyon Sekirite Sosyal, dan zot lavi zanmen zot in deza travay, zot in deza kontribye.

Be pa zot pe gannyen? Eski i en pratik ki nou bezwen kontinyen fer? Nou pa merit ankouraz nou bann dimoun pou antre dan lanplwa, kontribye? Ki en fason nou'n ariv 65 an nou a kapab konmsi ganny en pansyon avek dinyite? Pour lapenn ki nou osi nou'n kontribye Nou pa'n zis asize?

Mr Speaker, be sa bann keksoz ki nou merit avans devan. Sakrifis Mr Speaker, tou dimoun i bezwen fer. Mwan mon fer sakrifis. Nou tou nou fer sakrifis.

Mr Speaker, en keksoz ki mwan mon panse ki dan lepase pa'n ganny fer e Gouvernman

presedan avan pa'n fer, se ed tou sitwayen Seselwa pou planifye zot retreat.

E sa Onorab Gervais Henrie toultan i dir mwan sa. Dan nou *Caucus* toultan i dir. Nou pa'n ed nou dimoun pou planifye nou retreat. Par kont Mr Speaker, i annan dimoun ki pa'n depan lo Gouvernman pou ed zot planifye zot retreat. Zot in planifye zot retreat. Be ozordi zot pa pe konplent. Ozordi zot pe viv dan dinyite.

Mr Speaker, mon konn en madanm tou le swar mon war li - en madanm R75 an. Onorab Georges i konn li. Sa madanm i planifye son retreat. Sa madanm pa demann naryen. I *happy*. E mon a akont zot en keksoz enteresan ki'n arive ki mon'n al kot li.

ASP i *call* i dir larzan sekirite sa madanm in retourn lo kont *ASP*. Sa madanm degre in planifye son retreat Mr Speaker, i pa konnen si sa in arive. I pa konnen.

Mwan ki mont kot li mon vini mon dir; “madanm, i annan en *issue* in arive. Ou larzan i retourn kot *ASP*”. Aprezan la i dir mwan. I dir mwan; “Onorab, akoz mon'n refer mon kont ek mon ser. Akoz mwan mon laz, pour mon ser kapab okip mon

kont. Kekfwa sanmenm sa ki'n arive”.

Mwan ki ale ki dir li. Me sa madanm in planifye son retreat. I pa ni bezwen sa pti R5 mil ekek. I bezwen li Mr Speaker. Selman in telman planifye son retreat ki malgre i pa'n antre, i pa en problemm pour li, akoz i konnen i pou sirviv.

Mr Speaker, ozordi nou pe koz logmantasyon pansyon sorti 63 an pou vin *55 an. Konmsi sa en mister ki'n arive konmsi ki Gouvernman *LDS* in fer.

Mr Speaker ozordi, si zot la dan sa Lasanble zot tou ki la, se gras a Prezidan Faure. Mon dir li Prezidan Faure, akoz mon kontan akoz mwan mon annan en lanmitye enkrwayab ek sa msye. Se Prezidan Faure, son Ladministrasyon ki zot, zot ti anba la ki ti pronons sa premye kou Mr Speaker.

E zot, zot ti la dan Lasanble zot. Dan 6enm Lasanble. Personn pa ti dir naryen Mr Speaker. Personn pa ti dir naryen. Zot ti kontan. Mon asir ou konmela Prezidan Faure ti'n ganny eleksyon, ti pou *ok* 65 an. Ti pou napa problemm.

Akoz nou nou'n vini. Gouvernman i annan en kontinyasyon. Nou kontinyen e nou'n war ki sa i enportan. Akoz

si nou pa fer li, pou napa kontribiter pour bann dimoun Roche Caiman ki la dan galeri.

Zot pa pou gannyen en pansyon akoz pou napa kontribiter pou kapab ganny sa larzan pou pey zot mon bann frer e ser Roche Caiman. Zot pa ti pou gannyen. Se pour sa rezon ki sa Lalwa in vini pour nou kapab fer sa.

E ozordi sa menm group dimoun ki pe asize dan Lasanble anba non Prezidan Faure, zot, zot fou en koudpye ladan. Zot akiz sa – konmsi Prezidan Faure i en naryen ditou. Sa ki i dir pa fer sans. Selman i ti zot Prezidan sa letan.

Mr Speaker, Lepep Seselwa i konn tre byen lekel ki'n lager. Lekel ki'n lager pour zot pandan tou sa bann lannen. Dan tou sa bann lannen pase, ler zot ti o pouvwar, zot pa ti tande sa zafer fer ogmantasyon monte. Get nou bann dimoun. Get nou bann travayer Seselwa.

Mr Speaker, ler nou ti dan Lopoziyon. Ou rapel byen Mr Speaker, ou'n ladan avan mwan. Mwan mon'n vini pou kontiny sa travay ansanm ek ou. E ozordi mon fyer ou Speaker Mr Speaker. Mon fyer mon'n *travel* ek ou Lasin. Mon *happy* ozordi.

Ou *deserve* sa pozisyon kot ou ete, malgre ou pe ganny lensilt. Ou'n travay pour ki sa pei ozordi in sanze i ariv kot i ete.

Mr Speaker, mon rapel byen. Sa bann letan dan bann lannen 2015. Pa ti dan Lasanble nou Mr Speaker. Mon ti pe *struggle*, ansanm avek Onorab Arissol, Onorab Henrie.

Sa bann letan nou ti lo en *pick-up* Mr Speaker. Nou ti pe pas partou. Nou ti pe koz ek dimoun. Nou ti pe fer tande nou lavwa akoz nou, nou pa ti dan Lopoziyon. Nou ti napa en lavwa dan Lopoziyon. Zot ti antyerman 25-0, 26-0 zis zot. Me naryen sa bann keksoz pa ti ganny fer.

Mr Speaker, nou ti koz lo logmantasyon. Nou ti koz lo Sekirite Sosyal ki ti R3 mil 250 sa letan. Nou ti dir fer monte pou vin R5 mil. E ler i ariv R5 mil, si i annan 2 zot. 2 dimoun aze ki pe reste ansanm a fer zot R10 mil. Zanmen nou'n dir donn R10 mil. Mon'n tann Onorab Lemiel dir taler. E mon ti a kontan zot rod sa *verbatim* ki dir nou dir donn R10 mil e montre nou Mr Speaker.

Mr Speaker, nou lager for. Nou'n koz lo *minimum wage* ki ti R3 mil 50. Nou ti dir fer monte fer li vin R5 mil. Mon panse

bann dimoun Roche Caiman i rapel. I rapel tousala Mr Speaker. Bann ki ti ganny R800 – R8 mil, pa tir taks lo la. Tir taks par lao an plis. Par lao sa R8 mil si zot gannyen. Mr Speaker, tousala nou ti fer.

Mr Speaker, zot ti annan en mazorite absolli. Ou konnen ki zot ti dir? Mr Speaker, mon rapel tre kler. Zot ti dir nou ki nou fou! Mr Speaker, zot ti dir nou ki nou fou. Mon panse si zot pa pe fou ozordi, zot pe demann sa Mr Speaker, akoz nou ti ganny dir nou pe fou. Labwet pouri Mr Speaker. Kot pou gannyen? Nou pa responsab. Nou en Lopoziyon ki pa responsab.

Akoz? Nou ti demann larzan Mr Speaker, pour sa bann dimoun Roche Caiman ki pe asize anler pe get nou. Nou bann dimoun aze.

E pour bann dimoun Bel Air. Nou bann dimoun aze Bel Air. E bann dimoun ti pe ganny *minimum wage*. Tou dimoun partou dan Sesel Mr Speaker, nou ti ganny deklare fou. Pa konpetan. Pa responsab. Pa konnen ki nou pe fer.

E ozordi mon panse Mr Speaker, vi ki zot dan Lopoziyon, zot osi zot pa konpetan. Zot pa kapab. Zot pa

responsab. E zot fou parey nou, nou ti fou Mr Speaker.

Mr Speaker mon dir sa akoz ler zot ti dir sa, mon leker ti fermal Mr Speaker! Me avan eleksyon Mr Speaker, ki nou ti war? Nou pe koz eleksyon la. La Bidze pe vini. Nou pou al donn larzan avan eleksyon.

Mr Speaker, sa bann letan avan eleksyon zot ti fer ogmantasyon. E sa bann letan avan Mr Speaker, pour en dimoun aze ganny en logmantasyon, fodre zot bezwen esper laniverser Mr France Albert Rene.

Mr Speaker, pour zot ganny konbyen? R50 zour son laniverser. Zot ti bat lanmen malgre pa ti ase, zot ti bat lanmen akoz sa letan personn pa ti annan drwa dir naryen. Mon donn ou R50, pran ou R50 ale.

Mr Speaker, koumsa keksoz ti ete. Mon pa pe envant larou parey zot dir mwan. Akont keksoz mannyer ti ete. Me sa bann letan Mr Speaker, ler bann dimoun – ler bann dimoun Roche Caiman ki ozordi zot dan Galeri, bann dimoun aze ti pe ganny sa R50. Zot, zot ti pe pran de milyon. Zot ti pe fer laferm Lostrali. R50 milyon perdi zis pou fer Vilaz

Perseverance. R4.5 milyon perdi koumsa!

Zot bann dimoun Roche Caiman e tou Lepep Seselwa, bann dimoun aze konbyen zot ti pe gannyen? R50 le 16 Novanm. R50 logmantasyon. E nou ler nou ti lager dan Lopozisyon, nou'n fer ki dimoun in ganny 5 mil. E i annan en lalis la. In sorti 5 mil in vin R5 mil 700.

E la Mr Speaker, nou Prezidan ki kontan tou nou vye dimoun. Wi, zanmen in fer en rasanbleman pour bann dimoun aze. I pou al fer li. Kontan pa kontan, Prezidan pou al fer li an Oktob e tou nou bann dimoun aze pou vini pou vin partisipe. E i pa pou donn zot R50 li.

Pa son laniverser. I pa pou donn zot R50. E dan Bidze ler i vini in fini prononse ki pou annan en keksoz pour zot mon bann frer Roche Caiman, mon bann ser dimoun aze. Tou dimoun dan Sesel, bann dimoun aze ki'n pran retret. Prezidan in dir pou annan en keksoz pour zot.

Mr Speaker, si nou kont koze, nou pou koz en kantite. Pa ni menm 5 an o pouvwar Mr Speaker. Nou'n fer ki tou dimoun in ganny 10poursan lapey. Pa ni menm 2 an Mr

Speaker, nou'n fer sa. Pa 43 an Mr Speaker.

O firamezir ki pei i fer byen, Prezidan in dir nou pou partaz larises avek Lepep Seselwa. Me selman Mr Speaker, nou pou bezwen fer li byen. Nou pa pou fer li an fou kot apre nou pou andete.

Me sa ki enteresan Mr Speaker, Madanm Caroline Abel in dir depi ler Gouvernman in antre o pouvwar, nou'n pran larzan prete Labank Santral, 1 fwa! Mr Speaker savedir i montre nou'n vin en Gouvernman ki responsab.

Ozordi Mr Speaker, ler nou pe koz lo sa 10poursan lapey, i annan politik ki pe ganny fer atraver bann Manm lo kote US. Ah la zot pe al donn 10poursan lapey zot lekor.

Mr Speaker, me an deor sa *Chamber* dan koridor, dan *toilet*, en ta koze i ganny koze. Kot i annan pe dir;

“en, kan sa dil pou anvoye?” Zot dir Mr Speaker.

“En, larzan i fay *men!* Larzan *MNA* i fay *men*. Kan sa zafer pou vini?”

Mon anvi dir ek dimoun Roche Caiman, sa 10poursan ki Gouvernman pou donner ki'n donn bann dimoun, zot osi zot pou pran. Selman zot pou fer politik avek. Selman zot koze,

pa ase. Zot pa dir zot sa zot. Zot vin dir dan Lasanble, zot fer politik.

Mr Speaker, an terminan mon anv i dir ki sa Mosyon pou mwan i pa fer sans. Akoz i pa fer sans? Mr Speaker, in dir – sa Mosyon in dir ki i pe demann Gouvernman pou fer ki bann dimoun i viv plis dan dinyite!

Savedir, bann dimoun aze pe viv dan dinyite. Zis selman nou bezwen kontinyen fer plis pou fer zot viv pli an dinyite. Me selman Mr Speaker, lafanmir i bezwen zwe en rol. Bann zanfan i bezwen zwe en rol Mr Speaker. Zot bezwen zwe en rol, ou konnen akoz?

Akoz i annan zot ou konnen ki zot fer? Zot pran zot vye paran zot met dan *Home*. Zot, zot reste dan lakaz zot vye paran. Apre ki zot dir? Zot paran pa pe viv dan dinyite. Selman ler zot vye paran i *pass away*, zot tou zot vin lager byen sa tantin ouswa sa tonton. Selman zot, zot pa'n fer naryen pou li. Se Gouvernman ki'n anmase in fer dan dinyite.

Mr Speaker, e nou konman Gouvernman, malgre sa pe arive nou pou kontinyen fer li. Nou pe refer tou bann *Home* ki ti'n tonm an rin. Tou bann *Home* ki'n tonm an rin

nou pe re fer pour ki nou bann dimoun aze i viv dan dinyite.

Onorab Desheila Bastienne i dir mwan kit en pe pour li. Pa dir bokou Mr Speaker. Mon ava kit en pe pour li.

E mon anv i dir Mr Speaker ki sa Mosyon pa fer sans. Enn; akoz tou sa ki sa Mosyon pe dir, Gouvernman pe deza fer. E o firamezir ki pei i bouz devan, nou larises pei i grosi, nou pou fer plis ankor Mr Speaker. Mersi pour sa detrwa pti letan ki ou'n donn mwan.

MR SPEAKER

Mersi Onorab. Bon, nou'n ariv ler pou pran poz. Nou en pti pe an retar. E Manm bann *Assembly Business Committee*, pa bliye poudir nou annan *meeting*. So, nou a remet ler pour nou rebran 2 er 15. Mersi.

(BREAK)

MR SPEAKER

Bonn apre midi tou Manm. Bonn apre midi nou *staff* e tou dimoun ki pe swiv nou. Nou a kontinyen lo deba lo Mosyon e laparol i prezan pou Onorab Desheila Bastienne.

HON DESHEILA BASTIENNE

Mersi Mr Speaker. Bonn apre midi Mr Speaker. Bonn apre midi tou koleg Onorab e bonn apre midi tou dimoun a lekout.

Mr Speaker, Mosyon i lir koumsa; - "Sa Lasanble pe demande ki Gouvernman i fer le neser pou nou bann dimoun aze viv dan plis dinyite."

Mr Speaker, Gouvernman in toultan fer son mye pou satisfere e siport tou bann dimoun aze dan Sesel antye san okenn preferans.

Lager ti komanse depi 2016 pour ki Sekirite Sosyal i vin R5 mil e la sa letan *Leader* Lopozisyon Mr Wavel Ramkalawan, ki ozordi Prezidan Sesel, ti fer byen resorti ki si dan en lakour i annan imsyè avèk madanm i a fer en sonm 10 mil ki a permet zot byen kalkil zot depans e i a permet zot viv en lavi dan dinyite.

Prezidan Ramkalawan ti lager ki pansyon i vin R5 mil apre ki zot ti'n kaye lo R3 mil anba Gouvernman Lepep *US* pou 3 an, me Prezidan Lepep *US* ti dir ki en Gouvernman iresponsab ki pou fer pansyon mont R5 mil. Eski nou'n bliye sa? Ler nou koz viv dan dinyite i osi enportan ki nou fer li kler ki rol Gouvernman e ki rol manm lafanmir zot osi.

Pou en dimoun viv dan dinyite i pa sipoze depan zis lo en Gouvernman. Mr Speaker i bon note ki nenport Gouvernman ki pou o pouwar i pou fer son bout. Wi, mon pou repete ankor nenport Gouvernman ki pou o pouwar i pou bezwen fer son bout me lafanmir zot osi zot pou bezwen fer zot bout.

Mr Speaker, loter Mosyon pa'n anvoy okenn mesaz pou lafanmir bann dimoun aze pou dir, ki zot osi zot annan en rol pou zot zwe akote zot dimoun aze. In larg tou lour lo zepol Gouvernman, annan dimoun aze ozordi ki pe viv dan dinyite san okenn sipor Gouvernman, akoz zot in konn prepar zot letan zot ti annan sa fasilite dan zot zenn tan. Zot fanmir, zot zanfan in la dan zot kote pe siport zot e pe montre zot sa lapresyasyon.

Mr Speaker, ler mon manman pa kapab al lopital, i *call* enn son zanfan pou anmenn li lopital. Si pa ti li nou pa ti pou la dan sa bann gro, gro loto, gro, gro *jeep* ki nou annan. Alor ler i bezwen nou led nou osi nou bezwen rekonnèt ki poudir nou bezwen rann sa servis nou paran.

Ler nou pase dan nou gro loto e nou kit li ater lo *bus stop*,

i a pe esper bis e nou, nou fer konmsi sa napa naryen pou fer, nou pa konn li e i pa nou paran, eski pa en fason kot nou menm nou koman zanfan nou pe fer zot perdi zot dinyite?

Ler mon manman i kapab pey son linet- i pa kapab pey son linet i koz avek enn nou ki kapab fer li pou li, i pa blanm ni Gouvernman i pa lager larzan, i pa lager taksi i pa lager ni pou dir ki poudir manze i ser, napa latizann me akoz li menm li i remarke ki poudir Gouvernman pe deza fer son bout, alor sa ki li i pa kapab arive fer i annan son fanmir pou li pran rekour avek.

En paran i donn nesans son zanfan, i fer son zanfan grandi, i anvoy son zanfan lekol, akoz i mazin en ki demen i pou kapab ganny en led an retour.

La Mr Speaker, la mon pou dir napa okenn leskiz. Nou pa sipoze nou vin la fer leskiz pou okenn manm lafanmir, pou okenn zanfan kot pou zot kapab ganny toultan sa lespas pou zot kit zot vye paran deryer e dan plas donn sa legzanp ankouraz sa bann zanfan ankouraz zot osi pou zot osi fer zot bout akote Gouvernman.

Nou pa pou kapab zis vin donn lord Gouvernman ki

manner i pou fer e kan ki i pou fer?

Nou paran in trimouse, mon realize ki poudir nou paran ti trimouse pou fer nou grandi. Akoz ozordi nou pou bezwen rod leskiz pou ler i bezwen nou, ler i tap nou laport pou nou reponn "arr nou annan *loan*, nou dwa isi, nou dwa laba, nou pa ankore pey nou bil e nou senpleman larg tou lo zepol Gouvernman?

I annan bokou zanfan ki mon konnen i fer sa, i dir ek li be si ou sekirite pa ase mwan mon annan mon problem, si ou sekirite pa ase, anmenn ou problem devan Gouvernman. Me non, nou bezwen realize osi dan lavi ki nou zanfan, nou fanmir, nou osi nou bezwen zwe nou rol.

Mwan mon toutafe dakor Mr Speaker, ki apre tou sa bann keksoz ki Gouvernman pe fer pou nou bann dimoun aze, i pou kontinyen pran son responsabilite e i pou fer tou sa ki i kapab tan ki i pou la o pouvwat.

Mr Speaker, atraver bokou keksoz ki Gouvernman pe fer bann sitwayen aze mon kapab nonm enn de, tel ki enkli bann *senior* dan bann kozri e dan serten diskisyon e donn zot sa platform pou montre bann

zenn bokou travay lar dan zot letan.

Montre nou dimoun aze ki malgre zot pe tous zot pansyon, zot ankor kapab al fer bann laklas, bann pti travay akote, tel parey montre ladans, koud, lakwizin Kreol, montre bann zenn sant romans ek bokou lezot keksoz ankor.

Pou bokou nou bann dimoun aze zot vreman santi zot fyer, letan zot pe donn zot letan pou edik nou bann zenn lo bann bon valer. Sa i montre ki nou apresye bann keksoz ki nou bann dimoun aze in deza fer oparavan e ki ziska ozordi nou montre zot ki nou ankor bezwen zot servis e ki nou montre zot sa bann lapresyasyon atraver donn zot sa sans, pou zot osi defoule epanouir parmi bann zenn.

Ozordi diferan Minister pe lans lapel pou bann aze ki ankor annan sa lenerzi pou vin devan e vin kontribye dan nenport fason ki zot kapab. Mr Speaker, Gouvernman i fer sir ki nou bann sitwayen aze i kapab depanse, an servan transpor piblik. Gouvernman i asire ki dimoun aze i ganny zot tretman medikal *free* e zot latizann osi *free*.

Ler nou dimoun aze, oubyen manm nou fanmir i

ganny dir ki sa latizann napa, al kot en farmasi ou a gannyen, sa i pa arive zis dan Sesel sa i arive partou dan plizyer pei, kot dimoun i bezwen al dan en farmasi pou zot ganny serten latizann.

Me dan sa ka isi dan nou pei kot nou bezwen peye ki nou fer nou? Ler enn nou dimoun aze i ganny anvoye pou al rod en latizann dan en farmasi, eski nou sot laba? Eski nou dir li Gouvernman ki sipoze pe donn ou sa latizann? Be nou komen fanmir ki nou fer. Oli nou responsabilite pou enn fwa?

Gouvernman in met an plas *Vulnerable Repair Scheme*, sa i en *Scheme* ki asiste zot avek serten reparasyon lo zot lakaz, lo bil *PUC* in annan en serten letan kot ti annan en rediksyon R300.

Ozordi sitwayen aze ki pa kapab fer bokou mouvman zonn koman fanm zot annan drwa annan en *carer*, e i ankor ozordi dan nou pei i annan lakaz pou bann sitwayen aze ki prefere zot trankilite i annan dan plizyer distrik. Me nou osi dir mersi Gouvernman pou bokou depans milyon e de milyon pou al aranz sa bann lakaz akoz zot ti'n zis ganny fer kit la e sa bann dimoun aze ti

pe viv dan en letan deplorab e dan rin.

Eski sanmenm sa byenfer ki zot in kot bann dimoun aze dan konfor e dan dinyite, ler nou donn sa bann dimoun en fasilite eski nou retournen demen pou gete ki mannyer sa keksoz pe ale?

E byento osi mon fyer pou dir ki dan Perseverance i annan en plan ki pou annan en lakaz-ki pou annan en *batch* lakaz pou bann sitwayen aze ki oule viv dan en konfor otreman e ki pou ganny konstri anba Gouvernman LDS.

Sa i osi kler ki sipor anver nou bann dimoun aze atraver divers form i egziste dan nou pei Sesel, Mr Speaker ozordi i annan bokou keksoz ki Gouvernman in met a dispozisyon nou bann sitwayen aze, me ki nou war?

Bokou labi, la mon pou koz lo Sekirite Sosyal li menm, zanfana, zenn ki pa oule travay e zot kal lo zot vye paran, zot anmenn tou zot zanfana kot sa granmanman, granpapa pour ki li ki sonny sa bann zanfana e se la kot apre nou tann leokri Sekirite Sosyal pa ase, i tro ba, lavi i ser, fodre i monte sorti 500 pou vin pli ser.

Me si tou sa bann zanfana zot ti pran zot responsabilite sot

ti travay ozordi sa bann lour pa ti pou tonm lo nou bann sitwayen aze.

Avan ler ki nou koze avan ler ki nou dir ki poudir en dimoun aze pe viv dan en fason deplorab i napa manze eski nou'n al fer en letour kot sa bann sitwayen aze pou dekouver pou nou menm aköz zot pe viv dan sa leta, aköz zot Sekirite Sosyal pa ase?

Ler en garson, ou en fiy, ou en pti zanfana i al pran refiz dan drog kote i al kale lo sa vye dimoun, zot oule larzana pou aste zot drog, zot oule larzana pou aste sesi, sela, e lekel ki pe soufer? Se sa vye paran byensir aköz i a pe senpleman ganny abize.

Mr Speaker nou dakor pour ki Sekirite Sosyal i ganny ogmante e la fyerman mon pou dir, wi, nou Gouvernman in komet son lekor ki i pou ogmant Sekirite Sosyal tre byento, me otan ki i pou ogmant Sekirite Sosyal i annan keksoz ki nou osi nou bezwen realize reflesir lo la ki pli Gouvernman i fer monte Sekirite Sosyal, plis serten zenn ki lo sibstans i kontinyen kal lo zot vye paran.

E zot pou plis annan rezon la pou pa travay, kot nou fini lafors travayer i dimini, kontribisyon dan Fon pansyon

pa ogmante i desann dan plas monte e ki arive avek nou bann sitwayen ki zot, zot ankor pe travay, ki pe leve granmaten pou al debourye, ki pe reve pou zot pran zot retreat?

Eski la nou blanm Gouvernman ki i pa pe ed dimoun aze, ouswa nou koman *MNA* responsab akouz nou pa enplor sa bann dimoun ki pe abiz lo zot paran aze pou zot leve e zot osi al travay?

Mr Speaker, Gouvernman pa oule kot personn deryer. I fer tou dan son kapasite pou enkli tou sitwayen Sesel dan son plan menm bann ki'n pran refiz dan sibstans.

Parey Mosyon pe demande ki Gouvernman i fer le neseler pou nou bann dimoun aze viv dan plis dinyite, i osi enportan ki nou koman dimoun responsab nou donn en koudmen pou fer la diferans dan lavi sa bann dimoun aze. E sa se ler nou ankouraz nou bann zenn pou refer zot lavi e leve al debourye e zot osi zot a kontribye dan lasosyete e dan Fon Pansyon.

Fodre nou osi mazine ki ler nou koz viv dan dinyite i pa osi depann lo tou bon keksoz ki en dimoun aze i gannyen dan son lavi, son dinyite i osi depan lo fason ki i ganny trete,

Gouvernman i kapab donn tou me si nou koman zanzan koman pti zanzan nou fer nou paran ek nou gran paran vin koman en marspye, nou oule vol li, pas nou letan maltret li ensilte li, nou ale nou kit li tousel dan lakaz konmsi i napa fanmir sa i en fason kler kot zot war kot zot perdi zot dinyite zot osi.

Pou en dimoun aze viv dan dinyite, pa depan antyerman zis lo larzan, zis lo gro Sekirite Sosyal, me zot bezwen lanmour, zot bezwen respe, zot bezwen sipor, zot bezwen konprenezon, en pe letan pou koz avek zot, tir zot dan lakaz anmenn zot pas en pti letan lo en lans.

Tou sa bann keksoz i enportan dan lavi nou bann sitwayen, ler zot in ariv a en serten laz. Akouz parey zot ti bers nou, parey zot ti siport nou ozordi zot espekte de menm lo nou kote.

Mr Speaker, dinyite i osi enkli lo ki fason nou dimoun aze i ferm zot lizye e kit sa lemonn. Eski pou nou i normal ler enn nou dimoun aze in mor e nou tande i ti li tousel dan en lasanm? I ti lopital li tousel deryer en baravan, in mor dan kazern, ouswa dan nenport landrwa kot i pa'n war personn pou en dernyen parol?

La osi nou kapab demande oli son dinyite, eski Gouvernman ki ti devret la akote li, ouswa lafanmir ki ti devret pe antour li pe donn li sa dernyen lanmour?

Mr Speaker, an terminan mon pou dir ki Gouvernman in fer tou pou siport dimoun aze isi dan Sesel e i ankor pe rod plis loportinite pou kontinyen siport bann dimoun aze e donn zot, zot dinyite ki nesaser.

Me Lopozisyon in telman perdi dan zot *ego* pou retourn o pouvwar. Zot pe telman lager pou zot prop benefis ki zot in perdi dan larealite vizavi tou sa bann keksoz ki Gouvernman pe fer pou rann lavi nou dimoun aze konfortab. Pou mwan, sa Mosyon i zis en kanpanny pirman politik dezespere.

Dimoun aze i war kler. Dimoun aze i konnen ki zot bi, dimoun aze pa pou tonm dan okenn latrap ki nou pou fer desann laz pansyon akoz zot pa pou kapab fer li.

Dimoun aze pa pou tonm dan zot latrap mon pou fer monte Sekirite Sosyal pou vin R10 mil akoz dimoun aze pa anviv viv zot dernyen moman dan regre ankor. Dimoun aze i dir ki zot pa pe les tonbe. Mersi Mr Speaker.

MR SPEAKER

Mersi Onorab. Laparol pou Onorab Porice.

HON DOYACE PORICE

Mersi Mr Speaker. Mr Speaker, tou mon bann koleg Onorab e tou dimoun a lekout espesyalman bann dimoun aze dan Sesel bonn apre midi.

Mr Speaker Mosyon anmennen par Onorab Vidot i lir koumsa; - “Sa Lasanble pe demande ki Gouvernman i fer le nesaser pou nou bann dimoun aze viv dan plis dinyite. ”

Mr Speaker i zis en mannev politik bon marse *US* pe fer pou sa bann pov dimoun aze. Mr Speaker viv dan dinyite wi, i en Mosyon ki nouvo Ladministrasyon *LDS* dirize par Prezidan Wavel Ramkalawan in deza pran kont depi in vin o pouvwar 2020.

Tou nou dimoun aze pe benefisye par R500 an plis ki zot 5 mil 750 ki zot ti gannyen menm si ti dan letan *COVID*, pa i pe ed zot viv plis dan dinyite? Kontinyasyon lo bis pour naryen pa i ed zot viv dan dinyite? 10poursan lo lapey bann *carer* ki travay avek zot, pa i ed zot viv dan dinyite?

Vulnerable Repair lo bann lakaz dimoun aze dan tou

distrik pe kontinyen, sa pa i pe ed zot viv dan dinyite?

Bann *Home* ki'n ganny neglize pou en ta letan pe ganny renouvle dan tou distrik ki annan en *Home for the Elderly*, tousala pe ed sa bann dimoun aze viv dan dinyite?

Loan R100 mil si zot anvi renouvle zot lakaz e zot pa tonm dan sa group *Vulnerable Repair* aktivite an plis ki Gouvernman i fer anba Biro *First Lady* i apel "*Hug In A Mug*." Apard ki aktivite ki fer par Ladministrasyon Distrik pa pe ed zot viv dan dinyite?

E pa bliye bann pti avan gou ki nou *MNA* sa kote latab nou fer pou sa bann dimoun aze pa i pe ed zot viv dan dinyite?

Mr Speaker mon pa konnen ankor ki fason ki Parti *US* pou fer sa bann dimoun aze viv dan dinyite pli byen ki zot ete konmela? Tou dimoun aze i annan en fanmir e mon asire ki laplipar fanmir pe ed zot dimoun aze e pe fer sir zot viv dan dinyite. *US* pe zis abes sa bann fanmir.

Mr Speaker, Gouvernman pe fer zot mye pou kontinyen revwar tou keksoz ki konsern dimoun aze apre ki zot in ganny neglize pandan 43 an zis bat zot latet avek R50 par zot per

fondater tou-le-z-an. Me pou mwan mon ti a kontan dir avek *US*, ki pa zis Gouvernman ki bezwen fer le neserer pou nou dimoun aze viv dan plis dinyite, nou annan bann fanmir, nou annan bann lezot Lazans Minister ki prive *NGOs* eksetera.

An plis ki sa Mr Speaker dan lavi nou pa bezwen esper nou ariv aze pou nou viv dan dinyite e osi nou pa bezwen zis Gouvernman pou fer nou viv dan dinyite. Premyerman osito ki nou komans travay, nou bezwen annan en plan pou nou lavi, si nou pou marye, ganny zanfan, fer nou lakaz, fer *savings* eksetera, pou nou kapab ler nou ariv dan sa laz retret kapab viv dan dinyite.

Ozordi nou annan dimoun aze ki kantmenm i ariv son laz i anvi kontinyen travay, akoz i ankor annan kouraz e i pe ganny en pti larzan an plis.

Mr Speaker viv dan dinyite se nou, responsabilite pou nou organiz nou retret, akoz ler nou ankor zenn nou bezwen mazine ki nou pou vye en zour. Nou bezwen planifye nou a long term, pa les nou ganny anbete par *US*. Annou pa mazin zis diverti kontan e annou pa zis mazine ki Gouvernman ki pou organiz nou ler nou pe vye.

Wi, Gouvernman i annan son rol ; fanmir zot osi zot annan zot rol e nou, nou osi nou bezwen mazin nou rol. Mr Speaker, par ler dan nou sosyete Sesel, ennler nou mazin tro bokou lo Gouvernman pou fer pou nou, sa i metod *US* pou li kontinyen ganny en vot.

Ozordi nou dimoun aze i osi prepar zot depar par pey zot *package* kot *Padayachy*, kot *SACOS* ouswa lezot groupman Lasirans.

I paret mwan ki dan lepase *US* tro dir dimoun ki Gouvernman ki pou organiz zot, organiz nou ler nou pran nou retreat kan sa pa vre ditou Mr Speaker. Krwar mwan i annan dimoun aze la deor ki'n fini prepar li san mazin Gouvernman ki pou ed li.

US i anvi sa dimoun aze mazin zis Gouvernman.

I annan dimoun aze la deor ki degre zot in pa war zot in tro bokou. Ler zot retrete zot al vwayaze lo bann zil aletranze e menm aste zot *package*, sa i montre nou ki zot pe viv dan dinyite.

Sa i fer mwan mazin Mr ek Mrs Victor Baie Sainte Anne ki zot pe viv dan dinyite organize par zot zanfan non pa par Gouvernman. Mr ek Mrs Payet zot 2 dimoun aze zot in pran zot

larzan retreat e zot in fer enn de pti *guest house* ki zot pe lwe, pou zot kontinyen viv dan dinyite non pa esper Gouvernman.

Mon konn detrwa koup aze Praslin ki avek zot 2 lapey dan en lakaz ki ariv zot R12 mil 500, zot organiz zot pou zot viv dan dinyite aköz zot konn zot priyorite dan lavi e pa *US* zot ki pou fer.

Me nou annan osi i avek sa larzan zot pa konn zot priyorite e zot esper Gouvernman pou fer zot viv dan dinyite, pou mwan Mr Speaker mon pa *believe* ki Sesel in ariv en staz ki nou sitwayen aze pou esper Gouvernman pou ed zot viv dan dinyite. Aköz letid in montre e nou vwar pou nou menm me pa *United Seychelles* pe zis bat latet sitwayen aze.

I annan paran aze ki pa kapab viv dan dinyite menm si Gouvernman pou ed li, set aköz zanfan i fer zanfan e anmenn kot li pou veye. *US* i konn sa byen. I annan ki reste ek zanfan ki dan drog e pe pran pou zot larzan la kot zot napa naryen pou ranmase ouswa pou pey zot *package*. *US* i konn sa tre byen.

Sa bann paran aze, fodre ki lazans konsernen i ede pou tir zot dan sa sityasyon. E fanmir osi zot bezwen realize ki

zot paran i bezwen viv dan dinyite e nou koman zanfan nou bezwen pran nou responsabilite pou fer ki nou paran aze pa pas dan sa tel sityasyon.

Akoz i annan serten Manm *US* ki kit zot prop manman lo *bus stop* e apre nou tay kot Gouvernman pou donn le neser, pou bann dimoun aze viv dan dinyite. Me non Mr Speaker nou bezwen get keksoz lo 2 kote Roupi non pa zis en kote.

Alor mon santi ki parfwa pou rezon politik bon marse, i fer nou vwar tou keksoz i mal, menm nou servi dimoun aze pou fer politik avek san realize ki sa letan ki *SPPF*, *Lepep*, *US*, ti o pouvwar ti pe donn nou dimoun aze par pti kwiyer les zot viv an rin avek zot lakaz.

Home For the Elderly ganny les abandonnen san fer en pti renovasyon. Ozordi sa Gouvernman *LDS* dirize par Prezidan Wavel Ramkalawan, pe fer sa ki zot ti promet e bann dimoun aze pe byen satisfè e ki zot pe kontinyen viv dan dinyite Mr Speaker.

Kot ler nou lekonomi i fer byen, nou Gouvernman pou kontinyen aranz sa pansyon pou nou bann dimoun aze parey nou Prezidan i toultan dir

pou zot kapab kontinyen viv dan dinyite.

Les mwan met en latap pansyon devan zot ki mannyer dimoun aze ti ganny negligè avek sa 3 non Parti la.

An 2004 pansyoner ti ganny R1600,

2007 – 2100,

2009 – 2200,

2012 – 2500,

2014 – 3000,

2017 – 5050,

2019 – 5250. Sanmenm sa ki dimoun aze ti pe viv dan dinyite.

Ozordi *US* pa war sa logmantasyon lo pansyon dimoun aze sorti 5 mil 250 pou al 6 mil 250, i montre ou politik bon marse i kapab fer krim dan sa pei. Ler *US* Parti Minoriter in fini santi ki 2025 zot pa pou ganny eleksyon e menm pa pou antre koman Lopoziyon, zot bezwen rod tou kalite mansonz pou dir sa pep, espesyalman dimoun aze ; kot menm si zot pa zanmen pas kot *Home* Grand Anse Praslin e menm fer en pti donasyon sa *Home*, ozordi pou rod vot zot al rod toudsort lipou laba kan *US* ki'n kit sa *Home* an rin.

Onorab Woodcock in plizyer fwa al fer donasyon organiz aktivite ansanm avek mwan e osi Ladministrasyon

Distrik Grand Anse Praslin e nou pou kontinyen fer sa bann dimoun dan *Home happy* e fer sir ki zot osi viv dan konfor.

Avek sa 2 mo Mr Speaker, mon pa pare pou vot pou sa Mosyon aköz Gouvernman LDS dirize par Wavel Ramkalawan i deza pe fer le nesesser. Mersi.

MR SPEAKER

Mersi Onorab. Laparol i prezan pou Onorab Loze.

HON JOHAN LOZE

Mersi Mr Speaker. Mr Speaker, en keksoz ki mon kapab kategorikman dir Lasanble Nasyonal Sesel ozordi se ki dan son karyer politik e koman en imen a son tit personnel, Johan Loze zanmen in deza prononse poudir Wavel Ramkalawan i annan en gro malediksyon lo li.

Mon pa pou dir plis ki sa, selman mon konnen ki nou tou la anndan nou konnen lekel ki'n deza dir sa parol, alors letan nou war pou pe flat li, letan nou war ou pe lis li, letan nou war ou pe bat lanmen pe felisit li nou konnen ki groser pokrit i ete sa.

Mr Speaker, en keksoz ki nou bezwen komans avek koman en refleksyon ozordi e nou bezwen agree dan sa refleksyon ki si en dimoun ou

pran en group dimoun aze ou anmenn Moris, pou ou vol zot larzan ou pa kalifye pou koz lo dinyite dimoun aze.

Nou bezwen agree lo sa bann baz...

MR SPEAKER

Onorab, ou pe fer serten lakizasyon la e lefe ki ou'n dir si ou koz lo sa size i kapab aplik pou en dimoun dan sa Lasanble e mon vremen enterese ki lakizasyon pa ganny fer kont bann Manm ki dan Lasanble.

So mon zis demann ou verifye ou parol, ou a kapab kontinyen avek ou diskour, me selman annou vey bann lakizasyon.

HON JOHAN LOZE

Mersi Mr Speaker. Mon a swiv ou gidans e konsiny ki ou'n donn mwan, selman an pasan mon pou dir ki yer Minis ti asize la devan, ti get nou dan nou blan lizye ti dir nou ki nou'n faid *Air Seychelles*. Mon konnen mon ti en pti pe, mon ti lev mon lavwa ou ti reazir ankor mon remersye ou pou ou gidans Mr Speaker.

Selman *there again* sa ki ti *Chair Air Seychelles* sa letan, sa ki ti ganny pouse par Prezidan Michel aköz i ti faid *Air Seychelles*, i pe asiz *State House*

ozordi. I pa nou ki'n fer sa. Alors lo lakizasyon mon krwar *it goes both ways*.

Mr Speaker, en kestyon ki mon anv'i poze ozordi ankor pou refleksyon eski sosyete Seselwa i posed en lobligasyon moral, pou pran ka avek son dimoun aze? E letan mon dir sosyete Seselwa Mr Speaker sosyete se nou tou, lafanmir, la kominote ki Onorab Henrie i koz fortman lo la ler i fer son bann diskour, zenn, vye.

E si nou koman sosyete nou agree ki nou bezwen pran ka avek nou dimoun aze, be a latet sosyete ou annan la gouvrenans pei sa ki nou, nou dir i Gouvernman. E Gouvernman aprezan li se li ki bezwen manifeste sa swe sa sosyete, ki li i *serve*, i deservi.

Akoz a lafen dizour annou konpran en keksoz Gouvernman la i pa nou met li, *regardless* ki ladministrasyon ki o pouwar e 2025 mon konnen i pou Ladministrasyon *United Seychelles* anba direksyon Prezidan Herminie ki pou *Head* la gouvrenans pei.

(APPLAUSE)

HON JOHAN LOZE

Be *regardless* si i pou Prezidan Herminie ki pou antre, sa

Gouvernman ki li i pou dirize par son ladministrasyon i pa pou nou met li, Gouvernman i nou servant, i la pou servi nou lasosyete, e si nou koman lasosyete nou'n agree ki Gouvernman i- nou'n agree ki nou bezwen nou annan en lobligasyon anver dimoun aze e i pa tousel ki Gouvernman i bezwen manifeste sa.

Thus, mon pa konpran sa bann largiman konfize e konfizan ki zot pe vin avek, arr zot pe met tou lo ledo Gouvernman, anmenn kot Gouvernman pa koz ek fanmir, fanmir...- be bann Minis zot, bann Manm *Cabinet* zot zanfan pa kapab donn zot *allowance* palto, zot zanfan pa kapab donn zot *allowance* ledan, *allowance* linet?

Akoz zot Gouvernman i kapab donn zot selman ozordi ler nou pe demann pou antretyenn nou dimoun aze pli byen la i pa Gouvernman la, la i son zanfan ki pou fer? Be kot zot largiman i vin konfize e konfizan, zot konfiz atraver sa deba zot *anyway*.

Be Mr Speaker, i annan enn la in anmenn en litani, *US* i annan sa, i annan sa *US* i konn tre byen, i annan ki zanfan pe abiz li ki dan drog ki *US* i konn sa tre byen, lazans konsernen

bezwen fer le nesese pou tir sa bann dimoun dan sa sityasyon.

Ler nou pe koz lazans konmsi nou pe koz Gouvernman la, me sa lazans ki ou'n dir i bezwen fer le nesese Gouvernman, be pa i tonm anliny avek sa Mosyon ler lazans konsernen i bezwen fer le nesese?

Pa i kontribye sa lazans konsernen pou ed sa dimoun aze viv dan dinyite? I pa al kont lespri sa Mosyon sa. Ofet s aki ou'n dir Onorab i siport Mosyon anmenn par Onorab Vidot. Be kot mon dir i annan konfizyon dan zot rezonnman.

I annan enn i vini i dir nou lager pou dinyite dimoun aze ti komanse an 2016 ler Prezidan Ramkalawan ti dir 2 dimoun dan en fanmir i kapab ganny *up to* R10 mil, 2016 lager pou Sekirite Sosyal ki ti komanse? Ti komans 2016, en Sekirite Sosyal ki *SPPF* to etabli an 1978 selman lager i komans 2016? Be ou pa war latet pa bon?

Prezan Mr Speaker, prezan Prezidan Ramkalawan ki ti anmenn sa lager an 2016 ni en mansyon Mrs Amesbury, ki ti premye avans sa propozisyon pou ogmant Pansyon Sekirite Sosyal pou fer

vin apar egal ek *minimum wage* zot pa fer.

Zot napa kouraz pou dir pou nonm son non pou *acknowledge* son kontribisyon menm si i annan dimoun la anndan pe asize ki ti dan son Parti sa letan. Zot totalman efas listwar e re aranz li dan zot fason, me selman ler zot, zot fer tou i byen.

Ou konnen sa i fer mwan mazin pli boner bann largiman ki'n ganny anmenn konsernan kont bann dimoun aze. Ozordi ou demann *carer* zot fouy lo ou kont, ou demann lasistans *ASP* zot fouy lo ou kont, nenport ki lasistans ki ou demande zot fouy lo ou kont.

E zot pa pou fouy lo zis ou kont en pou fouy lo kont tou dimoun dan sa *household*. Ou ser, ou frer, ou manman, ou papa pou al fouy lo tou zot kont.

Be lekel ki'n anmenn Lalwa ki'n protez fanm ek zanfan politisyen? Lekel ki'n anmenn Lalwa? Ki'n met zot dan en plas en kategori apar, zot kont pa pou ganny fouy lo la zot, politisyen i a kapab fasilman kasyet larzan lo kont son fanm ek son zanfan aköz zot pa bezwen fer okenn deklarasyon zot, zot lib.

Nou annan nou en pwa avek en bon demi douzenn

mezir, pa ni menm demezir avek zot *anymore*, en bon demi douzenn mezir. Zanmen i annan mwayen pou sa ki pli ba, zanmen i annan resours pou sa ki pli ba, toultan i annan pou sa ki pli o, sa mon krwar depi 2019 mon pe dir zot.

E menm bann Lalwa nou trike nou re aranze nou re anmenn li dan nou fason pou protez nou, be nou les sa ki pli dan bezwen dan milye kannal parmi reken li bat dilo mannyer i kapab si i kapab.

Mr Speaker, nou dir ki sa bann zafer ki pe pase ozordi napa naryen pou fer avek Gouvernman, apre nou asize nou nonm en seri mezir dapre nou lasante pou naryen Lakaz *Old People, Vulnerable Repair, PUC* ti donn R300, *carer* tousala i bann benefis ki zot Gouvernman pe donn bann dimoun aze.

So Gouvernman ki pe donner, Gouvernman ki pe donner sa bann keksoz la. Gouvernman i annan en lyen etrwat e direk avek nou bann dimoun aze. Gouvernman i annan bann mekanizm met zouti dan son lanmen ki i kapab servi aziste e re aziste pou ed nou dimoun aze viv dan pli konfor pou ganny en pe plis pou

pa kontribye anver son dinyite. Se sa.

Be o menm enstan zot vin avek en largiman ki nou bezwen eksplik dimoun realite konteks defi ; realite defi mondyal, me pardonn mwan aköz ti en gro salad mo sa *speech* - ou a krwar ti'n pran en pla gro mo i ti'n larg dan en bol apre in flit en pe delwil *d'Olive* lo la, in bouye.

Bann konwaser la, be ou konnen ki mon'n mazine ler mon'n tann sa, ou war sa bann zafer realite, sa *SPPF* 2009 tou bann rezonnman, tou bann largiman *SPPF* 2009 in kaye ek zot ozordi in kante dan zot lavenn, pa oule sorti.

Parti Lepep sa bann largiman realite konteks defi, realite defi mondyal, be eksplik mwan en keksoz en, ler dimoun aze nou bezwen eksplik li realite konteks defi, realite defi mondyal, be ler bann Minis in pran *allowance* linet ti napa realite, ti napa konteks defi? Ler bann Minis in pran larzan pou al sonny zot ledan depi latet ziska pous lipye ki ti arive ek defi mondyal, ti napa defi mondyal, ti napa realite defi? Realite defi la konteks mondyal la, zeopolitik la aköz nou pe koz lo dimoun aze? Selman bann Minis zot kapab ranpli zot *hay* ek *allowance*.

Be se la kot mwan mon santi i annan bokou trou dan zot bann largiman. Ozordi Sesel nou viv nou dan en labsans laverite, e mon dir en labsans laverite, akoz mon konnen si mon sey servi bann mo ki mon abitye mon pou ganny dir pa dir sa bann parol, alors mon swiv ou konsiny e ou gidans Mr Speaker. Me selman nou viv dan menm kondisyon mansonz.

Pran par egzanp pri lavi, pri lavi la in eksploze ler zot, zot in antre *STC*. Konman in met *STC* dan zot lanmen zot in eksploz pri lavi, zot *LDS*. E sa i annan en teori ki ti ganny eksplike dan sa Lasanble par Vis-Prezidan Ahmed Afif e i ti servi en pti ilustrasyon ek son 2 lanmen, i ti dir nou si *STC* i met son pri la tou lezot boutikye i vini i kal zis la.

E se sa ki kontrol pri lavi dan Sesel. Vis-Prezidan Ahmed Afif ki ti dir en malen boug, pa Johan Loze ki ti dir. Be ler zot, zot koman zot *take over STC* zot eksploz tou pri lo *shelf*, zot fer monte a ziska sepa ki bor kote bann lezot boutikye i kale? I kal la zot ki responsab pou logmantasyon dan pri lavi.

E ou konnen kot laprev i ete senp *STC* in fer li R66 milyon profi. Kote R66 milyon profi i sorti dan realite konteks

defi e realite defi mondyal? Mwan mon konnen ki zot pou vin dir mwan, mon konnen ki zot pe vin gele ti pe pey *rent* avek *Maison Du Peuple*.

Be ekoute, atann, Minis ti vin la dan Lasanble li i ti dir poudir sa bann zafer *rent* in arete depi 2019, so ki mannyer i ankor aplikab la? Kan mannyer i *still* aplikab koman en largiman ki zot, zot pou servi ouswa i ankor mansonz?

Profi 66 milyon *STC* in sorti dan sa logmantasyon dan pri lavi ki zot, zot direkteman responsab pou martir e soufrans sa pep. Zot *LDS*.

Be move dimoun ki fer sa, bon dimoun pa fer. Mr Speaker be si ou'n ogmant pri lavi ou'n eksploz pri lavi dan pei, eski zot pa santi ki sa in afekte dinyite bann dimoun ki pli feb, e bann ki pli vilnerab dan nou pei e ki petet nou bezwen viz ver en re balans e re partaz resours pei dan faver en bann ki pe ganny mwens?

Akoz letan *US* ti o pouvwar ti annan 40poursan lapovrete, ti annan disparite dan saler, ki'n arive ek tousala in nepli annan, pa egziste ozordi? Napa dimoun dan lapovrete dapre zot, zot? Apre zot a vin dir nou, nou pe al perdi eleksyon?

Be mon konpran akòz bomaten Onorab Gabriel in demann pou annan kour alfabetizasyon en. Arya i annan dimoun i byen bezwen.

Mon lot keksoz ki mon anvi tous lo la lo sa zafer ki nou pe viv dan en kondisyon mansonz. Sekirite Sosyal ti ganny etabli an 1978, e answit Lalwa in vini ki'n etabli laz pansyon a 63 an, zot be pa ozordi laz pansyon i 63 an li.

Bon, 2019 an montan *Pension Fund* i komans gele pou dir i annan serten problem, *Pension Fund* sa en pa Sekirite Sosyal *Pension Fund* i annan serten problem. Mon krwar nou tou nou agree nou'n war sif nou tou, bon mon napa problem ek sa mwan.

Be ki mannyer *Pension Fund* ki li i en Fon kontribyab i annan en problem selman zot fer monte laz pansyon pou al 65 an enkli *Social Security Pension* ki li i sorti dan Fon Gouvernman i pa kontribyab i napa sa presyon ki *Pension Fund* pe soufer li e depi in ganny etabli 63 an. Pandan tou sa lannen in 63 an li, *with or without* mon krwar *Pension Fund* i vin an egzistans '91 tou sa letan i la li, selman i ganny aziste ansanm akòz problem *Pension Fund* be ki problem

Pension Fund i annan pou fer ek li li?

Prezan letan Onorab Cosgrow i dir ki nou pou retourn pansyon ou pansyon a 63 an, kot ou a kapab tous ou *Social Security* e sa nou garanti zot a vini zot a vin dir pa ekout sa bann bat latet *US*? Be zot menm zot, zot pa konnen *what the issue is* devan zot.

Zot ti'n kapab anvoy *Pension Fund* dan 65 an e les laz pansyon laz 63 an e dimoun ti a tous son *Social Security* we. *Pension Fund* pa i vin anba son Lalwa li? Pa nou Lasanble Nasyonal nou, pa nou ki pas Lalwa? Prezan lot i a vini i a dir nou zot la anba Prezidan Faure zot, Prezidan Faure zot pa pe siport, -

E gete en, Prezidan Faure ti dir i pe lans en diskisyon lo sa size. I ti debout la anndan dan Lasanble i ti dir i pe lans en deba nasyonal lo sa size. Be zot, zot pa'n fer deba zot, zot in fer gro bra, deba ek gro bra i 2 diferan keksoz sa. Sanmenm sa Onorab Gabriel in dir zot, zot ti pe *rule border* la prezan ozordi *border* ki pe *rule* zot. Se sa.

Mr Speaker, ler nou koz lo dinyite nou dimoun aze ozordi nou annan e nou en sistenm lasante ki pe kase, nou annan nou en leksplozyon dan pri lavi,

nou annan nou bann diferan servis ki nou bann dimoun aze i depan lo la ki ganny fourni par Gouvernman, ki pa pe marse parey ki i devret marse.

Zour ti pas Lalwa pou kre Lazans *Home Care* zot ti dir en kantite keksoz la anndan zot, e nou, nou ti annan bokou kestyon e menm nou ti pe sey kestyonnen dan letan soz, *Committee* nou ti ganny dir nou pe demann tro bokou kestyon.

Be zot ti dir *carer* pou ganny en serten saler. *Carer* pou ganny *training*; *carer* pou ganny konze, *carer* la pou kapab pran *loan* la prezan akoz avan i pa ti kapab pran *loan* i ti ganny zis en *allowance*. Zot realize poudir napa okenn sa bann keksoz ki zot in dir e ki lo *verbatim* Lasanble konsernan *carers* ki'n materyalize?

Nou'n kre en gro lazans nou'n met li la an plas apre parey Onorab William in kontan dir nou'n anmar son 2 lanmen, nou'n anmar son 3 lipye nou'n anpes li travay.

Bon nou annan nou en Lazans *Carer* ki ozordi tou dimoun ki pe rod *carer* i ganny dir napa *carer*. Mon en *MNA* mwan en mon krwar nou tou la anndan nou *MNAs* e nou tou dimoun i vin kot nou, nou tou nou ganny dimoun ki vin kot

nou ki dir nou i pe *apply* louvraz i annan 6 mwan i annan 9 mwan i pa pe travay nou tou, annou pa kasyet sa i annan.

Sey eksplik mwan en keksoz en? Nou annan nou en lazans *carer* ek son bann resipyan ki bezwen *carer* ki pa pe ganny *carer* ki pe esper 2 mwan parey Onorab Cosgrow e in dir napa *carer* e lo lot kote nou annan nou en group Seselwa ki pa pe ganny travay, nou pa kapab konekte sa 2 keksoz?

Sa lazans la li i pa kapab pran sa bann Seselwa ki napa travay, *train* zot, profesyonnalizm zot, *deploy* zot dan bann fason profesyonnel, pou al fer sa travay nesese e esansyel ki bezwen? Ki mannyer nou annan dimoun ki pa dan lanplwa be selman napa *carer*.

Mon pa pe swiv lozik la e se sa, sa bann keksoz ki Onorab Vidot pe demande, pou nou ed nou bann dimoun aze annan plis dinyite akoz zot pe marse monte desann, anmenn *statement* labank, ganny dir non pou pa pou gannyen anmenn pou-

Arwi, syel Sennyer, be i napa dinyite dan lafason ki nou pe tret zot i napa en kalite lavi

ki zot kapab fyer apre ki zot in travay e kontribye ver sa sosyete pandan zot lavi an antye.

E si nou agree ki sosyete, sosyete in aksepte ki i annan en responsabilite anver nou dimoun aze, sey eksplik mwan ki manner ki letan Onorab Aglae i dir poudir i annan en zabitan Cascade aze ki epi aksidan CCCL in arive, i pe reste kot fanmir i ankor pe reste kot fanmir ziska ozordi, larepons ki deswit i gannyen se pran li anmenn kot ou. E sa sorti kot sa dimoun ki li in ganny elekte pou reprezant Cascade.

Be si sosyete in agree ki nou bezwen tret sa bann dimoun avek dinyite ki manner en dimoun ki li i dan en pozisyon ofisyel pou rann sa servis i pran en tel latitud, be ki manner nou pou avans devan? Kan manner nou pou avans devan? Kantmenm ou pou lev ou lanmen anler ou'n dir nou tou nou'n tande, nou tou nou'n tann ou dir.

Mr Speaker, nou pe viv dan en kondisyon mansonz dan sa pei ozordi. Letan Onorab Churchill Gill i dir koumsa poudir Praslin komodite i pli ser ki Mahe en lot Onorab Zil i dir, "be kan"?

Mr Speaker, nou pa pou trouve solisyon aköz zot napa lavolonte pou zot aport solisyon, dir nou politik sal, dir nou sa ki zot anvi se zot ki napa *the will*, zot napa lavolonte politik pou zot fer sa ki bon e sa ki byen.

Zot kapab pa agree avek nou demann. Zot kapab pa agree avek sa ki nou pe demande. Yer zot in anmenn en Mosyon, nou'n vot ansanm nou'n agree nou'n siporte avek zot, nou pa'n fer tro gran deba lo la me selman nou'n siporte.

Nou ti termin dernyen term byen ansanm, Onorab Mondon ti anmenn en Mosyon, mwan mon ti koz lo la, be nou ti vot an sipor zot Mosyon. Dernyen *Bill* ki zot ti anmenn term pase, mwan mon ti koz lo la e nou tou nou ti vot an sipor zot *Bill*. Zot napa lavolonte zot. Zot pa *willing* pou fer sa ki bon e sa ki byen pou adres sor sa bann dimoun ki nou pe koz lo la.

Mwan a donn zot laprev, a sak fwa, a sak fwa ki nou koz lo bezwen bann dimoun pli vilnerab, *LDS* parey in ganny dir pli boner napa dimoun ki pe mor lafen, mon'n get la anler mon pa nwar personn pe mor lafen.

LDS si ou pa mor lafen, tan ki ou pa mor lafen i pa pou rekonnèt ou bezwen, Onorab Arissol in deza demann Minis Lasante la dan sa Lasanble, Minis, eski i annan okenn dimoun ki'n raport lopital pe mor lafen?

En *pattern* sa ki zot annan. I pa fer premye fwa zot dir sa parol la anndan. A sak fwa, a sak fwa ki bezwen sa pep i ganny e tale devan zot, zot rode si dimoun pe mor lafen. So si dimoun pa mor lafen zot pa pou lev en ledwa zot, zot pa pou mat zot pou ede.

Fodre dimoun i mor lafen la zot a konpran. Be *anyway* sa i zot, zot annan zot fason nou, nou annan sa ki pou nou, zot koz zot vaksen labous plen selman zot Minis i refize koz laverite lo to mortalite, i koz lo to mortalite briti dir ou 2019 to mortalite ti pli o ki 2023 me selman 2023 in annan plis ka lanmor.

Selman zot *proud of* zot vaksen zot. Zot ankor pe koz lo la ziska ozordi, selman la kantite dimoun ki pe mor misteryezman i ogmante. Boner mon pe ekout zot mon zot in ouver *airport*, nou, nou ti pe *boycott* biznes ou konnen a sak fwa ki nou sey fer en keksoz pou viz ver proteksyon sa pep ki

apel Seselwa zot trouv en keksoz mal avek.

Be i annan dimoun dir ou zot ti forse taye ouver *airport* akoz zot ti pe al maryaz Moris. Be selman les mon tretman ou, mon *mental health* i ok mon Onorab be selman, be selman...

MR SPEAKER

Onorab Naidu, *Order, please!*

HON JOHAN LOZE

Anba Prezidan Faure ti napa 1 ka lanmor *COVID - 0*, ni enn e napa en Seselwa ki konnen, konpran e okouran konbyen dimoun ki'n mor ek *COVID* anba zot Gouvernman e konbyen dimoun aze ki'n mor avek *COVID* san okenn dinyite anba zot Gouvernman.

Yet zot *proud*, vaksen, *airport*, i annan serten topik zot pou arete vini avek zot, akoz nou komans reponn zot la. Zot vaksen i enn, zot *Airport* en lot zot *Air Seychelles* ki zot dir nou'n faid la, a sak fwa ki zot dir nou, nou pou dir zot lekel ki ti faid *Air Seychelles*.

Lekel ki ti ganny pouse par Prezidan Michel akoz i ti faid *Air Seychelles*.

MR SPEAKER

Onorab anba *Order* 57, ou annan 30 minit pou

entervansyon lo en Mosyon e i reste ou 1 minit.

HON JOHAN LOZE

Mersi Mr Speaker. Mon ava servi mon minit pou remersi ou pou ou lendilzans Mr Speaker e ou pasyans, mon konnen ki bann keksoz ki mon dir de fwa i grat lezo ledò en pe, me selman i bezwen ganny dir.

E mon dernyen parol Mr Speaker nou pe dir dimoun aze ki firamezir ler i posib zot pou ganny asiste selman mon krwar ki Onorab Loizeau in fini dir bann dimoun aze poudir zot pe al ganny 10poursan la.

So lanons in fini ganny fer pli boner be firamezir i pou dimoun aze sa, *Cabinet Minis* ti ganny zot *over 39thousand one go – paff* - atraver *allowance* pa ni menm saler. Mersi Mr Speaker, kontinyen abiz sa pep zot.

MR SPEAKER

Mersi Onorab. Mon annan 5 dimoun ki reste lo mon lalis, e alor mon pou bezwen met en limit Onorab Georges oule azout ou non lo lalis? Wi, i neser, okenn lezot dimoun ki pou azout son non lo lalis? Onorab Pillay, Onorab Bistoquet.

Ok, dan sa ka nou a termin lalis la, me selman malerezman mon pou bezwen limit letan ki zot pou annan akòz mon konsyan ki nou met en fardo lo *staff* Lasanble letan nou reste tro lontan. Alor mon pou met en limit 10 minit lo bann ki'n lev lanmen lo dernyen.

Sa lalis ki mon pe al pran la i tou bann dimoun ki'n lev lanmen lo dernyen moman, so zot a konpran tou dimoun ki zot lanmen ase boner in ganny larzman letan. So nou a pran Onorab Hoareau.

HON JOHN HOAREAU

Mersi Mr Speaker. Bonn apre midi tou dimoun ki pe ekoute, bonn apre midi mon bann *chère* koleg e bonn apre midi Mr Speaker osi. E bann dimoun ki ti'n met zot radyo ek zot *tv* lo *mute* i kapab aprezan reouver zot radyo e zot televizyon.

Mr Speaker, i malere pou dir ki lafason ki Onorab Vidot in prezant son Mosyon in demontre lipokrizi e ki kantite i dekonekte avek sityasyon reel son prop dimoun. En politisyen ki pa'n kapab prezant en balans lo sa size, ki pa'n kapab fer en analiz profon pou war kote negativ e kote pozitiv.

Si pa sa, me zot senpleman bann move dimoun avek move lentansyon, ki'n swazir pou fer en politik demode e popilis pou konfiz dimoun aze.

Mr Speaker, an premye lye mon oule demann Lepep Seselwa ki pe ekout nou la konbyen fwa ki Lopoziyon in vin atraver Bidze ki annan larzan pou bann pansyoner Sekirite Sosyal? Larepons e zanmen, zanmen zot in vot pou okenn Bidze dan sa Lasanble ki annan larzan ladan pou sa bann dimoun aze ki zot pe koz lo la ozordi.

O kontrer zot in zis *walk out* a tou moman e ler nou ti anmenn Fon Pansyon isi dan sa Lasanble pou eksplik lo pansyon pou fer en deba lo pansyon, zot pa ti *attend*. Se sa lipokrizi Mosyon ki'n ganny anmennen par Onorab Vidot.

Dan son Mosyon napa ni enn fwa kot sa Onorab in koz lo responsabilite sak sitwayen, ler i pe travay koman en travayer dan nou sosyete.

Zanmen in edik sa pep poudir zot be ler ou lope travay koman en dimoun ki Bondye in donn ou sa kouraz in beni ou ek sa kouraz ler ou travay ou anmas en pe pou demen. Sai ou kapab kontribye en pe dan

kontribisyon volonter pou Fon Pansyon ou fer li.

Zanmen in koz lo responsabilite bann zanfan anver zot paran; ki fason ki en zanfan i kapab siport son paran e fer li viv dan dinyite, zanmen in koz lo responsabilite la kominote kot sa dimoun pe viv.

Ozordi i annan en kantite legzanp pozitiv dan la kominote parey group trwazyenm-az ki ed pou promouvwar solidarite e kontinyen zanmi antre bann vye dimoun, zot osi ede ki sa bann vye dimoun i kapab organiz bann *outing* ansanm e rezouir en letan dan en fason amikal.

Mr Speaker, Onorab Vidot in bliy byen vit se ki presyon *Leader* Lopoziyon a sa lepok Mr Ramkalawan ki ozordi nou Prezidan, ki ti demann logmantasyon lo pansyon Sekirite Sosyal ki'n fer ki Sekirite Sosyal ti sorti R3 mil an 2014 pou vin par lao R5 mil. E ozordi avek sa pti R500 ankor ki'n ganny mete lo la i annan ki pe tous environ en pri pe dan R6 mil.

Ler Onorab Ramkalawan ti pe pouse pou logmantasyon pansyon, zot ti maltret li e dir li i fou, kote ki Sesel pou ganny sa larzan pou donn bann pansyoner plis larzan. Lepok ki

defen Albert Rene a sak fwa ki i ti fer son lanniverser i ti profite pou fer politik bon marse avek larzan Leta e dir avek bann pansyoner ki in fer zot kado R50 an plis.

En larzan ki ti pe donner par pti kwiyer, tandis ki bann gro Sef *SPPF* zot ti pe pran par \$50 milyon e sa ki ti pe aste laferm *l'Australie* pou plant mang ti pe fer li, sa ki ti pe aranz zot lekor ek bann *plot* later, sa ki ti pe ganny plis ki 50 *plot* e sa ki ti pe fer biznes ek Leta e sa ki ti pe fer klerman konfli lentere ti pe fer li.

Se sa Gouvernman ki zot oule anmenn o pouvwar zot, bann pansyoner i rekonesan anver Prezidan Ramkalawan ki'n kontinyen fer monte laplipar bann *statutory benefits* ek pansyoner- ek larzan bann pansyon.

Mr Speaker, Gouvernman *LDS* i reste angaze pou fer plis pou bann vye dimoun e Prezidan ti fer kler ki larzan bann pansyoner ek bann *carers* pou ogmante. Sa i en promes ki in fer. E nou, nou konnen poudir ozordi Onorab Vidot in tay ek sa Mosyon isi dan Lasanble pou fer krwar poudir se li ki pe demann avek Gouvernman pou fer ogmante larzan pansyon e

larzan *carer* kan sa i en keksoz ki nou Gouvernman in planifye. Pa bezwen vin vol keksoz ki pa pou ou.

Mr Speaker, nou konnen nou tou poudir prezans an fanmir sipor mantal i zwe en gran rol pou fer en dimoun viv dan dinyite.

Seselwa i konpran tre byen an sa ki konsern kwa ki posib e kwa ki pa posib pou frer, kwa ki kapab ganny fer avek lespas fiskal ki annan e an konparezon avek zis labwet pour ki nou pe tande sorti kot Lopozisyon. Se sa deba lo pansyon. E soutenabilite Fon Pansyon i enn sa deba lo soutenabilite Fon Pansyon i enn ki nou'n fer plizyer fwa e nou fatige fer.

Bann manm eksper Fon Pansyon in vin eksplike dan Lasanble e sa ki *SPPF* pe fer se kontinyen repet menm laliny propagann zour apre zour, parey en rikord reye, pou sey fer krwar ki zot kapab fer desann laz pansyon san dir nou kote ki zot pou tir sa larzan e pli enportan ankor ki fason zot pou fer sa fon vin soutenab.

En tim ki'n deza faid pei an 2 repriz notaman 2009 avek 2014, kot si *IMF* pa ti mele, ti annan en risk reel ki ti pou annan enstabilite avek sekirite

nasyonal, akòz Lepep ti pou napa manze prenon kont ti napa larzan pou enport manze.

Mr Speaker, nou pe fer fas avek en Lopozisyon ki pa serye enn ki son sel retorik, “se tir li” akòz zot swaf pouvwar. Zot napa en plan lo fason ki zot pou zer e gouvèrn sa pei. En tim ki si i retourn o pouvwar, zot pou zis anpli zot pos avek larzan Lepep, parey zot ti fer ler zot ti la pou 43 an.

Si zanmen zot retournen, ki mon espekte ki zot pa retournen, ler ki ou ek mwan nou reklanm nou drwa koze, nou fanmir pou war nou anba en pon parey zot in promet nou.

MR SPEAKER

10 minit Onorab. Terminen.

HON JOHN HOAREAU

Mr Speaker, mon annan bokou ankor pou dir me senpleman an konklizyon Mr Speaker, mon a dir poudir pa tou sistenm ki parfe, pa tou keksoz dan nou pei i parfe, bann pansyoner an gran mazorite pe byen viv.

Gouvèrnman pe fer son mye selon son mwayen ki posib, pou fer sir ki zot tou zot rezouir en retret dan d dinyite. I annan diferan striktir an plas parey *roofing, Scheme, home repairs*, pas bis gratwit, benefis lo

transpor pou ler zot annan sityasyon medikal pou sorti lo bann zil pros e lezot ankor.

Petet si fodre fer amelyore nou kapab amelyore, pou fer sa bann akse sa bann servis vin pli efektiv pou fer vin plis dan zot faver.

MR SPEAKER

Onorab Terminen, *out of time*.

HON JOHN HOAREAU

Mr Speaker, mon pa pou vot an faver sa Mosyon akòz mon krwar i iresponsab lo lapar loter Mosyon pou kapab prezant en deba ki pa balanse en deba ki demode en deba ki pa pou anmenn nou pli lwen ki nou ete. Mersi.

MR SPEAKER

Mersi Onorab. Onorab Adelaide. 10 minit.

HON FRANCOIS ADELAIDE

Mersi Mr Speaker. Bonn apre midi tou dimoun a lekout espesyalman bann retrete.

MR SPEAKER

Onorab, eskiz mwan, eskiz mwan mon krwar plito nou pran en *break* la. *Sorry* mon pa ti pe vey letan, nou a pran en poz la e nou a rebran 4 er.

Onorab mon a donn ou laparol apre *break*. Mersi.

(BREAK)

MR SPEAKER

Nou a rebran. Onorab Adelaide ou annan laparol.

HON FRANCOIS ADELAIDE

Mersi Mr Speaker. Dabor bonn apre midi tou bann dimoun ki pe ekout- espesyalman bann dimoun ki parey nou pe dir bann retrete.

Mr Speaker, Mosyon Onorab Vidot ki in anmenn kot Lasanble ozordi ki nou pe diskit lo la, yer nou'n ganny sans koman en *Caucus* pou nou kapab diskit en pe lo sa Mosyon e nou bann Manm lo *LDS* nou ti pe reget sa Mosyon avek en lizye pozitiv nou ti diskit en kou lo bann deba ki mannyer nou pou ale.

E an gro i ti en Mosyon ki nou ti petet en pe dakor avek me zis nou ti pe mazine petet enn de bann pti- pou nou aranze. Me ozordi selman ler mon'n ekout en pe bann Manm parti minoriter koze vreman mon vwar sa Mosyon in sanze in al en pe plis dan bann kontour politik.

E pou mwan ler mon pou koz lo sa Mosyon Mr Speaker,

mon pou tir zis detrwa mo ladan dan sa Mosyon Mr Speaker, ki i annan en merit, mon trouv i annan en merit me selman ki mannyer in ganny debat bomaten in vreman sanz son fason ki nou ti pe konpran li.

Mwan mon pou pran sa mo viv dan dinyite Mr Speaker akoz wi i enportan ki koman en pep nou bann trwazyenm az, nou bann retrete ler zot fini avek donn tou avek zot kominote avek zot pei i vreman enportan ki nou *provide* zot avek bann servis, bann lasistans ki pou fer zot *enjoy* zot bann dernyen zour, zot bann dernyen letan ziska ler ki zot pou kit sa later.

E mwan mon antas en lenportans serye avek sa akoz ou konnen ou, nou bann paran nou'n ptipti zot in pran swen avek nou, zot in ed nou ki ozordi nou ariv parey nou ete.

Ozordi mon dan Lasanble Nasyonal mon remersi mon paran ki petet kantmenm i pa'n donn mwan sa larises, me selman in donn mwan en kado lavi e apre in donn mwan lasante ki ozordi mon kapab debout e koz lo zot non, e menm protez zot ler i annan bann keksoz ki ler nou bezwen proteze Mr Speaker.

Mr Speaker, si nou get nou listwar politik partou kot i ete, deor tou dimoun ler i tann nonm Sesel zot get nou koman en pei ki ris, zot espekte ki Seselwa i en nasyon ki ris ki annan bokou larzan. Kan ofet realite se larises in ganny partaze dan bann letan pase zis avek en pti group dimoun.

Me selman ler nou pe get li lo nivo statistik, tou dimoun i krwar Seselwa i ris. Mwan mon panse ki si depi boner Gouvernman sa letan mon pa dir i pa'n fer naryen, kot i annan kredi nou bezwen donner, me solman mon krwar ti merit annan plis disiplin lo kote nou zesyon finansyel.

Akoz Sesel i en pei ki fer en ta larzan e si depi byen boner nou ti annan sa disiplin, ozordi petet nou pa ti pe diskrit sa topik pou ki nou bann retrete i viv dan dinyite me nou ti a trouv sa larises li menm ki'n ganny partaze avek sa pep e byensir i en keksoz ki nou tou nou swete.

Me solman ki mannyer keksoz i ete ozordi, i enportan ki nou koman en Gouvernman i enportan ki nou sey nou mye, nou sey nou mye pou nou kapab protez sa bann dimoun.

Annefe i annan dimoun aze avek bann zanfan e bann zenn i enportan ki nou protez

zot e nou donn zot tou sipor ki nou kapab donn zot pou zot kapab viv dan dinyite Mr Speaker.

Mr Speaker nou'n tande Sesel i annan en ta koripsyon ki'n arive e dan Lasanble nou'n tann sa \$50 milyon ki ti annan, bann *MNA* ki ti *committed* zot ti dir zot ti pou al rode sa larzan kot i été ; mon pa konnen ki zistans nou'n arive. Me selman sa osi ti ava ede pou nou kapab fer nou bann trwazyenm az viv dan dinyite Mr Speaker.

Langaz ki'n servi dan lasanble annandler petet mon krwar i pa ede pou montre ki nou osi nou pe enstri nou retrete pou viv dan dinyite Mr Speaker. I annan bann *statement* ki ganny servi dan sa Lasanble.

Annandler oule krwar ki nou menm napa respe pou nou bann retrete nou krwar poudir zot napa zorey zot pa tande, nou krwar zot napa lizey zot pa trouve, nou krwar zot napa lentelizans zot pa kalkile kan an realite la sa bann retrete - La mon ava servi legzanp mon distrik Baie Lazare mon war ki mon bann retrete nou pas kot zot tanzantan, vre i annan enn de bann pti problem ki nou pou bezwen aranze.

Me solman mazorite zot, zot pe *enjoy* zot pti lavi e mon krwar avek sa bann progre fiskal ki nou pe fer lo kote gouvènmantal, byensir avek sa lanons ki Prezidan i fer mon krwar poudir zot pou pli byen plase. Zot pou byen kontan *at least* pou zot kapab ganny ankor en pti pe plis, pou zot kapab amelyor zot lavi.

Mr Speaker, mwan koman en dirizan dan mon distrik mon pa zis gete ki petet Egzekitif i kapab fer pou soulaz nou bann retirete. E mon kapab dir poudir mwan mon fyer ki poudir sak fwa mon ganny en lapel, mon ganny en *call* avek en dimoun ki pe rod en *carer*, mon lofis avek Ladministrasyon Distrik nou'n fer nou mye.

E ozordi mon pa pe mazine ki napa en dimoun Baie Lazare ki'n kontakte nou, ki pa ankor ganny en *carer* ouswa i pa'n ganny asiste avek bann lasistans ki i nesese si i vreman merite.

E sa mon'n fer li se pa akoz mon pe anvi zve politik, non Mr Speaker, mon fer li akoz mon'n ganny elekte Baie Lazare pou mwan travay pou tou dimoun, san get lo kouler politik, ou larelizyon e mwan mon krwar koman en *Leader* nou osi nou devret gete ki nou

kapab fer, ki nou kapab fer pou nou distrik ki nou kapab fer pou nou pei.

Parey sa *saying* i dir pa demande tou kou ki ou pei i kapab fer pou ou, me koman en patriyot mon krwar ou devret kapab osi demande ki vreman nou kapab fer pou ed ou pei Mr Speaker.

Mr Speaker, sa en topik ki parey mon pe dir i en topik ki mon pa kapab fer li vin en topik sansasyonnel, akoz i en keksoz ki serye e mon pa kapab servi mon pouvwar la dan Lasanble pou mwan vini pou mwan anbet sa bann dimoun retirete e pa koz laverite. E se sa ki mon koz li koumsa ozordi.

E mon pou pran enn de legzanp dan mon distrik ki nou pe fer pou nou kapab ede avek sa, pou nou kapab donn sa Mosyon en pe son merit, menm kantmenm in pran en pes baz politik.

Mr Speaker, plis ki 10 an pase nou ti ganny promet en donasyon pou nou amelyor semen Baie Lazare i annan sa *West Coast Development Project*, sa ou konnen ki kantite i pou ed nou bann retirete pou viv dan dinyite Mr Speaker.

Avan zot ti bezwen mars dan rigol e avek sa bann devlopman ki pe arive Mr

Speaker, la zot pou kapab fer bann legzersis sorti petet dan en kwen Baie Lazare pou zot al dan en lot kwen Baie Lazare e sa pou ede dan ed zot pou zot viv dan dinyite Mr Speaker.

Mr Speaker, la nou annan en Proze Lakaz ki nou'n fini komanse Baie Lazare 16 *unit*, ou konnen ler ou fanmir i petet i ankonbre i annan bokou dimoun pe viv dan en sel lakaz me atraver sa bann devlopman lakaz ki nou pe fer, sa bann dimoun aze petet i ava ganny plis lespas dan zot lakaz ler zot bann zanfan in *move*, zot in kapab ganny zot lakaz pou zot e sa i ava kapab ed zot pou zot viv en pe plis dan dinyite Mr Speaker.

Mr Speaker, nou annan nou klinik osi ki depi 2016, depi 2017 mon pe pouse e mon byen kontan ki nou klinik pe progrese e byento nou ava met nou premye blok konstriksyon. Mr Speaker, sa osi pou ede aköz oparavan nou bann retrete pa ti pe gannyen sa servis dan tou son dinyite ki i pou bezwen.

E mon pou vremen kontan ki *by* lot lannen nou ava ganny nou, nou gran klinik e nou bann dimoun ava ganny tou sa repase e sa osi i en fason pou ede pou zot viv dan dinyite Mr Speaker.

Mr Speaker, en lot zafer ankor ler nou'n tande zafer taler larzan 10poursan ki nou pe koze Mr Speaker mwan mon pou onnet avek Lepep Seselwa mon pa pou dir zot manti be nou osi *MNA* nou *broke* dan milye le mwan, aköz nou larzan konpare avek bann lezot travayer piblik zot larzan zot anmenn se zot.

Me nou, nou larzan nou partaze dan distrik, nou ede parey pou pey en bil nou ede pou lanterman, nou ede pou ban lezot fonksyon. Be si Gouvernman i permet ki nou, nou ganny nou 10poursan Mr Speaker, mwan mon pou pran mon 10poursan ou konnen aköz sa i pou ed mwan pou mwan ed plis mon kominote, ki mon av annan en pe plis larzan ki mon a kapab ed mon kominote.

Tanpi Mr Speaker, me selman ler nou dir en keksoz fodre nou dir en keksoz fran. Nou pa vini nou fer politik nou pa pou pran, nou pa devret me selman ler i vini nou war pou dir zot pran e safwasi nou pou mark zot si vremen sa Lalwa i vini nou *LDS* nou dir nou pou ede dan nou distrik avek sa pti larzan ki nou pou gannyen.

Tandis ki parti minoriter i dir zot, zot pa oule zot pa pou

pran, esperon ki zot kot zot promes e zot kit sa larzan la dan, kot kof Leta pour ki i ava servi pou bann lezot dimoun. Be selman sa nou ava fer sir ki nou pou gete.

Mr Speaker, tousala i bann keksoz ki nou tou nou pe seye.

Mr Speaker, en lot keksoz ankor ki petet mon ava elabor lo la en pti gin, ki fer bann dimoun bann sirtou bann retrete perdi en pe zot *cool* Mr Speaker. Tou dernyerman nou'n war toudsort kalkile mannev Mr Speaker, menm ziska deter en dimoun dan simityer kot i sipoze pe repoz anpe Mr Speaker.

E nou pa'n tann okenn *PNQ* lo la, nou pa'n tann okenn gran, gran koze lo la e sa i montre nou ki i en size ki enportan, petet mon kapab dir ki petet *Leader* Lopozisyon in rat sa sans, me selman i ti bann keksoz ki nou ti kapab koz lo la pour ki nou anvoy en mesaz kler avek nou popilasyon poudir sa bann zes koumsa nou pa tolere, nou pa tolere sa bann zes koumsa, akoz sa osi i ede i ede pou detri moral nou bann dimoun aze.

Nou'n vwar Baie Lazare nou'n vwar en - mannyer nou apel sa - en pti lasapel ki bann dimoun ti ale ti priye tousala osi

ti ganny vandalize be avan ti napa bokou sa bann zafer. Tou dernyerman mon pa konnen si i en fason senm lafreyer pou fer dimoun panik.

E tousala nou pe vwar ki sa osi i ede pou nou afekte lasante mantal nou bann retrete e ki zot pa santi zot an sekirite si nou kontinyen annan bann keksoz koumsa. E byensir nou pa pou ede ler nou pe koz pou nou...

MR SPEAKER

10 minit Onorab.

HON FRANCOIS ADELAIDE

...ed nou bann vyeyar nou bann pansyoner pou viv dan dinyite d.

Mr Speaker, sa en topik ki mon pasyonnen avek si mon koze nou pou koz en bon pe letan, me selman mon ti a kontan ki Lasanble konmsi annou tret sa size koman en size ki vreman, vreman enportan e annou koz bann langaz senp pour ki bann retrete laba zot konpran e zot konnen ki nou pe diskite e ki zot osi le nou pe debat zot osi zot kapab partisipe.

Mr Speaker, mwan mon pou rezerv mon drwa vote e mon ava ekoute ki direksyon loter Mosyon i ale *then* apre

mon ava pran en desizyon. Mr Speaker, mon ava remersi ou pou sa 10 minit. Mersi bokou.

MR SPEAKER

Mersi Onorab. Onorab Naidu.

HON SATHYA NAIDU

Bonn apre midi Mr Speaker. Bonn apre midi tou koleg Onorab e tou dimoun ki a lekout.

Ler Mosyon la fason ki i ti'n ganny prezante o komansman parey mon koleg Onorab Adelaide in fer resorti, nou ti'n panse ki poudir ki ti annan bann bon lentansyon. Me nou tou nou konnen ki kalite tandans Lopozisyon in annan depi o komansman ki zot in antre dan sa rol.

E i kler ki zot annan en konfizyon dan zot kan lo lafason ki zot devret deservi sa responsabilite koman en parti dan lopozisyon ki vin devan avek bann propozisyon ki valab, ki ava ede pou nou kapab regard dan sityasyon dimoun aze lo en nivo pli profon. Akoz mon santi i annan lespas pou nou amelyor.

Me ler ou pe servi parol Onorab sa letan Minis Dezinyen Ferrari, koman en baz pou fer en pwen politik, ou servi en pwen ki Prezidan dapre zot ti fer

kan i pa ti fer koman en baz pou kapab avans ou Mosyon, i klerman montre ki napa senserite, napa lavolonte ki prop.

E annou pa bliye poudir eleksyon rezilta, sa Onorab ki pe avans sa Mosyon i ti'n ganny elekte par en lekar 5 vot, savedir popilarite ler i ti dan Gouvernman koman en *MNA was dwindling*. E la lafason ki i pe deservi son responsabilite. Onorab tasyon, azir dan en fason ki fran onnet e senser anver ou bann zabitan.

E mon kapab dir pa ganny mwan mal, mon krwar Roche Caiman *one of the easiest district* i sitan plat an sa ki konsern son topografi, ki ou kapab fer sir ou kapab bouz sa distrik de lavan me ou pa war ou, ou pe fer sa *the blitz*, pa sa ki dimoun pe dir, dimoun pe dir zot pa war ou.

Mon war sa sitan drol kekfwa dan serten lenstans zot pa war ou akoz ou vwayaze dan bann *workshop*, kot ou pe fer travay koman en reprezantan dan serten lenstans kot ou pe reprezant Lasanble, ouswa ou menm ou. Selman ler i konsern Prezidan Larepublik ler i vwayaze manman leokri.

Be nou Prezidan sak fwa i vwayaze ou a avek en bi, pou

retourn avek en keksoz pou Sesel e tou bann dirizan ki i zwenn, eski zot osi zot pa vwayaze? Zot pa zwenn lo en baz enternasyonal, pou zot kapab bouz bann azanda ki dan lentere pep Seselwa? Eski sa pa pe ganny fer?

E alors annou aret sey fer politik bon marse lo vwayaz Prezidan, kan ou menm ou vwayaze e par lao tou nou tou nou konnen poudir ki sak fwa en Onorab i vwayaze i ganny en *per diem*, be deklare konbyen ou'n gannyen an tou avek zabitan Roche Caiman.

Sa i en keksoz ki mon krwar tou dimoun i kapab deklare ler zot pe vwayaze, ler nou pe koz lo size vwayaz. Eskize Mr Speaker

(Comments off-mic)

MR SPEAKER

Onorab, gard lord silvouple, ou menm ou, ou menm ou ki obzekte ler lezot dimoun i enteronp ou, ou osi pa enteronp lezot dimoun. Merci.

HON SATHYA NAIDU

Eskize Mr Speaker, mon konnen ki Onorab Pillay i santi ki zot privez pe ganny afekte, me selman sa i bann pwen ki zot, zot in avanse, dimoun aze

in tandé, alors kwa ki mal si mon met devan en pwen an relasyon avek sa ki zot, zot in dir?

Ler nou pe koz lo dimoun aze, premyerman mwan mon annan en bon relasyon avek zot atraver zot mon'n ganny lanmour, latansyon e parfwa menm bann konsey, ki ed mwan deservi mon rol toulezour. Alors merci bokou pou sa sipor ki zot, zot in donn mwan dan mon travay.

E wi, dan nou bann konversasyon ki nou'n gannyen zot dir lavi wi i pa parey avan dan serten sikonstans zot trouv zot dan difikilte. Me ou konnen ki sa bann dimoun aze i dir avek mwan, espesyalman bann ki konn sa lalit ki Ramkalawan in angaze ladan 30 an apre pou li ariv kot in arive, pa krwar zot pe tir li 2025 en, kontré nou pe kit li la ganny sa byen kler.

E ler zot dir mwan lavi parfwa i difisil, zot rekonnet poudir ki kalite kales nou ti'n erite, e zot konnen poudir ki nou'n annan en kantite keksoz ki nou bezwen met annord depi ler nou, nou ti'n antre o pouvwar.

US lafason ki zot ti'n diriz nou pei, *they were setting us up to fail as an administration, but*

you failed yourselves akòz nou, nou ti annan en dirizan ki annan en vizyon ki kler, avek tou son bann koleg Minis ki ti pare pou akonpanyi li, enkli en *Caucus LDS* ki ti rekonnèt poudir ki nou annan en travay entans devan nou.

E tou sa bann proze ki nou war Gouvernman pe fer i koute, i annan en depans ki nou fer. Tou sa bann proze semen ki ti ganny fer ki ti kapab ganny fer 20 an pase, 30 an pase kot lezot dimoun ki pe atann pou lakaz in kapab gannyen sepa ki lannen ki pa ti pe gannyen, la nou pe bouz sa bann proze, i fer ki i annan depans.

E byensir o komansman, nou'n regard dan bann revizyon bann *rates ASP* pou fer sir ki bann zanfan ki parfwa bann pti zanfan, ki bann dimoun aze i veye ler zot al lekòl, zot ganny en *breakfast* avek en *lunch* ki fer ki nou pe tir en fardo lo zot. Ler i annan bann *expectant mothers* sa i en keksoz ki Administrasyon *LDS* atraver *ASP* in revwar; ler tou bann *rates* pe ganny revwar i annan en lenpak lo en fanmir.

E menm bann *civil servants* i annan apepre 14 mil zot, ler zot in ganny zot 10poursan. Be savedir dan sak fanmir kot i annan sa

10poursan pe antre i pou annan en ramifikasyon ki pozitiv.

E alors ler Prezidan Larepublik ti'n fer son prononsman pou dir nou pou get dan *welfare* bann dimoun aze, pa krwar zot atraver bann largiman bon marse zot, zot pou vin *hijack* nou lentansyon ki enn ki prop. Zot lentansyon atraver sa Mosyon fer monte, be zot pa dir ki manner, fer monte, fer monte apre dezyenman zot pou revwar laz retret.

Me selman nou tou nou konnen ki *statement* Prezidan Faure ti fer e i ti fer sa *statement* baze lo resers ki'n fini etabli *trend* a sa ki'n konsern Fon Pansyon e menm *trend* an relasyon avek laz Sekirite Sosyal ki nou, nou'n bezwen revwar.

Wi, pa ti en desizyon popiler me nou ti bezwen pran dan lentere nasyon pou nou kapab asire ki i an stabilite fiskal, a sa ki konsern Fon Pansyon dan li menm. E lemonn an antye kantmenm zot, zot oule dir nou pa pou kapab regard lemonn an antye, me nou tou nou konnen poudir *the trend is that the population is aging*.

E mon kontan poudir baze lo konsern ki mwan mon ti'n soumet avek Minis Lanplwa isi dan sa Lasanble, an sa ki konsern bann dimoun aze, ki ler zot in ariv laz retret i annan en prosedir ki an plas atraver Lalwa Lanplwa ki bezwen ganny revwar pou zot kapab kontinyen travay e pou zot kapab ganny en benefis atraver zot pansyon ouswa zot Sekirite Sosyal, pour ki zot kapab anmenn en pe plis.

E Minis baze lo konversasyon ki nou'n gannyen in pare atraver Prozedlwa ki pou von devan Lasanble anmenn en sanzman e sa i pou anmenn en keksoz pozitiv pou nou ban dimoun aze.

E lo size *HFC*, wi parfwa dimoun i ganny difikilte pou ganny akse avek *loan*, me i reste lo nou koman bann Onorab pou kapab fer sa *phone call* lo lapar sa zabitan pou li kapab ganny akse avek son *loan HFC*.

E mon kapab dir ki i annan pa mal dimoun ki'n kapab ganny zot *Scheme*- zot sipor atraver *reroofing*. Wi, kekfwa i annan sa laspe kot ou bezwen annan en garanter, kot ou bezwen fer sir ki sa laspe i ganny kouver e normalman nou propoze avek lafanmir poudir i devret ou zanfan ki devret

kapab pran sa *guarantee* akoz finalman sa zanfan pe reste anba menm twa e i vin son responsabilite pou li kapab pran.

Me dan lenstans ki i annan en labsans zanfan dan sa lakour mon krwar nou devret kapab pas sa kou, sa depans ki pou ganny antreprann atraver sa *loan* an ka en dimoun i *passed away* i antre lo propriyete sa dimoun koman en *charge* pour ki demen ler sa zanfan i ganny sa later, i ganny sa lakaz premye lobligasyon ki li i pou bezwen fer se pou li pey sa ki son paran in kit deryer. Akoz finalman sa lakaz i pe vin pou li. Nou war sa *trend*.

Ankour bokou fwa ler paran in fini *passed away* la ki tou zanfan i vin ansanm pou lager zot bout, me ler manman ek papa i vivan fer zot devwar parey mon koleg Onorab Norbert in met lanfaz lo la i enportan pou ou rekonnnet sa louvraz ki ou paran in fer, irespektiv ou relasyon avek li ozordi ou bezwen rekonnnet poudir li ki'n donn ou nesans, li ki'n met manze lo ou lasyet, li ki'n donn ou tou swen nesaser pou ou vin en adilt.

E alors annan sa kourtswazi pou kapab fer le lesansyel e se la kot dan

labsans sa eleman ki mon santi i manke, mon pa pou dir dan tou lakour i annan lakour kot zanfan pe pran zot responsabilite ver zot paran.

MR SPEAKER

10 minit Onorab.

HON SATHYA NAIDU

Mersi Mr Speaker. Ou war i annan en ta keksoz pozitiv ou swa bann kontribisyon pozitiv ki nou kapab fer, i regretab mon pa pe vreman ganny sa loportinite pou fer, dan plas fer pase bann alegasyon, fabrik bann keksoz ki pa egziste avek lespri pou anbet dimoun.

Be les mwan zis dir zot dimoun aze osi konmela zot sitan alert, zot ekout nou tou e zot kapab balans keksoz avek la realite. E zot, zot pou donn nou tou konfyans nesaser aköz nou, nou en Gouvernman ki krwar dan loportinite pou nou dimoun e sa i enkli dimoun aze.

E mon oule felisit tou bann Onorab ki pe fer en travay kot nou pe angaz nou ban dimoun aze, kot nou pe pran swen avek nou bann dimoun aze. Dimoun aze ki pa ganny ede ek *carer* nou, nou fer sir ki zot ganny asiste ek *carer*.

MR SPEAKER

Terminen *please*.

HON SATHYA NAIDU

Nou pa vin envant en bann zistwar pou dir entel en, en wi, wi i pa ti ganny *carer* pou 2 mwan, selman si ou konnen ki ou pe fer? Eskize Mr Speaker. Mersi pou ou letan.

MR SPEAKER

Mersi Onorab. Onorab Samynadin.

HON KELLY SAMYNADIN

Mersi Mr Speaker. Bonn apre midi tou mon bann koleg Onorab e tou dimoun a lekout.

Mr Speaker, sa mo dinyite i vedir sa santiman ki en dimoun i annan pou son prop lenportans ek valer ensi ki respe ki lezot dimoun i annan pou li, Lartik 36(a) nou Konstitisyon i dir ki Leta i rekonnet bann dimoun aze ek dezabilite pou proteksyon sosyal e avek en regar pou asir legzersis efektif sa drwa, i antreprann pou fer provizyon pou amelyor kalite lavi, byennet e mentenans bann dimoun aze ek dezabilite.

Akoz ki i nesaser pou mentenir dinyite nou bann dimoun aze? Mr Speaker sa laspe respe i enn ki vreman vital, nou bann sitwayen aze i

en kous nou sosyete ki'n akimil bokou lannen konesans lasazes ek leksperyans. An valorizan zot dinyite i vedir rekonnèt zot bann kontribisyon anver lasosyete, lafanmir ek la kominote ki zot in fer o kour bann lannen.

Tou sitwayen i merit ganny trete avek respe pe enport zot laz. Proteksyon dinyite bann dimoun aze i afirm zot drwa ineran koman bann *être* imen an asiran ki zot pa ganny marzinalize oubyen pas atraver diskriminasyon.

Dezyenmman Mr Speaker letan nou tret nou bann dimoun ae avek dinyite i ede amelyor zot lasante mantal e emosyonnel, mank respe ek neglizans i kapab anmenn bann santiman izolasyon, depresyon ek lensifizans pandan ki respe ek latansyon i amelyor zot sans lenportans ek sifizans.

Prezervasyon dinyite bann dimoun aze i osi ede mentenir zot sans lekonomi e permet zot kapab fer bann desizyon ki kapab ed zot fer zot bann byennet personnel. Mr Speaker, letan lasosyete i respekte e valoriz zot popilasyon aze i ede ranforsi bann lyen enter zenerasyonnel e promot en kiltir konpasyon ek anpati. An

retour i kre en kominote pli enklisiv e byenveyan.

Mr Speaker, mon pou dir ki tou sa bann rezon ki mon'n donner pe deza arive dan nou pei, nou Gouvernman pe fer bokou pou asire ki tou dimoun aze dan Sesel pe zwir en lavi ki konfortab.

Nou pe tann koz bokou lo reminerasyon, me eski se zis sa ki permet en sitwayen aze viv dan dinyite? Larepons i non Mr Speaker, bann fasilite parey lozman, lenfrastruktir, transportasyon, swen lasante i egalman enportan.

Dan distrik Au Cap Mr Speaker, i annan bokou ki nou pe fer pou garanti dinyite nou sitwayen aze, laplipar sou distrik i ekipe avek fasilite semen, lalimyer ek lezot lenfrastruktir ki dan bon kondisyon pou permet zot kapab sorti e ariv kot zot byen e pli enportan santi zot an sekirite dan zot prop kominote.

Nou annan en Ladministrasyon Distrik ki okipe avek bann servis, kot bann dimoun aze i kapab ganny akse avek pandan ler travay. Distrik Au Cap i osi annan en regroupman *Senior Citizens* ki vremen aktiv e nenport ki dimoun ki dan sa kategori laz i kapab zwenn e partisipe.

Zisteman le 26 Oktob zot pe organiz en *dinner dance* pou lev fon pou bann aktivite ki zot pe planifye pou le fitir e mon pe demann avek tou zabitan ki anvi partisipe, pou pran kontak avek Biro Distrik oubyen mwan menm. Nou pe demann Gouvernman pou fer plis Mr Speaker, mwan mon pou dir ki sifizaman pe ganny fer pou sa group dimoun.

Tre byento avan lannen fini *Old Peoples Home* Au Cap pou ariv lo son faz konplesyon avek en nouvo fasad. Bann rezidan pou retourn dan en *Home* pli konfortab kot zot dinyite pou pe pli byen ganny asire apre plizyer lannen ki sa landrwa ti ganny neglize, kot nou ti pe esper en proze renovasyon mazer lo sa *Home* finalman zot rev in akonplir.

E mon profite pou remersye nou Gouvernman prensipalman Minister Lafanmir, pou finalman get dan *welfare* bann dimoun aze Au Cap.

Par kont Mr Speaker, menm si nou bann dimoun aze i reste dan en *Home* oubyen dan konfor en lakaz ki zot in travay pandan zot zenn tan pou batir, menm si zot pe ganny en pansyon ek Sekirite Sosyal i annan parmi zot ki pas atraver

en problemn emosyonnel serye e sa i *la solitude*.

Bokou dimoun aze i pas atraver depresyon oubyen lezot sityasyon mantal parey lafreyer, *anxiety* ou menm sagrinasyon akoz zot tousel e zot pa war zot pros.

Mon pe lans en lapel avek tou Seselwa ki konnen oubyen annan en manman, en papa, en tonton, en frer, en ser, en kouzen, en kouzin, ou menm en zanmi ki pe reste li tousel pou pa abandonn li ; en pti *phone call* oubyen en pti vizit detanzantan en pti pasaz pou anmenn li lanmes oubyen kot klinik i sifizan pou fer rezouir zon leker.

Sa i fer mwan mazin manmzel Miette en zabitan Green Estate ki malgre ki i reste li tousel i annan li en bon *carer* ki okip li tre bye e son nyes Theresette ki pa reste tro lwen avek li. Manmzel Miette fel selebre son 100tyenm Laniverser sa lannen e i en madanm ki ankor for e ranpli ek lazwa de viv.

Mon oule profite pou remersye son *carer* ensi ki son nyes pou kontinyen okip byen manmzel Miette. En pti madanm byen saz avek en zoli leker. Mon pou osi profite pou felisit e ankouraz tou *carers* ou

manm fanmir atraver pei ki pe fer zot mye pou okip byen nou bann dimoun aze, zot travay e zefor pe ganny rekonnet.

Mon rekonforte ki Gouvernman pe konsider antreprann bann program *training* pli aprofondir pou bann *carers*, avek bi pou zot amelyor servis ki zot ofer atraver *Home Care Agency*. En lot pa anver prezervasyon dinyite nou bann sitwayen aze.

Mon pe zis rekomande ki sa i ava en program ki kontinyel e ki nou bann *home carers* i ava santi zot travay pe ganny valorize pour ki an retour zot ava kontinyen delivre en servis ki alaoter.

Avek en servis *home care* ki de kalite kot dinyite nou bann dimoun aze i ganny respekte i an retourn garanti ki zot ganny trete avek konpasyon e ki anmenn ver pli bon swen e rezilta lasante.

Mr Speaker, responsabilite dinyite nou bann dimoun aze pa repoz antyerman lo Gouvernman, i esansyel ki nou tou nou zwenn en par pou garanti ki zot dinyite pe ganny sofgarde aköz an retour nou pou vwar zot pe viv en lavi ki epanouisman, respektab, ranpli ek konpasyon ki pe

kontribye ver globalite fabrik moral nou sosyete.

Paran i merit edik zot zanfan lo bann diferan valer tel ki lanmour, konpasyon respe, latolerans, limilite eksetera. Sa pou ed zot pli tar pou rekonnet ki i enportan pou nou okip e pran swen avek nou bann gran paran.

Proverb sapit 22 verse 6, i dir "*train a child in the way he should go, and when he is old he will not depart from it*" pwen refleksyon Mr Speaker.

Mr Speaker, mon pou dir ki wi nou popilasyon i enn ki pe vyei a en *rate* alarman ki en reprezantasyon 20poursan, statistik ki mon'n resevwar sorti kot Biro Statistik i demontre ki par Zen 2024 popilasyon dimoun aze in monte pou ariv 9.3poursan sorti 8.9poursan an 2023.

Se pour sa rezon ki Gouvernman ti napa swa, me pou fer laz retreat monte ki ti en reprezantasyon R840 milyon pou 2023. Minister Finans in fer resorti byen kler ki prosen zenerasyon bann kontribiter *tax* pa ase pou kapab soutenir Fon Sekirite Sosyal.

Mr Speaker, Zournal Nasyon date le 5 Avril 2023 i fer resorti ki en gran porsyon nou lafors travayer ki kontribye pou

soutenir sa fon pa dan lanplwa formel e sa i en pti pe plis ki 8 mil en group signifikan nou popilasyon ki kapab travay.

En reprezantasyon 4 mil 300 pe swiv tretman pou drog e enkli bann lezot problem sosyoekonomik ki nou pei pe fer fas avek, i parmi lezot rezon ki'n kontribye pou laz retret monte. Bann sif vreman enkyetan Mr Speaker.

Parti minoriter in a plizyer repriz fer en bann sitasyon ki swadizan nou lo sa kote latab nou'n dir dan lefase, me sa ki zot in *fail* pou mansyonnen se ki an Zilyet 2017 Ansyen Prezidan Faure ti pronons pozisyon son Gouvernman lo sa size laz retret.

Lartik *Seychelles News Agency* date le 25 Zilyet 2017 ti sit Mr Faure pandan k i ti pe adres Lasanble Nasyonal an Oktob 2016 e mon lir *comme swivan*; -

“The legal retirement age in Seychelles should increase from 63 to 65 years, and the age of collecting one’s pension should rise from 60 to 63. The fact that the population is living longer the government believes that the time has come to prepare our population for an increase in the retirement age.”

Alors Mr Speaker ki zot pe mangonnen? Ki zot pe konplent? Si zot ti pou dan Gouvernman ozordi bann dimoun aze Sesel ti pou dan menm sityasyon ki zot ladan ozordi. Sa zoli kales kase ki Onorab Aglae ti'n koz lo la Mr Speaker ti pe komans defigure anba zot *watch*. Ase vin fer nou krwar lizour pou aswar.

Pa zis Sesel ki laz retret in ogmante Mr Speaker; *Israel, Iceland* ek *Norway* i parmi bann ki zot laz retret in ariv 67 an e *L’Indonésie* pou li in ariv 69 an. Pandan ki *Denmark* son laz retret i 66 an sa pei pe anvizaze pou ogmant pou li pou 68 an par 2030 e 69 an par 2035.

Se pour sa rezon ki nou Prezidan in anonse ki sa group dimoun pa pou ganny kit deryer e ki zot osi zot pou tre byento benefisy avek en logmantasyon dan zot benefis sosyal.

Anba Gouvernman *LDS*, pansyon bann dimoun aze in ogmante sorti R5 mil 250 an 2019 pou ariv R5 mil 750 an 2022 en logmantasyon R500. Mr Speaker, Gouvernman *LDS* in pran kont tou bann difikilte ki zot in kapab pe fer fas avek parey nenport ki kous nou popilasyon.

Annou aret fer politik bon marse avek nou bann dimoun aze. Mon asire ki avek lasazes ki zot annan, zot a kapab reflexir pou zot menm e vwar si vremen zot sityasyon lavi i enn ki sitan deplorab parey Parti Minoriter pe sey listre dan sa Lasanble ozordi.

Taler mon'n tann en Onorab lot kote latab dir *off mic* ki zot pou rebran zot pei, be Mr Speaker depi kan sa pei ti pou *United Seychelles*? Sa pei ki apel Sesel i pou tou son zanfan, pou tou Seselwa enkli tou son bann dimoun aze.

MR SPEAKER

10 minit Onorab.

HON KELLY SAMYNADIN

Mon pe al konklir Mr Speaker.

MR SPEAKER

Silvouple wi.

HON KELLY SAMYNADIN

Mon fek ganny en mesaz par enn mon zabitan bomaten e mon sit li; -

“Bonzour Onorab, mon en pe nerve la bomaten akoz politik bon marse, fri ek legim Bazar i bon marse, yer mon'n aste 6 ponm pou R25, la akoz Prezidan dan konvansyon in dir ki zot pou ogmant benefis

dimoun aze, *carer* e lezot osi prezan zot profite ki sa Mosyon pou fer krwar zot ki'n dir Prezidan get dan *welfare* sa bann dimoun.

Prezan ki pli gou sa *MNA La Digue* i a dir en madanm in *call* li pou dir li ki son linet in pare, selman i napa larzan pou pey bato pou desann, be sa Onorab La Digue i la Mahe i pa kapab rann en servis sa Madanm pou pran son linet Mahe pou anmenn La Digue?”

(laughter)

HON KELLY SAMYNADIN

Pou konklir Mr Speaker mon pou dir ki i pa pou fer zistis pou mwan vot pou en Mosyon, ki tou dabor pe admet ki wi, Gouvernman *LDS* pe garanti ki nou bann sitwayen pe viv dan dinyite me ki pe demande ki plis i ganny fer.

Akoz si mon fer sa mon pou pe kontradir mon prop Gouvernman. Tro bokou pe ganny fer e i annan ankor pe al ganny fer e mon felisit mon Gouvernman pou travay ki pe fer pou garanti ki nou bann dimoun aze kontinyelman viv dan dinyite. Avek sa Mr Speaker mon remersye ou.

MR SPEAKER

Mersi Onorab. Onorab Monthy.

HON PHILIP MONTHY

Mersi Mr Speaker. Mr Speaker, depi keler la? 4 er 37, depi bomaten mon pe asize e mon'n ekout sa bann lentervansyon sa bann Manm lo lot kote latab ki swadizan bann gran defander bann dimoun aze.

E plis ki mwan mon'n ekout zot Mr Speaker e mon asire ki plis nou bann dimoun aze e Seselwa an zeneral ler in ekout zot - e la mon pe koz lo sa detrwa ki annan kouraz pou ekoute pa bann ki'n met zot televizyon lo *mute*.

Plis ou realize ki kantite fay ki sa bann zans i fay, e ki kantite dezespere ki zot dezespere e ki kantite bite ki zot in bite Mr Speaker. Zot in taye pou vin avek en Mosyon ki zot in dir in vin apre 2 letour ki zot in fer dan tou distrik, apre ki zot in koz avek plizyer dimoun aze.

E se la ki zot in pran- (pa fatig ou ek Cascade ou, vin lager antoure ou mon pou bat zot selman)

E se la ki zot in pran kont ki kantite dan mal dapre zot sa group dimoun i ladan Mr Speaker. Mr Speaker, sa i zis en bann mansonz e mannev bat latet ki sa parti i sitan annan leksperyans ladan.

Mosyon ki la devan nou i pa'n vin lo *Order Paper* aköz zot sitan konsernen avek dimoun aze Mr Speaker. Si sa ti leka pandan- mon pa pou mansyonn 43 an zot in dir nou aret koz lo la, pandan tou sa letan ki zot in la zot ti a fer bokou plis pou sa group dimoun Mr Speaker si zot ti vreman konsernen avek sa group dimoun.

Mosyon pa devan sa Lasanble ozordi aköz diskisyon ki zot in fer avek sa bann dimoun.

Mr Speaker Mosyon i la aköz tou senpleman zot konnen ki Gouvernman *LDS* parey in donn R500 bann dimoun aze ki pa ti pe benefisye avek Fon Pansyon ti pe ganny zis zot Sekirite Sosyal, zot ti ganny R500. Oubyen bann ki ti pe ganny Fon Pansyon me ki ler ou war zot ek zot Sekirite Sosyal i tonm par anba 8 mil zot ti pe ganny en lasistans.

Zot konnen ki sa bann led ki kontinyen, Prezidan in pronons son lekor lo la e zot konnen poudir en logmantasyon pe vini byento. Parey Onorab Samynadin fek dir zot, zot pou taye, zot pou fer dimoun krwar poudir zot bann bon dimoun kan nou konnen zot bann move dimoun Mr Speaker.

Zot ki'n vin ek sa nide, zot ki'n dir Prezidan donn sa logmantasyon. Se sa bi sa Mosyon ozordi la napa okenn lentere dimoun aze aker, se pirman en Mosyon politik.

Nou'n ganny dir Mr Speaker ki nou dan konfizyon, ki latet pa bon, be mwan dan sa pti 10minit ki ou'n donn mwan mon pou profite pou montre Lepep Seselwa lekel ki dan konfizyon e lekel ki latet pa bon.

Zot in dir ki *US* i baze lo ban Polisi ki nob, ki tous leker, ki valoriz bann dimoun aze, ki valoriz dinyite. Selman apre Mr Speaker en lot i dir ki nou *LDS* nou pe servi sa bann menm Polisi ki nob, ki valoriz dimoun aze tou sa.

E apre en lot i vini i dir nou pa pe fer naryen pou dimoun aze, be si ou dir ou pe enplimant bann Polisi ki ti sitan bon ki ou, ou ti pe enplimante savedir nou pe fer byen parey ou dir ou, ou ti fer, ki mannyer ou, ou vini ou dir nou pa pe fer naryen en lot i dir ou pa pe fer naryen apre Mr Speaker? Mwan sa ki mon konfize.

Zot dir zot pou fer desan laz retreat, sorti 65 an pou vin 63 an pourtan zot ti donn zot vot ansyen Prezidan Faure ki limenm li ki ti anons sa. Akoz i ti anons sa akoz ti ana pli gran

group dimoun ki pe viv pli lontan, se sa rezon prensipal sa fon pa ti pou vin soutenab.

Onorab Spiro i vini i dir la kantite dimoun aze pe grosi e dimoun pe viv pli lontan. Li menm li i admet ankor sa Mr Speaker, selman zot, zot pou vini zot pou fer desann laz retreat. Be lekel ki latet pa bon la Mr Speaker?

Mon'n tann dir Prezidan Ramkalawan ti dir si ou pe ganny Sekirite Sosyal fodre koup pansyon, Mr Speaker, bat latet ankor. Be li menm li sa Onorab ki'n dir sa in dir li i pa pe koz lalang i pe koz laverite.

Mr Speaker, in nonm sa mo lalang li en, mwan mon pou dir li i lalang, akoz ki Prezidan Ramkalawan ti dir i ti servi legzanp lo li, si li ler in pram son retreat son pansyon pe donn li sepa 60 mil mon pa konnen konbyen Prezidan i gannyen, eski i vremen bezwen Sekirite Sosyal?

I ti dir non nou pou bezwen gete sa si en dimoun sepa son Fon Pansyon i pe ganny R80 mil eski i bezwen sa R5 mil? Se sa ki Prezidan ti dir. Li in detourn sa lenvers pou li zis vin bat latet Seselwa Mr Speaker.

Zot in komans atak mon distrik Cascade Mr Speaker

mon'n ganny dir ki i annan en dimoun aze pa ankor kapab retourn kot li, zot konnen konbyen dimoun aze in ganny afekte dan leksplozyon zot? Zot konnen konbyen dimoun aze ki'n fini retourn kot li zot? Mon a fer zot konnen mwan.

Sa dimoun aze ki zot pe dir Mr Speaker zot dir i pe reste kot fanmir be i tre byen, mwan mon'n perdi mon manman laz 12 an si i ti ankor la i ti dan leksplozyon, i ti'n ganny afekte mon ti pou pran li mon ti pou met li kot mwan Mr Speaker.

Si i pe reste kot fanmir sa fanmir in byen fer mersi bokou sa bann zanfan zot in pran zot responsabilite zot in pran responsabilite zot in anmas zot vye manman. Mon ti krwar zot pe dir mwan sa dimoun aze pe dormi deor mwan Mr Speaker. Be non.

E la mon pou profite ankor ki parey mon'n deza fer mon pou remersye lakonpanyen *Airtel* ki ti ofer son servis pou repar 3 lakaz dan Parson Estate e ou konnen ki nou ti fer ansanm ek zot? Nou ti swazir lakaz 3 dimoun aze Mr Speaker pou zot vin repare e sa 3 lakaz in repare e sa bann dimoun pe viv dan konfor. Mon remersye zot.

Mon remersye Mr Marc Woodcock avek son Lasosyasyon *Power Boat*, nou ti *raise* R50 mil en aktivite nou ti fer Anse Royale. Nou'n aste plizyer *item* elektronik ki nou'n donn plizyer fanmir, plizyer dimoun aze in benefisye avek sa Mr Speaker.

Zot sa Parti *US* la ki'n vin koze ozordi en dimoun aze pa ankor retourn kot li, konbyen zot ti donner dan fon dezas, 200 eklek mil? Be tou sa later ki zot in vann tou sa milyon, pran zis enn dan sa ta milyon repar lakaz en dimoun aze, repar lakaz sa dimoun aze ki zot in koz lo la i ti a kapab retourn kot li.

Mr Speaker, zot in koz lo dinyite, zot in koz lo sistenm, zot, zot annan bann sistenm a lonterm. Eski *carer* ki zot in koz bokou lo la anba zot Gouvernman ti en plan efikas e lonterm? Non. Se ozordi anba nou Gouvernman ki *carer* pe al war li dan en travay formel e avek bann benefis ki zot merite dan sa travay.

Carer ti zis en *post* ki ti ganny kree pou politik pou rezon politik Mr Speaker. Ti napa okenn dinyite naryen atase ek sa. E la nou ki pe al donn sa bann travayer sa group dimoun zot dinyite.

Ou pe koz dinyite, ler ou envit nou bann vye paran *State House* tou le kan sa le 16 Novanm? Tou le 16 Novanm donn zot R50 fors zot bat lanmen apre retourn kot zot avek en bwat biskwi. Mr Speaker, be sa dinyite sa? Be sa ou pe abiz dinyite nou bann vye paran nou bann vye dimoun. R50 ek en bwat biskwi, tou-le-z-an apre ou vin koz lo dinyite?

Mr Speaker, *LDS* i en parti ki reste konnekte avek son zabitan. Nou'n ganny dir nou, nou'n fer 2 letour tou distrik zot, zot ankor pe trennen deryer. Ou konnen akoz zot in fer 3 letour Mr Speaker? Akoz sa kantite aktivis ki zot annan la i sitan ptigin, ler zot al dan en distrik la zot ganny difikilte pou kouver sa distrik.

Nou ler nou antre avek nou group aktivis la nou kouver en distrik antye, nou pa bezwen retournen. Mr Speaker, mwan pou mon sa Mosyon ozordi i zis en Mosyon politik, napa naryen plis ki sa i zis en mannev politik pou sey bat latet nou bann dimoun pou fer zot krwar poudir sa benefis ki nou pe al gannyen se nou ki'n dir donn zot, se nou ki'n vin avek.

E pour sa rezonn mwan mon pe dir mon bann dimoun aze dan distrik sirtou dan

Distrik Cascade e Cascade i distrik ki annan dimoun pli vye dan Sesel, ti annan premye ek dezyenm malerezman premye in *passed away* Mrs Benoit, *still* dezyenm dimoun i *still* dimoun pli vye dan Sesel.

Eski nou pe dir nou bann dimoun aze pa pe ganny manze, pa pe manze, pa pe viv byen? 104 an, 107 an?

Mr Speaker, mwan en tel Mosyon ler mwan mon get li parey mon bann koleg in dir dan ki laliny zot pou vote, mon konnen kwa ki pe vini pou nou bann dimoun mon'n pas kot plizyer lakour mon'n koz ek zot e plizyer fwa nou'n met devan Prezidan sa ki bann dimoun in dir.

Plizyer *blitz* ki nou fer, nou'n rankontre bann dimoun, nou'n koz avek zot e nou ti konnen sa benefis pou vini napa naryen pou fer avek lannen eleksyon, napa naryen pou fer avek desizyon popilis. Plizyer desizyon in ganny donner 10poursan.

MR SPEAKER

10 minit Onorab.

HON PHILIP MONTHY

Bann benefis, envalidite tousala in ganny donner. La in ler pou nou get en kou nou

bann vye dimoun ankor e zot pou ganny gete pa *US* ki pou dir nou ki pou fer Mr Speaker. Mersi.

MR SPEAKER

Mersi Onorab. Onorab Georges.

HON BERNARD GEORGES

Mersi Mr Speaker. Mr Speaker, mon pou vot kont sa Mosyon e mon pou vot kont sa Mosyon Mr Speaker pou 3 rezon; premyerman mon regard sa Mosyon devan mwan e i pe demann Gouvernman fer le neseseur pour ki bann dimoun aze i viv dan plis dinyite.

Mr Speaker Gouvernman pe fer le neseseur pou dimoun aze viv dan dinyite, nou pa bezwen anmenn en Mosyon piu demann Gouvernman fer sa ki i pe deza fer.

Dezyenmman, sa Mosyon pa tous en kategori dimoun ki sipoze pe fer le neseseur pou bann dimoun aze viv dan plis dinyite e sa se fanmir sa bann dimoun aze. Sa Mosyon i kit sa bann dimoun ater konpletman, akoz Mr Speaker akoz sa se la fason ki *SPPF*, *US*, Parti Lepep, *SPUP* in fer.

Sel keksoz ki zot anviz zot, se pran larzan e donn bann dimoun san demann zot pran okenn responsabilite, san

demann okenn dimoun pran okenn responsabilite pou zot.

E trwazyenm rezon e rezon prensipal se ki sa set en Mosyon ki pirman politik e i en Mosyon ki pa senser. Si sa Mosyon ti senser Mr Speaker, ozordi sa ki nou ti pou'n tande olye zis en seri kalonmni lo Gouvernman *LDS*, lo en seri kisisa ki Gouvernman dapre zot pa'n fer, nou ti ava tann en lalis keksoz ki Gouvernman ti devret pe fer.

E nou pa'n ganny en keksoz apard Onorab Cosgrow e mon ava retourn lo li taler - napa enn parmi sa bann Manm *US* parti minoriter ki'n koze ozordi ki'n dir Gouvernman ou pa pe fer sa, sa, sa mon ti ava propoze ki ou fer sa, sa, sa pou fer nou bann dimoun aze viv dan plis dinyite.

Ler en dimoun i anmenn en Mosyon pou demann avek Gouvernman pou fer le neseseur e i pa donn en legzanp lo ki Gouvernman i devret fer, mwan mon kategoriz sa Mosyon koman en Mosyon ki pir politik e ki pa senser. E en Mosyon ki pa senser e en Mosyon ki vin fer politik isi, i pa merit mon sipor e i pa pou ganny mon sipor la ozordi.

Mr Speaker, tou Gouvernman enkli zot Gouvernman e enkli nou

Gouvernman, i pou fer tou sa ki neser pou fer bann dimoun aze viv dan dinyite. E nou pa kapab dir poudir en Gouvernman in fer plis ki en lot oubyen en Gouvernman i sel Gouvernman ki'n fer e en lot pa'n fer.

Tou Gouvernman i pou fer tou keksoz pou son dimoun aze, pou son zenes, pou son lasante, pou son ledikasyon, pou son lozman. Tou Gouvernman i travay koumsa. E Gouvernman i travay koumsa Mr Speaker, akoz se sa labaz en Gouvernman. En ladministrasyon i vini pou amelyor lavi son pep.

Kekfwa en bann i ava al dan en serten direksyon e en lot bann i ava al dan en lot direksyon, me tou Gouvernman pou fer sa.

Par kont Mr Speaker, i annan Gouvernman ki abiz, ki abiz e mon servi sa mo avek bokou refleksyon ki abiz lo zot vyeyar, oubyen ki pa mazin *welfare* zot vyeyar, zot sel bi se servi sa bann dimoun aze pou zot prop benefis politik. E sa Gouvernman ki'n montre nou ki mannyer sa i fer se pa lot ki sa Gouvernman *SPPF*, Lepep ek *US*.

Mr Speaker, mon bezwen donn zis 2 legzanp;

premyerman lekel sa Gouvernman ki eleksyon apre eleksyon in trenn bann vye dimoun pou anmenn zot vote avek enn zot *carer*, pou fer sir ki zot vot pou zot? Lekel sa parti politik isi Sesel ki'n fer sa?

Mwan Mr Speaker, mon'n war sa mwan menm personnelman e ler sa dimoun pa fer sa ki zot anvi fer, ki zot fer, zot kit zot dan stasyon vote e zot pa retourn avek zot kot zot! Sa se zot mon bann zanmi! Se zot! Zot pa kapab vin koz, zot napa drwa vin koz ek nou lo dinyite pou bann dimoun aze ler zot, zot napa dinyite pou bann dimoun aze.

E dezyenmman Mr Speaker lekel ki ti dir nou pa kapab fer monte laz pansyon sorti R3 mil a R5 mil? Nou tou nou'n repet sa ozordi e nou pou repet li toultan akoz se zot ki ti dir. Zot pe vini ozordi koman gran defanser Lepep, selman ler ti annan en Polisi pou zot fer monte laz pansyon zot, zot in kale e zot in trouv toudsort rezon ki zot pa kapab fer, ziska ler ki nou nou'n met presyon lo zot pou fer zot fer.

Alor Mr Speaker, eskiz mwan Onorab Vidot atraver ou Mr Speaker e parti minoriter zot, zot napa okenn lesou pou vin donn nou lo fer bann

dimoun aze viv dan dinyite. Mr Speaker, nou, nou konn egzaktaman sa ki nou devret fer e sa Gouvernman ki nou la ozordi i konnen.

E Mr Speaker, mon ava demann zot en kestyon - si zot ti'n fer tou sa keksoz pou sa bann dimoun aze ki zot, zot in dir zot in fer akoz ki zot in perdi eleksyon avek sa gro mazorite ki zot in perdi an 2020? Akoz ki dimoun in vot kont zot, si zot, zot in fer tou sa bann keksoz byen pou bann dimoun?

Se akoz Mr Speaker, bann dimoun in realize ki sel keksoz ki zot fer se zot vin fer politik bon marse, zot bat latet dimoun pou zot sey ganny an lavans politik. Se tou Polisi *US*, zot ti koumsa ler zot ti komanse atraver en koudeta zot ankor koumsa ozordi. Zot sel lavantaz se pou zot.

Zot fer mwan mazin sa deba ki ti arive yer swar Mr Speaker, ant Kamala Harris avek ansyen Prezidan Donald Trump e nou'n vwar menm zafer ozordi kot i dan en parti ki pe koz pozitivite, i annan en parti ki'n pas en zournen zis pe koz negativite pe met problemn devan Lepep Seselwa kot problemn pa egziste.

Me mwan mon anvi dir avek sa bann dimoun Mr

Speaker e la mon a retourn lo bann propozisyon ki Onorab Cosgrow in fer, mwan mon a dir avek sa bann dimoun eskize, zot mannev pou sey anmenn en Mosyon ozordi pou anmyel bann dimoun aze pa'n marse e i pa pou pase devan sa Lasanble Nasyonal.

Mr Speaker, Onorab Cosgrow in dir ki ler, ler parti *US* pou vin o pouvwar zot pou fer 4 keksoz ; zot pou fer desann laz pansyon, zot pou fer monte pansyon, zot pou aranz *home carer* e zot pou aranz *ASP*, Lazans Proteksyon Sosyal.

Solman, solman i pa'n dir nou enn;- kote i pou ganny larzan pou fer monte pansyon, kote i pou ganny larzan pou fer desann laz pansyon, kote i pou ganny larzan pou aranz *home carer*, kote i pou ganny larzan pou aranz Lazans Proteksyon Sosyal. Konnen ki in dir Mr Speaker? La mon annan son parol mon rikorde, in dir nou pou war mekanizm pou fer tousala.

Be Onorab si ou'n deside si ou parti ou ki Sekreter Zeneral pou fer sa, ki mannyer ou pa ankor konn mekanizm ozordi, ou pe met nou lo petet ou anmenn en mekanizm en zour? Dir nou ozordi dir nou ozordi ki mannyer ou pou fer li

e la Lepep Seselwa ava krwar ou! la Lepep Seselwa ava krwar ou.

Pa vin anvoy nou demen tanto nou ava vin dir zot mekanizm mannyer nou'n pare. Larepons Mr Speaker i kler, zot napa ni en sou mekanizm, zot pe zis fer politik bon marse avek Lepep Seselwa. Par kont, par kont Mr Speaker, lala sa ki Gouvernman LDS in fer pou bann dimoun aze viv dan dinyite; -

Premyerman,
premyerman Mr Speaker, Sesel i pou tou son zanfan e sa i *include* bann dimoun aze. Nou ler nou vin o pouvwar ler nou'n vin o pouvwar nou pa'n vin o pouvwar pou lazenes, nou pa'n vin o pouvwar pou biznes, nou pa'n vin o pouvwar pou dimoun mizer, nou pa'n vin o pouvwar pou dimoun aze. Nou'n vin o pouvwar pou tou zanfan Sesel enn apre lot.

Dezyenmman Mr Speaker, nou'n fer lopital La Digue, dimoun aze pou benefisye. Nou'n fer monte laz pansyon, pa pou pini okenn dimoun me pou fer sir ki sa dimoun aze ki pou pran son retret dan 5 an, dan 10 an pou annan en pansyon, pou annan en pansyon.

Olye donn sa enn ozordi en pansyon e dir sa enn dan 5

an ou, ou al rod ou pansyon kot ou kapab.

Nou'n fer Mr Speaker laz parey mon dir laz sekirite nou'n fer monte, pour sa rezon nou'n aranz bann *home carers*, nou'n met zot lo en *scheme* pour ki zot kapab zot menm zot benefisye, nou'n *train* zot. Tousala Mr Speaker, se pour fer ki bann dimoun aze, sa bann *support staff* pou bann dimoun aze i kapab travay bokou, bokou pli byen.

E Mr Speaker, les mwan dir en dernyen keksoz apre midi - en keksoz ki zot tou zot pa'n realize, dimoun aze i viv dan dinyite Mr Speaker. Dimoun aze parey in ganny dir i tou kous sosyete, ou pa kapab-ou pa kapab e nou pa devret fer parey *US* in dir...

MR SPEAKER

10 minit Onorab.

HON BERNARD GEORGES

...fer en dimoun ariv laz 63 an, e ler i ariv laz 63 an i aret travay, i al lo Sekirite Sosyal.

Mr Speaker, la kot i annan en gran defayans e mon dernyen parol ozordi se dir avek bann dimoun deor vey byen lafason ki sa 2 parti politik pe azir. Enn i dir ou, ou ava ganny ou Sekirite Sosyal, ou ava

ganny ou pansyon, me si ou anvi ou ava kontinyen travay parey ou avek mwan Mr Speaker, ki nou tou lede nou'n ariv laz pansyon e nou ankor pe travay ozordi pou benefis sa pei.

Bokou dimoun i dan menm kategori ki nou. E dezyenmman, annou pa bliye ki se parti *US*, *SPPF*, *SPUP* ki ti donn pansyon, ki ti donn Sekirite Sosyal tou dimoun, sa dimoun pli mizer ek sa milyonner. Tou lede i ganny Sekirite Sosyal.

Annou regard byen aköz zot in fer sa, nou, nou'n dir i pa byen. Sa ki merite gannyen i ava gannyen sa ki pa merite gannyen pa pou gannyen.

MR SPEAKER

Terminen Onorab silvouple.

HON BERNARD GEORGES

Nou ava servi sa larzan pou donn zot pou fer zot viv dan plis dinyite. Avek sa detrwa mo Mr Speaker, mon repete Onorab Vidot ou Mosyon apre midi pa pou ganny mon sipor. Mersi Mr Speaker.

MR SPEAKER

Mersi. Onorab Henrie.

HON GERVAIS HENRIE

Mersi Mr Speaker. Bonn apre midi tou dimoun. Mr Speaker, mwan mon rekonnèt Lasanble Nasyonal koman en lenstitisyon ki nou bezwen anmenn bann size, ki non selman i annan en relevan nasyonal pou nou ansanm diskite komans en konversasyon nasyonal, me nou osi bezwen reflexir lo bann size ki lemonn an antye i en defi pou lemonn antye.

E Onorab Vidot mon ava dir ou poudir atraver ou Mr Speaker, pou anmenn en Mosyon dan sa direksyon i annan son merit, me nou bezwen fer li avek senserite avek le bi pei e nasyon a lavan, pa lentere nou parti politik.

E malerezman Mr Speaker, loter Mosyon i gat son Mosyon dan son premye laliny letan i dir dinyite dimoun aze i o sant ideoloji parti *United Seychelles* e aprezan i pran size dimoun aze konmsi zot ki annan *copyright* lo la.

Non, non, non, i pa leka. Aköz nou tou dan lavi si i annan en laport ki nou pou pas ladan apard lanmor se lavyeyes amwen ki lanmor i ariv avan. Alor nou tou nou pe reflexir lo nou vyeyes evantyelman.

Alors i en size ki konsern tou dimoun, napa politik ladan, napa parti *United Seychelles*,

napa *LDS*, napa politik sosyalis, napa ideoloji liberal, napa, i konsern pei e nasyon.

Mr Speaker, yer 5 er 12 mon anvoy en mesaz pou mon bann koleg lo sa kote latab e mon dir; - *“Lord I pray for the day when The National Assembly can discuss about an issue by starting a national debate without politicizing it.”*

Akoz mon ti anvoy sa? Ler Onorab *Leader* Lopoziyon ti politiz size lasante mantal lo Mosyon Onorab Naidu, i ti en size ki konsern nou tou e i ti merit napa politik, malerezman zot in fer li, donk zot in politiz sa size permet mwan fer sa remark Mr Speaker.

Nou pe koz lo dimoun aze e zot dinyite, savedir si nou pe dir dimoun aze bann dimoun ki ozordi la letan mon pe koze i annan 65 an. E sa bann dimoun an 1977 letan parti minoriter ti pran- vol pei dan fernwar sa bann dimoun ti annan 18 an.

E pou 43 an zot lavi ziske ler pei i lib an 2020 zot ti annan zot 61 an, zot in viv anba en sistenm ki'n pran drwa pou lavi - ki'n touye *TRNUC* in dir nou. Zot i pran drwa dinyite, zot in pran drwa laliberte, zot in pran drwa pou ganny en prose zis devan Lazistis, zot in pran drwa

lavi prive pou anvoy milisya devan ou laport pou ekoute ki ou dir aswar dan ou lakaz.

Zot in pran drwa laliberte konsyans, laliberte lekspresyon, drwa rasanbleman avek lasosyasyon, drwa partisip dan Gouvernman, drwa laliberte mouvman, drwa pou annan propriyete letan zot ti zis pran propriyete dimoun, drwa proteksyon egal anba Lalwa, drwa pou ganny akse avek lenformasyon ofisyel.

Drwa ganny swen medikal, si ou ti kont zot sa zans ti pou ser ou. Drwa pou ledikasyon, annan lozman, drwa travay. Si ou ti kont sistenm o pouwar ou ti ganny sere atraver sistenm *security clearance* Mr Speaker. E ou, ou konn sa tre byen - ou'n pase ladan.

E ozordi ler nou dan Lasanble letan nou pe koz dinyite zis regard latitid *Leader* Lopoziyon vizavi Speaker ki en dimoun aze e son koleg ki asiz zis obor li, Onorab *Leader Government Business* fason ki i reazir avek li. Be oli fason ki nou pe respe dimoun ki pli aze ki nou e donn zot sa dinyite ki zot bezwen?

Mr Speaker, bokou refleksyon pou nou fer. Mon ava

partaz en keksoz avek Lepep Seselwa, en *post* ki mon ti mete lo *Facebook* an Me 2023 e mon ava lir ki mon ti ekrire; -

“Pou la demokrasi ariv kot in arive ozordi dan Sesel, i akoz bann madanm avek zonnm Seselwa senp ki bokou nou pa konnen ou menm kapab ekspekte ki zot in fer, pou ankouraz e apiy lalit anmennen par bann dirizan Lopozisyon sa lepok.

Sa zenerasyon ti kouraze e determinen. Atraver zot led e sipor pou mouvman Lopozisyon depi menm avan retour miltiparti zot in pran bokou risk pou zot lavi, lavi zot zanfan e fanmir e zot biznes.

Bokou zot in ganny bate avek Gard Bate. Zot in ganny met dan kaso ilegalman, zot in sibir viktimizasyon administrativ, pa ganny *license* pou fer biznes, zot zanfan pa'n ganny *security clearance* pou travay e al etidye, ouswa zot pa'n ganny laprouvasyon lotorite plan pou zot devlopman.

Sa in kout zot bokou, ozordi sa zenerasyon pe kit nou enn par enn e i rar ki nou ganny sans dir zot mersi pou sakrifis, risk e soufrans ki zot in sibir anba rezim *SPUP*, *SPPF*, Parti Lepep e *US*.

Pou nou ariv kot nou ete ozordi e pou viv dan laliberte e dinyite koman en nasyon lib mon senpleman anvi tir mon sapo avek sak sa bann zonnm e fanm Seselwa, dir zot en gran mersi e dir avek zenerasyon ozordi ki nou napa kouraz parey sa bann avan nou ti annan. E ki alor nou drwa zot respe e remersiman ki nou kapab dir zot. Sa i tre enportan pou nou pa oubliye e apresye”

E lo sa kote latab nou dir, tou sa bann dimoun ki an “77 ti annan 18 an ziska letan nou ranvers sa sistenm ki ti la avan an 2020 nou dir zot en gran mersi. Mersi bokou pou tou sa ki zot in fer.

Mr Speaker, lo lot kote latab i dwa sa bann dimoun e *apology*; en *apology* akoz *truth*, *TRNUC* in dir nou ki sa bann dimoun in sibir e ziska ozordi kouraz pou zot dir ek sa bann dimoun pardon pou tou sa martir e fer zot pran tou zot dinyite imen, zot pa ankor kapab annan kouraz parey bann zonnm ek fanm adilt i merit fer e sa mon ava dir ‘*shame on you*’!

Mr Speaker depi bomaten in lev en largiman lo dinyite, be dinyite i pa zis donn larzan plis i en topik bokou pli larz me selman lefe ki zot in anmenn sa

zafer larzan e Onorab Loze i ava annan lodas dir ek nou, nou pa konnen *what is the issue* ki devan nou.

In sey melanz sa zafer pansyona avek benefis retrait. Menm ler Fon Pansyon ti pe dir ki annan en problem egalman benefis retrait ki dan Bidze ozordi i pe al dan rouz. An 2016 pansyon retrait dan atraver Bidze i ti pe ariv 47 poursan kantite larzan ki i anmase pou *income tax*.

Sa sonm ti monte pou ariv 68poursan an 2017, an 2023 i ti 71poursan e si ti'n napa sa sanzman dan Lalwa pou ogmant laz pansyon sorti 63 an pou vin 65 an laz retrait sa ti pou'n ariv 80poursan.

E savedir menm ler nou pe met larzan dan Fon Pansyon, larzan ki Leta pe ranmase atraver zis *income tax* e la par egzantp 2024 in prevwar ki pou anmas R1 bilyon, 284 milyon 729 mil i pa ase zis pou soutenir pansyon retrait.

Akoz granmersi i annan sa kantite etranze, pres 16poursan nou popilasyon travayer ; si demen bomaten zot tou zot lev zot kan zot ale, pti Sesel i dan problem.

E Onorab Kelly Samynadin in koz lo 2 group enportan; lakantite dimoun ki

dan sekter enformel plis ki 8 mil alor ki pa pe pey *tax* formel, la kantite dimoun ki pe abiz sibstans plis ki 4 mil 300 ki fer ki nou annan en problem koman en pei pou nou kapab gete ki mannyer nou pou zer sa benefis retrait.

Fon Pansyon sa i en lot deba ; ou pa kontribye ou pa gannyen. Me menm sa, si nou pa ti sanze e alor Fon Pansyon osi ti kapab benefisye disi 2034 Fon Pansyon i fini. E pou bann dimoun parey mwan, mon deklar mon lentere ladan ki pran tou mon *life savings* i dan Fon Pansyon.

Mwan mon ava dir ki mon pou lager lebra kase pou anpes Dr Herminie avek son tim *US*, retourn o pouvwar pou zot faid Sesel e *bankrupt* Fon Pansyon. Sa pa pou arive *on my watch* !

Akoz mon'n fini war e poudir ki mannyer en parti politik i ava dir ek nou i pou fer desann laz pansyon i pou fer monte pansyon ki pou peye be sa mon apel li en kalite sistenm finansyel bankal Mr Speaker. *Just doesn't make any sense!* E lekel ki dir sa? En boug ki ti deza dan *Cabinet* en Minis, be ki kalite Minis nou ti annan alors?

Mr Speaker, ozordi i annan plizyer loportinite pou

dimoun aze pou asire ki zot viv dan dinyite, menm ler nou ti vini an Zanvye 2021 ti annan zis R14 milyon dan kof Gouvernman, pei ti pe fer fas kont COVID, lager Ukraine e sa ta konpansasyon ki US in kit nou avek enkli La Misère, PUC Praslin, *fungus*, konpansasyon Alain St Ange, TRNUC, eksetera lake lera.

Bis in reste gratwit, *Home Repair Scheme* in reste, *Reroofing*, *loan* in reste, *Disabled Trust Fund* ki dimoun aze i kapab tap ladan. I annan egzansyon lo VAT, *Excise tax* ek *custom* pou bann dimoun dezabilite pou enport bann komodite...

MR SPEAKER

10 minit Onorab.

HON GERVAIS HENRIE

E STC malgre sa ki Onorab Loze in dir Mr Speaker, in redwir pri lo 60 marsandiz e ki dimoun aze osi i kapab benefisyè.

Sekirite Sosyal, *safety net*, 61.8 milyon dimoun aze i benefisyè avek. E nou'n donn zot en lasistans ziska R500 pou bann ki ganny par anba R9mil e R300 lo bil PUC. Mr Speaker, sa Gouvernman in fer bokou e pe kontinyen fer.

Parey mon ti komans mon lentervansyon, mon ava fini lo la Mr Speaker, nesesite pou koz lo sor dimoun aze i annan son plas, akoz lemond pe fer fas avek en leksplozyon dan *aging population* akoz standar lavi dimoun pe viv pli lontan.

E la mon annan mon 17 pwen ki mon ti a kapab met de lavan bann keksoz ki nou kapab fer letan pa ase e malerezman sa deba olye ki in vin dan en refleksyon nasyonal lo ki mannyer nou anbelir nou pei e nou nasyon, in tourn dan en *assessment* lo 4 an ladministrasyon LDS.

Onorab Audrey Vidot Mr Speaker, atraver son Mosyon, pa ti'n merit zanmen, zanmen, zanmen al dan sa direksyon e in en sans rate pou nou fer en konversasyon fran akoz i annan plis ki ini nou lo size dimoun aze ki sa ki separ li.

MR SPEAKER

Terminen Onorab silvouple.

HON GERVAIS HENRIE

Alor i domaz ki in al dan sa direksyon mon pa pou kapab siporte. Mersi.

MR SPEAKER

Mersi. Onorab Pillay.

HON SEBASTIEN PILLAY

Mersi Mr Speaker. Mon oule dir en bonn apre midi, e bonswar tou dimoun ki pe swiv Lasanble Nasyonal. E mon oule komans par dir ki labote sa Mosyon ki la se ki nou pa bezwen fer bokou pou konvenk sa bann dimoun oubyen sa lodyans ki sa Mosyon i konsernen pou zot kapab konnen kwa ki laverite e kwa ki mansonz e kwa ki lenvansyon.

Akoz zot in viv sa bann peryod, zot in war kwa ki'n pase, zot in ekout bann promes. E zot in realize poudir dan *LDS* ou pa kapab fer zot konfyans. Mr Speaker, enterven an ki'n koz avan mwan i enn lakoz bann rezon ki nou pe annan sa deba ozordi. Se gras a li ki ler in asiz dan sa sez in fer gro lebra, e pouvwar in mont dan son latet kot in blok en kestyon ki ti zisteman pe demann Gouvernman pou vin eksplike an relasyon avek pansyon retret ki pe arive.

E si *Leader Zafer* Gouvernman ki swadizan enn bann *Homme de L'oie* pli prominan dan nou pei ti'n lir son Konstitisyon, i ti a war ki Onorab Audrey pa kapab anba Konstitisyon anmenn serten mezir dan en Mosyon ki pou enpoz en sart lo Gouvernman.

In refize fer sa, i refize fer sa akoz son bi dan Lasanble Mr Speaker, se rod nou pou maltret nou se sa ki in dir e sa i lo rikord.

E i fer lapenn Mr Speaker, ler mon tann en Deputy Speaker denigre bann lezot Manm sa Lasanble, pou rezon ki zot in anmenn en Mosyon ki konsern en group dimoun ki pe eksprim zot konsern de zour an zour parmi popilasyon.

Mr Speaker, ler nou koz sa dimoun pli aze dan Cascade, kestyon fondamantal ki mon bezwen demande. Se ki dernyen fwa nou ti pas kot sa fanmir? E mwan mon kapab dir kategorikman ki zot pa'n zanmen pase.

Alors Mr Speaker, annou aret pran labou pou anvoy lo nou kanmarad. Mosyon devan nou i en keksoz ki senp. Zot pa kapab koz lo *Vulnerable Repair Scheme*, se akoz Gouvernman *US* ki ti met li an plas!

Zot pa kapab koz lo bis konsesyon bis *SPTC*, se Gouvernman *US* ki ti met li an plas!

Zot pa kapab koz lo *Home of the Elderly*, se Gouvernman *US* ki ti met li an plas! Zot pa kapab koz lo *Social Housing*, se Gouvernman *US* ki ti met li an plas!

Zot pa kapab koz lo Sekirite Sosyal, se Gouvernman US ki ti met li an plas!

(APPLAUSE)

HON SEBASTIEN PILLAY

Alors Mr Speaker, alors sa bann dimoun ki pe ekout nou ki ti annan 18 an, ozordi i annan 63 an e plis, sa bann dimoun i konn tre byen lekel ki'n fer kwa pou zot. E lekel ki pa ankor fer naryen pou zot!

(APPLAUSE)

HON SEBASTIEN PILLAY

Mr Speaker, ozordi US i ganny akize pou fer politik dan Lasanble Nasyonal. Eski i pa politik ler dirizan politik i servi resours Leta dan en mini Konvansyon, ki dayer ti napa plis dimoun ki laplenn Anse Aux Pins nou met lo rikord, pou li vin anons logmantasyon dan Sekirite Sosyal e lapey *carer*?

Menm keksoz ki i ti blanm tou Prezidan SPPF, Lepep, US pou fer oparavan. Mr Speaker, nou annan nou dan nou pei en bann Pinokyo ki pe *run* nou pei.

(APPLAUSE)

HON SEBASTIEN PILLAY

E i enposib pou zot koz laverite de zour an zour. Annou met lo

rikord ki pe arive. Zot in koz lo R500 ki bann dimoun in gannyen lo zot Sekirite Sosyal. Me pa tou dimoun ki ti ganny sa R500. Sa ki mon pe konpran la e zot in *let the cat out of the bag*, ki zot Prezidan pou al anonse tre byento ki sa bann dimoun pou ganny R500 lo zot Sekirite Sosyal. E sa pa nou ki pe dir, se Onorab Doyace Porice e en lot Onorab lot kote latab. Ki pou fer ki sa bann dimoun pou ganny R6250.

Eski sa bann dimoun aze, eski sa nou bann vyeyar, eski sa nou bann tonton nou bann tantin, i apel en Gouvernman serye sa? Tro pti git, tro tar!

Mr Speaker, ler nou koz lo donn *career* en pti benefis. Eski donn R1000 en *carer* ki'n fer 15 an i apel en keksoz sa? Tro pti git, tro tar!

(APPLAUSE)

HON SEBASTIEN PILLAY

Mr Speaker, US i annan en rikord ki mannyer pou met zonn o sant devlopman. Me ki'n arive? Zot koz nou lo bann prononsman Prezidan Faure, *regarding* Sekirite Sosyal, nou bann prononsman Gouvernman US i byen. Me zot ti fer promes, alors bann dimoun Seselwa pa ti siport

Gouvernman *US* ti met zot o pouvwar pou fer pli byen. Me eski zot in fer pli byen?

Atraver ou Mr Speaker, mon'n marse partou St Louis Onorab Naidu avan i sey vin tir sa lapay ki dan lizye Onorab Audrey, al tir sa blok ki dan son lizye aköz dimoun St Louis pa pe vot pou li ankör.

Dezyenmman Mr Speaker, ler mon tann koz lo sa bann semen partou dan Au Cap se Gouvernman *US* ki'n fer semen dan Au Cap Mr Speaker.

(APPLAUSE)

HON SEBASTIEN PILLAY

E ler ou pase partou dan Au Cap Mr Speaker, sel keştyon ki bann dimoun i demann ou se zot in war zot *MNA* zour eleksyon, me zot pa ankör war li ankör. Sa i laverite Mr Speaker. Mr Speaker, laverite i devan nou e larealite i la devan nou pou demontre konbyen Gouvernman *US* in fer.

Me ozordi nou ti annan loportinite pou nou koz lo kwa ki nou devret fer pou ede ki nou bann fanmir, nou bann vyeyar, nou bann dimoun, nou bann tonton, nou bann tantin tou dimoun aze i viv dan plis dinyite. Nou'n koz lo pri lavi ki'n monte.

Yer menm Mr Speaker, yer menm Onorab Naidu in anmenn en Mosyon ki nou, nou'n siporte avek grander lespri politik ki Onorab Georges pa pou zanmen kapab annan!

Avek en grander lespri politik par prouve nou pare pou siport en Mosyon ki pli byen, kot in dir langwas mantal anmennen par kou lavi siporte par Onorab Gervais Henrie, son parol lo verbatim Mr Speaker, ou konnen ki i dir nou ozordi? Kou lavi pa en problem pou bann dimoun aze. Sa ki i pe dir nou.

I dir nou koumsa an maltretan Seselwa. E sa in vin nouvo sport nasyonal *LDS*, se maltret Seselwa sak fwa nou anmenn en keksoz dan Lasanble.

Alors, annou tir en laliny lo tou diskisyon dan sa Lasanble ozordi apre midi, e annou met en keksoz drwat. Eski *LDS* in ganny elekte pou reprezant Lepep Seselwa, oubyen Prezidan ek son *Cabinet Minis*? Tou Seselwa i a note ki apre midi apre sa deba *LDS* i pas son letan defann Prezidan ek son *Cabinet Minis*. In pas son letan defann Gouvernman dan plas debout akote Lepep Seselwa.

I annan plizyer dimoun siporter *LDS*, ki pa neserman pou vot pou *US* ki'n vin devan e vin kot zot in koz ek zot lo sa Sekirite Sosyal, in koz ek zot lo problem lo bann trik ki'n monte an sa ki konsern bann *utilities*. Naryen zot pa'n kapab dir lo la. Pa i vre Onorab Naidu? Ou konn tre byen lekel ki mon pe koz lo la ou. Pa sey rode, akoz ou konnen lekel ki mon pe koz lo la.

Mr Speaker, annou serye dan sa Lasanble. E ler Onorab Hoareau i koz mon bann dimoun Beau Vallon, mon'n pase kot sa bann dimoun ki pe koz lo la. Son bann siporter wi, zot blanm li pou pa debout akote zot an relasyon ek Sekirite Sosyal, eski sa i pa realite Mr Speaker? Se sa ki nou pe viv i ozordi.

Alors, maltret Onorab Audrey, maltret mwan, maltret kote *US* pa pou anmenn nou okenn par Mr Speaker. E menm Mr Speaker, menm, menm evok non Bondye lo komansman nou lentervansyon apre komans maltret nou kanmarad Mr Speaker, i montre mwan ki kalite grander lespri *LDS* in arive annan ozordi dan sa Lasanble Nasyonal.

Mr Speaker, *LDS* i reprezant en sel keksoz pou

Sesel. Tro pti gin e tro tar. Realizan ki zot popilarite pe deklinen; realizan ki ozordi devan laport dimoun zot pa pe ganny resevwar parey avan, realizan ki konplent parmi dimoun pe ogmante alors zot komans propoz bann pli gran mezir.

Mr Speaker, koman en parti politik dan sa Lasanble Nasyonal nou'n ganny elekte, nou ganny mete dan sa Lasanble pou nou fer en keksoz, e sa se reprezant Lepep Seselwa. Reprezant lenter Lepep Seselwa, akoz se sa ki nou bezwen fer koman en Lasanble. Pa defann lenter Gouvernman. Pa met lenter Gouvernman premye.

Alors, atraver ou Mr Speaker, mon war ou pa'n dir naryen e mon'n ganny akize konmkwa mon pa tret ou avek dinyite, avek tou dinyite ki mon annan pou ou; eski i normal pou en lot Manm Lasanble kestyonn en lot Manm Lasanble dan son travay e *impute* en *improper motive* an relasyon ek travay ki en lot Manm Lasanble i al fer aletranze, ki ou les pase?

Se sa rezon akoz nou reakte Mr Speaker. E mwan mon donn en garanti, mon donn en garanti Lepep Seselwa ki wi Patrick Herminie pou sanz

larz Sekirite Sosyal pou fer li retourn 63 an!

(APPLAUSE)

HON SEBASTIEN PILLAY

Mon osi donn nou bann dimoun aze en garanti ki wi, Patrick Herminie ...

(Interruption)

MR SPEAKER

10minit Onorab.

HON SEBASTIEN PILLAY

...pou fer en pli bon Prezidan ki Wavel Ramkalawan.

(APPLAUSE)

HON SEBASTIEN PILLAY

E mon donn Lepep Seselwa en lot garanti Mr Speaker. En garanti ki 2025, en Gouvernman LDS pe *exit, exit* pouvwat dan sa pei Mr Speaker, akoz zot in *fail* pou delivre lo promes ki zot ti fer devan sa pep! Vann lagrenn bat latet ek sa pep Mr Speaker, i pli gro krim ki'n deza arive dan sa pei. Se sa ki nou war Mr Speaker. E mon pou fini lo sa not Mr Speaker, ou'n dir mwan konklir.

Pou montre ki mannyer lespri Gouvernman LDS i

marse. Bomaten menm ki Onorab Cosgrow in fer son lentervansyon bann *fake profile* dan group *Wavel 2025* asosye ek Prezidan Larepublik ki serten *fake profile* ki mwan mon krwar, mon krwar i posib ki li i annan lyen avek, malgre ki li in anmenn en Lalwa *hate Speech* pou anpes lezot dimoun koz kont li, in komans maltret Onorab Cosgrow dan bann fason ekstrememan vilger. E sa...

(Interruption)

MR SPEAKER

Sorry. Eski mon'n tann ou pe fer en lakizasyon, kont Prezidan? Si sa i lentansyon ou parol, ou *out of order*. Mon pa ni menm pou demann ou pou *retract*, parske ou pou al zve avek mo. Selman mon met ou okouran ki ou parol i pa merit en *Leader* Lopozisyon dan Lasanble. Mersi.

(APPLAUSE)

MR SPEAKER

Terminen prezan Onorab, silvouple.

HON SEBASTIEN PILLAY

Mersi Mr Speaker. Mersi pou tret mwan avek tou dinyite ki

mwan mon'n tret ou. E mersi pou ou dir mwan ki parol ki merit en *Leader* Lopoziyon dan Lasanble Nasyonal. Sa ki mon'n dir se ki en group ki apel *Wavel 2025* ki mon krwar e mon ava retir sa ki mon krwar. Me zot in maltret Onorab Cosgrow.

Me pou ou dir mwan ki mon parol pa merit en *Leader* Lopoziyon Mr Speaker, petet nou tou lede nou devret get kanmarad dan laglas. Akoz ozordi kot i arive dan sa pei Mr Speaker, mon pa pou aret debout akote...

(APPLAUSE)

MR SPEAKER

Mersi. Onorab Bistoquet, ou annan laparol.

HON ANNE BISTOQUET

Mersi Mr Speaker. Bonn apre midi tou dimoun a lekout. Bonn apre midi mon bann Manm koleg Onorab. Mr Speaker, Mosyon ki devan nou anmennen par Onorab Audrey Vidot i konm swivan; Sa Lasanble pe demande ki Gouvernman i fer le neserer pou nou bann dimoun aze viv dan plis dinyite.

Otan ki mon apresye sa santiman par deryer sa Mosyon, mon vwar li esansyel

pou nou klarifye 2 tenm dan sa Mosyon. Premyerman Mr Speaker, mon oule dir en gro mersi tou bann dimoun aze pou tou zot kontribisyon pou nou pei. En mersi spesyal pou tou bann ki'n debout for menm si zot in viv avek larm dan zot lizye e douler dan zot leker, letan zot dinyite ti ganny vyole sirtou dan letan Parti Inik anba Mr Rene.

Mr Speaker, annou regard sa tenm "fer le neserer". Eski Onorab pe dir nou ki napa naryen ki Gouvernman pe fer pou nou bann dimoun aze? Mr Speaker, loter Mosyon in manke pou dir sa pep ki sete Prezidan Ramkalawan, *Leader* Lopoziyon sa letan, ki depi dan premye Lasanble in lager pou nou bann dimoun aze.

Sa i enkli lager dan premye Lasanble pou annan en Polisi e en konsep *Old People's Home*, lager pou sanz sistenm Sekirite Sosyal pou pli byen benefisyen sa ki'n travay dan Gouvernman, e osi bann ki'n travay dan prive. Ki pa ti pe benefisyen otan. Lager pou ki nou bann dimoun aze i aret pey *license* pou ganny akse avek televizyon. en Mosyon ki *SPPF* ti rezete, zot ti les tranpe parey zot labitid e apre fer krwar ti zot lentansyon.

Lager pou Sekirite Sosyal sorti 3 mil pou mont 5050, kot ankor enn fwa ti ganny refize. Zot ti les tranpe e an 2014 zot ti donn sa menm logmantasyon demande par Onorab Ramkalawan sa letan.

Mr Speaker, letan nou regard revizyon Sekirite Sosyal depi 2004, mon pa'n war sa kalite sonm logmantasyon ki ozordi *US* pe sant sanson lo la. An 2014 ziska 2017 sa logmantasyon ti arete pou 3 an.

Sa sonm ti reste 3 mil e i ti ogmante an 2017 apre ki *LOTO* Ramkalawan sa letan ti lager e pa'n zanmen les tonbe sa lalit pou nou bann dimoun aze. Mr Speaker, mon'n antann koz lo Sekirite Sosyal. Letan mon ti en aktivis parti rouz, zot ti toultan dir nou ki Sekirite Sosyal sete Mr Rene ki'n envante. Sa Mr Speaker i en bat latet.

Sekirite Sosyal i an egzistans depi dan bann lannen 1601, kot bann Angle ti apel sa *Poor Law* ki ti ganny entrodwir pou ed bann pov dan lasosyete. Mr Speaker, 75 an pase le 10 Desanm 1948, Lasanble Zeneral Nasyon Ini ti adopte *Universal Declaration of Human Rights* kot Sekirite Sosyal ti ganny deklare en drwa imen, en drwa *socio-economic*.

Lartik 22 *Universal Declaration* i dir "*Everyone as a member of society has a right to Social Security*". I enportan pou note ki Sekirite Sosyal, i mansyonnen dan 119 Konstitisyon otour lemond. Alors, Mr Speaker, Sekirite Sosyal pa Mr Rene ki ti envante.

Mr Speaker, nou'n antann dir 4 an in napa logmantasyon dan Sekirite Sosyal. Me sa bann Onorab in dekonekte avek Sesel. Mon demann zot pou al fer zot *homework* e nou pou donn zot en *extra class* dan Bidze 2025.

Ozordi nou nepli antann dir ki dimoun mor i ankor pe ganny Sekirite Sosyal parey in egziste e ganny abize anba ladministrasyon *US*. Konmela ou nepli tande ki benefis sosyal in ganny pran lo non madanm ek msye entel aze. Me sa bann pov dimoun pa'n zanmen fer en tel laplikasyon. Tousala ti bann labi anba ladministrasyon *US*.

\$50 milyon disparet la nou pe atann bann nouvo bilyon, \$4.5 milyon larzan konblaz ki ti disparet. Mr Speaker, lalis i long. I annan ki ti dir i pou al rod sa \$50 milyon, me ozordi zour nou war zot tou in ranpli lakour, pou al donn sipor sa bann menm dimoun

ki'n donn lanmen vol nou larzan!

Mon anvi dir avek sa bann dimoun aze zis mazine si sa bann larzan pa ti'n ganny vole anba Ladministrasyon US, ozordi zot tou zot ti pou kapab ganny en Sekirite Sosyal R10 mil sakenn.

Mr Speaker, mon tann loter Mosyon dir byen *à haute voix* ki nou bann dimoun aze ti ganny R500, e apre in aret gannyen. In al pli lwen pou eksplike ki kantite konnekte i konnekte avek son bann dimoun. Mr Speaker, me mon annan gran plezir pou enform Onorab Vidot atraver ou, ki i vremen dekonekte avek son bann dimoun aze. 2 semenn pase le 31 Out 2024, parti LDS ti al fer *blitz* dan distrik Roche Caiman.

Bann dimoun aze ki mon'n personnelman pas devan zot laport, ti dir mwan dir Prezidan Ramkalawan en gro mersi pou sa R500 benefis ki zot in rekomans gannyen sa mwan Out. Prezidan, dimoun aze Roche Caiman i dir ou mersi.

Ozordi larzan palto in vin zot *motto*, me Mr Speaker zot pa fer sa pep konnen ki i annan ki ti *boycott* larzan palto, me ozordi pe pran li byen trankil

deryer rido, san dir sa pep ki li osi i pe benefisye.

Dezyenmman Mr Speaker, nou pou vwar sa tenm "Viv dan plis dinyite". Sa konsepsion i vedit ki nou bann dimoun aze non selman bezwen bann benefis esansyel, me zot osi bezwen ganny bann trete avek respe, angaze dan bann langazman sosyal e annan en sans pou viv. Dinyite al bokou pli lwen ki sipor finansyel e fizik. I enkli kre en lanvironnman kot nou bann dimoun aze i ganny valorize e apresye.

Mr Speaker, touzour kot i konsern lapresyasyon anver nou bann dimoun aze nou *First Lady* Mrs Linda Ramkalawan, in lans en linisyativ depi 2022 ki apele "*Hug In A Mug*". Kot i organiz bann fonksyon lo Mahe, Praslin e La Digue pou eksprim gratitud e lapresyasyon Komite Dimoun Aze ki enkli bann travayer ki'n travay dan sekter prive e piblik.

Le 11 Out 2024, *First Lady* an kolaborasyon avek SNYC in organiz 7enm edisyon sa linisyativ. Nou *First Lady* ti eksprimen ki bi sa rankont, se pou montre lapresyasyon e remersi anver nou bann dimoun aze dan kominote, ki'n devoue plizyer deseni zot lavi pou deservi nou pei.

I ti osi azoute ki sa linisyativ i ofer sa bann endividi loportinite pou sosyaliz e konnekte avek kanmarad, apre ki zot in pran retret.

Nou dir mersi nou *First Lady* pou sa linisyativ "*Hug In A Mug*". Mr Speaker, o firamezir ki nou vyei, nou ekspekte ganny trete avek respe, onore e valorize. Tou i komans dan lakour, se nou bann fanmir pros ki swa zanfan, pti zanfan, ou menm aryer pti zanfan ki labaz fondasyon dinyite anver nou bann vye paran e lezot dimoun aze ki'n zwe en rol enportan dan nou lavi.

Se dan lakour ki kominikasyon, sipor fizik e emosyonnel i komanse. I sagrinan letan nou war bann endividi ki bat zot paran, fer zot paran martir, kit zot sou dan en fason endesan anba *bus stop*, eksetera. Mr Speaker, ozordi apre midi Prezidan Ramkalawan avek *First Lady* ansanm avek Lazans *Home Care* in rekonnet bann *home carers* ki'n servi 15 an e plis. Sa i fer premye fwa ki en tel aktivite i ganny organize.

Lekel an mazorite ki sa bann dimoun i pran swen avek si pa nou bann pansyoner? E la zot konnen ki dan sa Bidze ki pe vini parey Prezidan ti anonse,

bann *home carers* ek bann pansyoner pe ganny regarde.

Mr Speaker, pou fer note ki wi Ladministrasyon *LDS*, in get dan *welfare* nou bann *home carers* kot zot ti ganny R1000.

Alor Mr Speaker, *US* pe zis koze e esey bat latet nou bann dimoun aze. Mr Speaker, mon anvi fer bann dimoun aze konnen ki wi, Ladministrasyon *LDS* i annan en plan pou zot. E o firamezir a moman apropiye, ladministrasyon *LDS* pou fer zot konn plan Gouvernman ki enkorpor zot byennet.

Avek sa detrwa mo, mon pa pare pou mwan donn sipor sa Mosyon. En Mosyon ki war vwar li ipokrit de lapar *United Seychelles*. E mon pa pou vot lo sa Mosyon. Mersi Mr Speaker.

MR SPEAKER

Mersi Onorab. Mon a donn laparol Onorab Vidot pou son repons e konklizyon lo deba.

HON AUDREY VIDOT

Mersi Mr Speaker. Mr Speaker, premyerman mon oule dir en gran mersi tou bann Manm ki'n partisip dan deba lo sa Mosyon ki'n vin devan Lasanble Nasyonal ozordi. En remersiman spesyal i al pou bann Manm *United Seychelles* ki'n ekout byen mon

prezantasyon Mosyon e ki'n kapab annan sa kouraz pou zot kapab koz lo defi ki bann dimoun aze pe pas atraver dan tou kous nou bann distrik dan pei.

Se atraver sa bann defi, ki bann Manm *US* in nobou kapab soulev bann problem, ki annan ki kapab kre loportinite pou sa Gouvernman ki la ozordi aranze e amelyore. Sa *LDS* pa pou konpran sa Mr Speaker, akoz zot in toultan pri dan defann zot ladministrasyon menm si zot bezwen fer li lo ledou nou bann dimoun aze.

Mr Speaker, atraver ou mon oule dir avek Onorab Monthly, mon Mosyon ti ganny soumet avek Lasanble Nasyonal le 4 Zilyet 2024. Mon oule osi dir avek sa menm Onorab ler i manz son bannann pa anvoy lapo lo nou. Akoz sa ki mwan mon konnen menm si mon pa ti dan pei dimoun Roche Caiman in war zot kot zot in sot lakaz. E sa pti group ki zot in vin avek, zot pa'n ganny sans pou zot kapab vwar tou sa bann dimoun. E sa bann dimoun i dir ek zot enn itil borde, lontan zot ti dir zot reste dan lakaz lapen. La zot ozordi zot in war nou? Non mersi, pa oule zot.

Mr Speaker, atraver ou mon oule dir avek mon koleg

Onorab Naidu, wi Onorab, par 5 vot mon'n retourn dan Lasanble Nasyonal. Onorab Georges ti ganny par 4, in tournen li. Me 2025 Audrey Vidot pou retourn ankor!

(APPLAUSE)

HON AUDREY VIDOT

Mr Speaker, atraver ou mon oule dir avek mon koleg Onorab Henrie, pa li ki pou vin donn mwan lesou lo pran keksoz ki pa poumwan. Akoz sa pa mon louvraz sa, li i pou pli konn byen ki sa ki mwan. Mr Speaker, yer ler nou ti pe koz zeneral lo Mosyon Onorab Sathya Naidu, ti annan bokou keksoz pou ganny dir.

Me ozordi pou nou koz lo dimoun aze, zot deside pou zot bos plat. Sa Manm ki'n dir sa Mosyon napa en sou sans. Enn bann dimoun ki ti vin dan galeri bomaten i dir mwan dir avek sa Onorab sa ki li in dir dan son bann parol, pa fer en sou sans.

E menm demann avek sa bann Manm si vre larzan pa ti enportan, akoz ki ler zot, zot bann sef ti pe ogmant zot lekor avek bann gro larzan pou ranpli zot pos, akoz zot pa ti mazin sa bann dimoun ki zot ozordi nou pe koz pou zot?

Espesyalman ler zot ti fer sa, zot ti fer li letan zot ti dir pei pe rap lo son zenou. Mr Speaker, atraver ou mon oule dir avek mon koleg Onorab William, be si vre si ou krwar poudir mwan mon pe vin zwe lo lemosyon nou bann dimoun aze, ou tronpe Onorab.

Kontrer dimoun Grand Anse Mahe ki dir ou pe zwe lo zot lemosyon. Akoz ler nou, nou pe rod benefis pou nou bann dimoun aze, espesyalman ki enkli bann dimoun Grand Anse zot, zot pe dir firamezir.

Kontrerman avek zot bann, zot Prezidan avek zot bann Minis zot, zot in pran tou pou zot byen boner kot i koul dan dalo parey delo.

Mr Speaker, mon oule felisit tou mon bann koleg ki'n kapab rekonnèt zefor nou bann dimoun aze ki'n batir nou pei. Swivan deba ki'n ganny fer par bann Manm US, i kler ki bann Manm i ankor konnekte avek zot distrik.

I kler ki Ladministrasyon LDS i annan en kantite travay pou zot fer pou amelyor servis e sipor ki zot donn bann lenstitisyon, e osi kot nou bann dimoun aze pou ki zot kapab viv en lavi pli eze parey Mosyon ti pe demande.

Mr Speaker, nou 2 Manm lo zil in fer zistis sa Mosyon ki'n vin devan nou Lasanble depi bomaten. Zot in nobou kapab koz pou sa bann dimoun lo zil, montre poudir sa bann dimoun valoriz zot bann konsern, e montre poudir Gouvernman i ankor annan lespas pou zot travay pou kapab amelyor lavi nou bann dimoun lo zil.

Mr Speaker, mon rekonnèt kontribisyon sorti kot Onorab Gabriel, akoz i vre avek devlopman e byensir avek modernizasyon teknolozi pe ganny servi. E bokou servis ozordi ki pe ganny servi par elektronik sistenm elektronik, i enportan ki nou kapab annan bann program ki kapab siport nou bann dimoun aze, pou ki zot osi zot kapab fasilite zot pou servi sa bann servis e osi sa bann teknolozi ki egziste ozordi.

E ler nou lo sa kote latab nou pe demann pou war kwa ki nou kapab donn sipor nou bann dimoun aze, nou bezwen donn zot akoz zot merite.

Mr Speaker, Onorab Cosgrow avek Onorab Spiro in fer bokou nou rapel kote nou sorti, kot nou'n arive e kote nou bezwen ale. Sa pou sa rezon ki ou war zot, zot in bezwen kapab *remind* nou bann dimoun lenportans lekel ki ti komans

lager pou montre valoriz nou bann dimoun aze lo komansman. E ziska ozordi, nou ankor pe lager pou nou bann dimoun aze.

E Onorab Lemiel ek Onorab Aglae, in fran e kler dan zot lentervansyon lo sa Mosyon, akoz zot in war lesansyel ki nou pe demann aksyon. Se aksyon ki nou pe demande pou kapab met an pratik sa ki Polisi i egzize ozordi, pe demann aksyon pou ki bann kad legal i ganny byen pratike.

Mon dir dan mon lentervansyon bomaten, striktir i la, mekaniz i la, me i regretab ki lot kote latab pa'n enterese pou ekout sa ki mon ti annan pou dir bomaten. Me plizoumwèn zot in pli enterese pou zot al defann bann promes ek komanter ki zot Prezidan ti dir dan bann promes ki zot in fer avek sa bann dimoun aze.

Mr Speaker, i kler ki pep Seselwa ki pe swiv nou Lasanble depi bomaten i kapab vwar lekel vreman ki reprezant lepep. Akoz ozordi nou'n plizoumwèn war en group Manm Lasanble reprezantan ki pou zot, zot prioritize zot bann largiman zot bann kontribisyon anver sa Mosyon plizoumwèn pou atak nou lo kote latab *United Seychelles*. Akoz

senpleman nou pe demann Gouvernman pou li kapab adres e rezourd bann defi ki zot annan dan zot servis. E vwar ki mannyer zot kapab ranforsi sa bann servis pou ki nou bann dimoun aze i ganny sa servis alaoter. E zot ganny sa servis a en dele letan rezonnab.

E Mr Speaker, letan nou pe koz lo larzan, si zot in promet sa bann dimoun larzan dan zot konpany eleksyon, akoz ki zot bezwen esper 4 an pou zot kapab ... 4 an ou 5 an pou zot kapab donn sa bann dimoun en logmantasyon? Akoz zot pa kapab fer li sa lannen, pou zot vin avek en *supplementary budget* vin donn sipor sa bann dimoun aze?

Ou esper 4 an, selman zot, zot pran tou sa ki apel pou zot, zot pe al pran ankor pou zot i *ok*. Larzan i ale zis ek zot.

Mr Speaker, nou lo sa kote latab nou pou toultan siport nou bann dimoun aze. Nou pa zis pou vin la pou vin dir pou met larzan dan zot pos. Me nou war, nou anvi war zot byennet, zot sipor e pou zot kapab kontinyelman viv dan en lavi pli stab, pli eze e ki zot a ganny zot bezwen ki zot merite.

Lo sa not mwan Mr Speaker, mon pou dir Roche Caiman mon pou kontinyelman

defann e siport nou bann dimoun aze. Mon'n ganny elekte la pou mwan travay, pou mwan koz pou mon bann dimoun. Pa pou koz pou mon lekor ni pou mon parti. Mon pou koz pou mon bann dimoun, akoz se sa ki mon ti ganny elekte lo la. Mersi Mr Speaker.

(APPLAUSE)

MR SPEAKER

Mersi Onorab. Mon ava apel bann Manm pou vot lo Mosyon ki lir koumsa. Sa Lasanble pe demande ki Gouvernman i fer le neserer pou nou bann dimoun aze viv dan plis dinyite. Manm ki an faver lev lanmen silvouple? Mersi. Manm ki kont? Mersi.

Lo Mosyon ki devan nou, 10 Manm in vot pour, 16 Manm in vot kont. Donk, Mosyon pa'n aprouve par Lasanble. Mersi. Bon, nou pou prezant en *Revised Order Paper* avek *First Reading Public Bill*. Madanm Clerk a fer sa *First Reading*.

MADAM CLERK

Mersi Mr Speaker. Mon pe fer First Reading pou *the Penal Code (Amendment) Bill, 2024*.

This Act may be cited as the Penal Code (Amendment) Act, 2024. Mersi Mr Speaker.

MR SPEAKER

Mersi Madanm Clerk. Mersi bann Manm pou zot travay ozordi. Nou'n ariv a lafen sesyon pou sa semenn. Mon swet zot en bonn fen lasemenn, kontinyasyon lasemenn. E Lasanble i ava *adjourn* ziska Mardi prosen, 9 er.

(ADJOURNMENT)

